


6


10-e

49



6-10-1919





M. AUGUSTINI CAMPIANI

PRIVERNATIS Icti.

ET ANTECESSORIS TAURINENSIS

VARIARUM AD ACADEMIAM
Pertinentium

FORMULARUM,
ET ORATIONUM

Liber singularis

Divisus in partes duas,

Quarum primæ accessere legis Taurinensis
Lycei præcipua capita.



AUGUSTÆ TAURINORUM,

Typis Joannis Radix, sub signo Angeli
Custodis. 1728. Super. permissu.



CLARISSIMO VIRO
 P. IOSEPHO ROMÆ
 PHYSIOLOGIÆ IN TAURINENSI LYCEO
 PROFESSORI,
 E Sacra Minimorum Familia,
 M. AUGUSTINUS CAMPIANUS
 S. P. D.



*Vi memoratu digna prodidere litteris , id
 agere consueverunt , ut vel Prin-
 cipibus , vel amicis scripta nuncupa-
 rent , quorum alterum semper obsequii ,
 alterum benevolentiae plurimum habuit. Sed quemad-
 modum vel gratiam captare , vel lucrum ille videtur ,
 qui modum in primo minimè teneat ; quæ res animum
 indicat vel vanitate corruptum , vel avaritia ; sic
 postremum non modò ab omni quæstu remotum est ,*

verum etiam a cunctis adulandi causis, & specie blandiendi, mentiendique suspicione. Amicos etenim maximè decet, ut si quod laudis testimonium reddere debeant, id parcè faciant, quòd ex animi sententia loquantur; aucta namque in maius facta, licet egregia, quantum ex arte trahunt, tantum sibi fidei abrogant; ut minus probabilia sint, quæ magis videantur amplificata. Scitè propterea, etsi non probè, Tiberius egisse putatur, qui quum filium in Senatu commendaret, paucis differuisse fertur; quum Germanici gesta recenseret, pluribus verbis, & exquisitis, quibus majorem, vel parem filium, minorem alterum esse Patres suspicarentur. (a) At quod callidus, scelestusque Princeps, pravis artibus virtutes æmulantibus, nos ex recto consilio, Vir præclare, præstemus, teque laudatione nostra majorem posteri censeant, quòd amicè lauderis.

Eapropter munera vix memorabo, quæ adolescens adhuc obieras; quamquam & hæc laudis pars non modica videatur, quòd nondum tricesimum annum egressus elegantiorum Philosophiam, & necessariam Christiano cultui Theologiam, summa cum laude Romæ docueras: atque Annibalis Cardinalis Albani apud patrum Clementem XI. Pontificem Maximum inclyti Mæcenatis tui, ac summi ea tempestate patroni, Theologum egeras. In quem gradum non ambitu, gratiæve irrepseras, sed eâ doctrinæ famâ, quæ ingentem ex Latinis, Græcis, Hebraicisque litteris tibi pepereras, & illâ Eminentissimi Purpurati munificentia, quâ semper bonos, doctosque viros comple-

Etitur

(a) Tacit. 1. annal. cap. 53.

Elitur, ac tuetur. Hoc auctus honore, qui non modò partæ gloriæ retinendæ suffecit, sed etiam conciliandæ valuit ampliori, ad Taurinensem Academiam advocaris; sed quòd honorificentius, quàm cæteri Collegæ tui à summæ virtutis, prudentiæque Rege suscipiaris, non miramur, & si qui boni sumus, non invidemus; sunt etenim hæc dexteritati, ingenioque debita Viri prævisis, subitisque parati, parvis, magnisque non imparis, & calamo, & linguâ pollentis. Minus itaque miror, quòd Correctoris Provincialis officium absenti tibi, & subalpinam Juventutem instituenti, Aquitaniæ provinciæ sodales summâ concordia, parique studio detulere, si mortalium omnium opinione Rex Sapientissimus quantum tuæ mentis maturitati consideret, eo demonstravit, quòd Eugenio Principi te studiorum morumque Rectorem adjunxerit. Nempe Pronepos ex fratre maximi imperatoris Eugenij, Sabaudæ familiæ inclitum pignus, Victori Amedeo Regi, Conjugi, Liberisque carissimum, fuit, eritque tibi præceptis, exemplisque majorum, ac suorum gestis priscis, novisque formandus. Quid effeceris hætenus, ipse declarat raræ indolis Regius adolescens, cujus in teneris annis dicta, factaque nihil non portendunt grande, magnanimum, generosum, Principe, & sene dignum Eugenio.

Notissimos verò in Taurinensi Academia labores præteribo tuos; non enim omnia memorare necesse fuerit, quæ gesseris, quæve sustuleris. Ubi bellum in novos artium Doctores exarsit [quod in me, licet omnium obscurissimum, haud minùs acerbum, quàm in cæteros extitit, ac inhumanum] nemo fuit nec ambiguus

ver-

verbis, neque latentibus magis provocatus, & laces-
 situs. Velut partium ducem subvertendis veterum
 Philosophorum placitis ex longinquis evocatum
 oris arbitrabantur; omniaque Philosophiæ tuæ
 nuper objecta, quæ novis disciplinarum Instau-
 ratoribus maiorum nostrorum ætate crimini da-
 ta. Nec temperatum conviciis, odiumve lenitum
 est, quod periculosius olim, quoniam tectius, in aper-
 tas tandem, atrocesque erupit injurias, nisi postquam
 plerisque constitit, tantum a veritate teterrimum
 paucorum, & in obrectatores relatu facile maledictum
 abesse, quantum novum studium sapientiæ à veteri
 rixandi libidine. Exercuit tamen ea tempestas amici-
 tiam nostram, & illam veterem quidem, et si fateri
 licet, solâ virtute conciliatam adauxit: & quod dif-
 ficilium temporum singulare pretium est, falsas vel
 distraxit, vel non celavit.

At non ego temerè facio, quòd te, Vir doctissime,
 multisque silentibus, garrere non desinam, & non so-
 lùm amicis, sed & omni litteratorum nationi meas
 obtrudam ineptias? Sed in hoc ego non tam accusan-
 dus, quàm plerique nostrorum de universis bonis arti-
 bus male mereri videntur. Qui namque molitur ali-
 quid, si conatui nec vires, nec fortuna respondeat,
 hanc pœnam det inanis laboris, ut ne legatur opus à
 posteris obliterandum; illi notâ inurendi magis, qui
 quum profutura mortalibus scribere queant, ea levi
 de caussa contemnunt, ac negligunt. Porro de te po-
 tissimum, Vir clarissime, pro nostra quererem amici-
 tia, quòd nihil ex tanta scriptorum tuorum congerie
 promulgaveris, nisi additi reliquis exercitationibus
 labores

labores integrum tui otii tempus absumerent. Quum igitur doctiora tu retineas, supprimasque, prodimus ipsi levium formularum artifices, qui, dum alia meditamur adolescentibus forsitan non obfutura, precipuos Taurinensis Academiae mores eisdem expositos non sine complurium commemoratione Juvenum exhibemus. Acceditque reliquis ea quoque causa, quare tibi opus hoc debeat, quod nobiles plerique Juvenes, qui a nobis memorabuntur, tua ex schola, tuisque praeceptis eruditi prodierint, ut hac honorifica mentione, quasi praesenti laborum fructu, lateris.

Frustra verò timerem, ne quod tibi defero munus, ipse despicias, quum amici quaecumque donum non ex commodo, sed ex voluntate pensetur. Parva, non inficior sunt, quae recipies, sed quae (si vires, & animum attendas) post illa potiora, quae Augusto Regi dicavimus, secundas obtineant; Princeps etenim primas curas, ceteras amici, sui que merito vindicant. Ex his autem, quod te potissimum legerim, nemo suam ad injuriam revocabit, quum omnes pro certo habere debeant, nihil me curaturum impensius, quam ut beneficiorum memoria viva semper, & firma permaneat, ubi vicem aliter reddere nequeam; quippe qui prolixius, & cumulatiùs gratiam referre, quam beneficium acceperim, id demum grati esse arbitrer, & amici. Vale.



LECTORI

HAud sane modicam esse Lycei Taurinensis utilitatem, quod Victoris Amedei Augustissimi Sardiniae Regis divinâ prope-modum liberalitate paucis abhinc annis restitutum est, neque illi hodie dissimulant, qui tantæ Principis molitioni, & præcelso operi nunquam obsistere destiterunt. Pervagatum illius nomen iam ad extimas Europæ regiones non modò pervenit; verum etiam plurium doctrinâ illustrium virorum præconiis neutiquam exiguis celebratur. Quibus tamen moribus hæc hodie inter Italiæ primas Academias adscribenda regatur, non omnes quidem scire hætenus potuerunt; quare pretium operæ me facturum credidi, si formulas eas colligerem, quæ vel in usu sint apud nos, vel eâ de causâ præscriptæ fuerint, ut gradus Academici conferrentur. Non tamen prætermittendum est, nonnullas in hoc volumine quoque repertum iri, quæ nunc primùm in lucem veniant; factum namque id est, ut melius legis Academiæ vim, & potestatem expromerent.

Quod autem ad easdem formulas attinet, præter eam voluptatem, quam ex cognitione consuetudinum hujus Academiæ capias, nihil, quod allicere queat, inveneris. Ejus namque scriptoris operâ prodeunt, qui præter eam prærogativam, quam habent primi, qui illas nostram in Academiam intulerunt, nullo sit alio

alio nomine commendabilis ; imo eâ quoque causâ forſitan ſæpiſſimè reprehendendus , quòd nullam exprimat virtutem illorum , qui ſimiles hodie ſummâ cum laude conſcribere videantur.

Addimus ejuſdem Taurinenſis Lycei legis præcipua capita nunc primum latinitate donata. In hac , quidquid formulis comprehenditur , & in mores perductum eſt , velut in exemplari abſolutiſſimo continetur. Nihil de hujus ſtylo dicimus qui fortasſe junioribus nonnullis Romanarum rerum minimè peritis præſcus videatur , & obſoletus. At hi non antè præſcum eum loquendi modum exiſtiment , quàm ſciant Ciceronis , Auguſti , atque adeo Veſpaſiani temporibus illum in uſu fuiſſe. Qui ſi primis Inſtitutionum præceptis dederunt operam , turpe putabunt ignorare , quomodo lex a Principis placito diſtinguatur. Hoc enim ſolum ſat erit , ut noverint qui placiti ſeu conſtitutionis , qui legis ſtylus ſit ; alterius enim in Codice innumera exempla ; alterius in Digèſtis complura fragmenta paullo elementario doctior facilè invenerit.

Secundæ partis loco quaſdam Orationes atteximus , quæ eundem ad finem collineant. At ab his non maiorem quis reſpoſcat faciundiam , & candorem , quàm qui a Pontificii Juris non magno Interprete jure peti videatur. Prodeunt enim una Bernardi Andreæ Lamæ,
Ora-

Oratorum ætatis nostræ facile principis, eloquentissimæ Orationes, in quibus quantum artis Oratoriæ robur, venustas, & splendor efficere queant, unusquisque perspexerit. Juvat harum velut oppositu viri omni doctrinarum genere exculti cognoscere in scribendo felicitatem, ut eximiæ picturæ pretium, & nitor umbrarum obscuritate magis & apparet, & emicet.

Cæterum quamvis complura illorum, quos publicè laudavimus nomina, hîc descripta conspiciantur, multa quoque vel inviti reticere cogimur, quòd non omnes quas scripsimus formulas invenire potuerimus, quippe quæ nullo apud nos in pretio & curâ fuerunt. Nihil tamen eo casu egregiorum adolescentium famæ derogatum velim; inter quos clarissimum Juvenem *Octavium Cottum Excellen- tissimi Præsidis Octavii F.* peculiari oratione, quam de ejus laudibus habui, dum celebrare cupio, Typographi præpropera festinatione earum filum cōpellor abrumpere. Ut hîc ergo vel nostræ voluntati acquiescat, vel necessitati ignoscat, exopto: omnesque sciant non defuturum tempus, quo eorum nomina litterarum monumentis consignata in posterorum memoriâ clara splendent.



INDEX PRIMUS xi

Nominum illorum, qui viventes, in opere
laudantur.

A

- A** Guirre *Franciscus Regius Censor, &*
Advocatus pag. 4
Avenatus *Octavius Senatoris F.* p. 20

B

- Badinus *Stephanus Julius.* p. 37
Balbis *Josepb Philibertus Canonicus.* p. 21
Bellinus *Matthias.* p. 14
Bellinus *Josepb Ignatius Abbas Canon.* p. 16
Bencinus *Dominicus Theologiæ Professor*
Abbas. p. 83
Bertramus *Petrus.* p. 8
Boleonus *Stephanus Medicinæ Professor*
p. 12. 67.
Boleonus *Carolus Hyacinthus.* p. 11
Boleonus *Josepb Antonius.* p. 12. 67
Bottus *Carolus* p. 29
Bottilia *Carolus Antonius Comes* p. 34
Bozottus *Carolus Antonius.* p. 13
Brunus *Franciscus Bernardinus.* p. 28
Brunus *Josepb.* p. 76
Buzanus *Josepb Petrus.* p. 38

C

- Cameranus *Honoratus.* p. 40
Cavallero *Ignatius.* p. 24
Clarettus *M. Antonius Comes.* p. 123
Car-

Carretta *Ioseph Secundus.* p. 50

Capra *Ioseph Franciscus Comes.* p. 52

Capris à Castromonte *Iohannes Comes.* p. 17

Cassini *Iohannes Gulielmus.* p. 21

Celebrinus *Constantius.* p. 18

Corte *Ioseph Ignatius.* p. 54

Cottus *Octavius Præsidis F. Com. præf.* p. x

Cottalorda *Horatius.* p. 15

D.

Deblandrate *Vespasianus.* p. 54

F

Fantagutius *Paullus Apollinaris.* p. 35

Ferretius *Vincentius Marchio regii*

Administri F. p. 1

Ferrerius *Antonius.* p. 63

Ferrerius *Iohannes Baptista.* p. 5

G

Gays *Bernardinus.* p. 3. & seq.

Genta *Ludovicus.* p. 116

Gerbaldus *Vitus Modestus.* p. 45

L

Lama *Bernardus Andreas Eloquentie*

Professor præfat. p. x

M

Mainardus *Iohannes Dominicus.* p. 44

Malpassutus à Montilio *Carolus Ubertus*

Abbas Canonicus. p. 27

Malabayla *Lud. Hieronymus Com.* p. 48. & 166

Mazertus *Michael Angelus Comes.* p. 22

Mazeus *Iohannes Baptista.* p. 71

Mo-

Morotius *Joseph Franc. Marchio.* p. 46. e 152

Morellus *Dominicus Antonius.* p. 123

N

Niger *Paullus.* p. 32

O

Osascus *Cacberanus Johannes Baptista*

Comes. p. 33

P

Patritius *Fridericus Abbas.* p. 34

Passera *Petrus Franciscus.* p. 51

Pellionus *Carolus.* p. 25

Pellionus *Ignatius.* p. 39

Pellionus *Victorius Amedeus.* p. 56

R

Radicat *Gaspar Angelus Comes.* p. 36

Reffia *Petrus Josephus.* p. 80

Ripa *Vespasianus Marchio.* p. 2

Rugierus *Alexander.* p. 55

S

Sammartius *ab Alladio Franciscus*

Flaminus Comes. p. 30

Serottus *Petrus Joseph.* p. 43

T

Turri *Dominicus Maria.* p. 49

V

Vialardi *Joseph Matthæus Comes.* p. 26

Vicendet *Joseph Vassallus.* p. 42

Z

Zoppis *Antonius Franciscus Proto-*
præsidis F. p. 5. & seq.

INDEX SECUNDUS

Formularum, Orationum, & Legis Capitem.

B ^B Accalaureatus *Formula.* pag. 3

C

Civitatis *pro Professoribus.* p. 31

Civitatis *pro Studiosis.* p. 30

Codicillorum *Magisterii vid. Magisterii.*

Codicillorum *Baccalaureatus vid. Baccalaureatus.*

Codicillorum *Missionis honestæ pro Theologia & Iurisprudentiæ studiosis.* p. 61

Codicillorum *Missionis honestæ pro Medicis.* p. 65

Codicillorum *Laureæ pro Theologis, & Iurisprudentibus.* p. 68

Codicillorum *Laureæ pro Medicinæ Doctoribus.* p. 75

D

Doctoratus *vid. Laureæ, & Codicillorum.*

G

Genta *pro Ludovico Oratio vid. super indic.*

I

Jurisjurandi *Professorum.* p. 82

Jurisjurandi *Candidatorum.* p. 5

Juris *de Pontificii addiscendi necessitate Oratio.* p. 98

Juris *de Pontificii facilitate Oratio* p. 131
Lau.

L

xv

Laureæ Communis.	p. 129
Laureæ Specialis.	p. 59
Legis Academiæ capita.	p. 83
De Dei ejusque Matris cultu	ibid.
De Academiæ Magistratum officio.	p. 84
De Studiorum ordine.	p. 88
De privilegiis Academicis generatim.	p. 89
De communibus honoribus tribuendis	p. 90
De peculiaribus honoribus deferendis.	p. 93
Communia de honoribus Academicis	p. 95
Sanctio.	p. 97
Licentiæ vid. Missionis honestæ.	
Litterarum Patentium vid. Codicillorum.	

M

Magisterij formula	p. 2
Matriculæ	p. 1
Missionis honestæ specialis	p. 93
Missionis honestæ communis formulas.	
vid.	à pag. 6. ad 58.
Malabayla pro Ludovico Oratio vid.	
superiorem indicem.	
Morotio pro Iosepho Oratio, vid. ibid.	

P

Patentium vid. Litterarum.

Imprimatur, Vic. Gen. S. Offic.

V. DE SALUSSI A PAESANA Censor.

V. Comes DE CASELETTIS pro D. Com. & Pr. Pr.
RICCARDI. Magnæ Cancellariæ Custode

ERRATA

- Pag. 1. lin. 9. matricolæ. *corr.* matriculæ
 pag. 3. lin. 9. quum nullum *corr.* nullum quum sit
 pag. 8. lin. 2. necessitati *corr.* necessitatibus
 pag. 22. lin. 7. inveniuntur *corr.* invenientur
 pag. 23. lin. 9. à fin. cooptato *corr.* cooptato.
~~pag. 23. lin. 7. à fin. coepimus~~ *corr.* cepimus
~~pag. 24. lin. 5. à fin. Verruce~~ *corr.* Verrucæ
 pag. 32. lin. 13. sumserit *corr.* sumserin.
 pag. 59. lin. 10. potiore *corr.* potiori
 pag. 60. lin. 14. conscriptum *corr.* adscriptum.
 pag. 70. lin. 12. civitates *corr.* civitatis
 pag. 76. lin. 2. à fin. habere *corr.* haberet
 pag. 79. lin. 4. non adde ut olim
 pag. 94. lin. 17. quam. *corr.* quā
 pag. 100. lin. 1. possum *corr.* possum
 pag. 109. lin. 6. à fin. sun *corr.* sunt
 pag. 110. lin. 6. à fin. tradita adde exempla
 pag. 116. lin. 12. conveniat *corr.* necesse sit
 pag. 117. lin. 7. dele semper
 pag. 126. lin. 2. sanitas *corr.* valetudo
 pag. 123. lin. 12. à fin. lege splendidissimas.
 pag. 145. lin. 8. à fin. quid enim *corr.* quid etiam
 pag. 150. lin. 2. a fin. leg. reflorescere
 pag. 161. lin. 12. permaneat *corr.* remaneat
 pag. 169. lin. 19. laudavimus *corr.* laudabimus
 pag. 175. lin. 2. scripta *corr.* scripta
 lin. 9. antea *corr.* ante



VARIARUM AD ACADEMIAM
PERTINENTIUM
FORMULARUM
ET ORATIONUM
LIBER SINGULARIS.

Pars prima Formulas continens.

FORMULA PRIMA

*Codicillorum Ordinis, in quem Adolescentes
adsciscuntur, sive Matricolæ.*



Quandoquidem Vincentius Marchio
Ferrerius e Monte Regali, Amplissi-
mus Academiae Rector, Excellentissimi
Caroli Ferrerij Ulmetæ, & Palatij
Marchionis Filius, bonæ spei, & indolis ado-
lescens (a) Philosophiæ in Taurinensi Archi-
gymnasio sedulam operam navare studet, at-
que in albo studiosorum ejusdem Archigym-
nasij descriptus est: ejus ob eam rem in Aca-
demicorum honorum gradibus petendis ra-

* A

tio

(a) vel Jurisprudentiæ, Theologiæ, &c.

tio habeatur, si de ipsius diligentia, studioque in hac addiscenda disciplina præstitutis Regia sanctione temporibus constiterit. Eundem propterea nisi apud Academiae Magistratum, cui de studiosorum causis notio, ac Jurisdictio Regia Constitutione data est, in jus vocare ne licero. Omnia demum, quæ agere, facere, impetrare studiosis omnibus licet iis beneficiis, privilegiisque, quæ Rex noster concessit, restituitque, eidem *Vincenzio Marchioni Ferrerio e Monte Regali*, agere, facere, impetrare jus sine fraude esto.

FORMULA SECUNDA,

Qua Magisterium artium conceditur.

OB vehemens, diuturnumque studium, quod in Philosophiæ præceptis, ac institutis optimus adolescens *Vespasianus Ripa Marchio Julionensis* sese collocasse rite probavit, quominus ipse in cōmentarium studiosorum jampridem adscriptus Theologiæ, sacrae, civilisque prudentiæ ^{a)} gradus universos, singulosve ordine petere queat, non prohibemus. Quod autem sollertiæ, ingeniique sui egregium fecerit experimentum, uti laudis, ac doctrinarum appetentissimo, legibusque morigero adolescenti *Artium Magistri* nomen, iis cum honoribus deferatur, qui Magistris liberalium artium Athenæi nostri, communiterque descripto Jure, moribusque debentur, hoc amplius pro potestate volumus, ac jubemus.

FOR-

[a] vel *Medicina.*

FORMULA TERTIA,

Qua Candidati prærogativa tribuitur.

Vetus est Academiarum, & ab omnibus fere recepta consuetudo, ut ii, qui primis studiorum annis bene traductis, virtutis, & diligentiae specimen præbuerunt, quibusdam augeantur honoribus, quibus vix aliud æquius, justiusque; quum nullum sit in literis honestum, & probabile factum, quod aliquod exposcere præmium non jure posse videatur. Quapropter adolescentes expectationem sui mirificam concitantes, ac sustinentes, qui nempe privato periculo, vel publicis disputationibus, vel suam explorari scientiam, non sine prospero successu passi sunt, vel sese naviter in istis exercuerunt, *Baccalaureos* appellare Majores consueverunt; quæ res, ut olim ingressus, & dignitatum initium, nunc alter sit Academicorum honorum gradus, quibus ad majores adscenditur; his enim incitamentis Juventus inflammatur ad præclara quæque concipienda mente, & animi viribus exequenda, quum virtutem, non modo præmio dignam esse cognoscat, sed quæ hominum gesta laudibus cumulet, mandetque memoriae sempiternæ. Eam igitur ob causam, quum *Petrus Bernardinus Gays* artium Magister precibus suis declaraverit sese *Jurisprudentiæ* (a) elementa sollerter arripuisse, & constitutis Regia lege temporibus, ita in Acade-

* A 2

mia

[a] *vel Theologiæ, vel Medicinæ.*

mia versatum esse, ut diligentern juxta, ac moderatum discipulum sese gerendo, spem de se captam suo cum discrimine confirmarit, de ea re ita decrevimus: quando *Franciscus de Aguirre V. C. Academiae Censor, & Regius Fiscus Advocatus* certior factus de studiis, & profectu *Bernardini Gays* artium Magistri, eum dignum censuit, qui ad alterum honorum gradum evehatur, placere eundem ad *Baccalaureatus* (quem dicunt) honorem merito promoveri.

Quod igitur Deus bene vertat, ex auctoritate Augustissimi Regis nostri pronunciamus, *Bernardinum Gays* artium ingenuarum Magistrum divini humanique Juris Candidatum esse eo jure, quo qui optimo sunt creati: eique in posterum publicè, privatèque disputandi, in Academiae litterariis conventibus agendi, & si sua interesse censebit; recitandi jus, potestatemque esse, uti omnibus, qui ad hunc honorem promoventur, principali sanctione, vel qua aliâ optimâ lege licet, licebitque.

Sed quoniam modicus est laudationis fructus, nisi ejus memoria diuturna permaneat: propterea hasce litteras a nobis subscriptas, & signatas, ut ingeniosissimo Juveni sit ea studii strenuè coepta testificatio, in publicum emitti curavimus.

FORMULA QUARTA

*Jurisjurandi à Candidatis, qui missionem honestam
petunt publicè præstandi.*

QUOD Dei Optimi Maximi religioni, & Sanctæ Catholicæ Romanæ Ecclesiæ doctrinæ, bonis moribus, Principum juribus, Regiæque potestati adversetur, nec unquam docebo, nec publicè, privatimque propugnabo, neque litteris consignabo. In his, quæ ad rem pertinent litterariam, & Academiæ regimen, Magistratui dicto audiens ero. Regias Constitutiones, & Gymnasij leges, sanctionesque servabo. Regalis hujus studiorum domicilij, amplissimique Collegij Jurisprudentium (a) jura, & privilegia pro viribus meis tuebor, & asseram: atque in id impensè operam dabo, ut ne quid in his, alijsque omnibus detrimenti capiant.

Ego *Johannes Baptista Ferrerius*, ut his conceptis verbis præscriptum est, ita per hæc sancta Dei Evangelia spondeo, ac juro.

Præludium sequentis Formulæ.

SI qua vestra P. C. quæ mediocris nunquam erga me fuit, hodie remanet, & valet humanitas, etiam atque etiam rogo vos, obtestorque, ut hunc præstantissimum Candidatum *Antonium Franciscum de Zoppis* ita recipiatis, ut vestri patrociniij in hoc, quod daturus est doctrinæ specimine, maximum pon-

* A 3

du

[a] *Vel Theologorum, vel Medicorum.*

dus esse fateatur. Undecimus enim jam annus agitur, ex quo in Ticinensi Lyceo Pontificio, & Civili juri operam dare coepit, quæ studia summa animi contentione in Academia nostra prosequutus est, atque perfecit. Hunc igitur Patre dignum excellentissimo nostri quondam ordinis ornamento libenter tuemini P. C., eum enim invenietis reliquis, quos privatim audivimus hætenus, cunctis animi virtutibus parem, sed exactâ diligentia, longo, multoque studio potio-rem.

F O R M U L A Q U I N T A

Missionis honestæ

*Pro Antonio Francisco de Zoppis Protopræsidis F.
Cherij postea Iudice.*

QUUM Academia nostra post varios casus splendori pristino restituta, hoc te honore dignata sit, ut divini, humanique juris à te studiosè peracti nobile dederit testimonium, eo nomine & tibi gratulari debemus, & nobis lætari, quòd illa speratos jamdiu fructus earum afferat doctrinarum, quibus nulla humano generi possit esse melior, utiliorque. Nihil enim illustrius, nihil ad laudem, decusque tibi contingere potuit optabilius, quam ut primus sis, qui de Patrum consilio, novo, præclaroque decreto in Pontificio, Civilique jure missionem honestam obtineas, & velut publicæ, privataque Justitiæ custos, & Sacerdos pro concione renunci-eris. Hujus ergo

ergo rei causa pileo, veluti quodam apice muneris, & honoris insigni, caput exornatum: quod, ut publice promeruisti, sic ejus gestandi publicam habeas potestatem. Ast quoniam nihili ducimus sanctissimas didicisse leges, nisi vox illa tua, quæ non sine crebris, eximisque laudibus in Gymnasio semper audita est, in foro Reipublicæ utilitati, pluribusque saluti sit: causas orandi, & juris in Colonijs, Municipiisque dicendi tibi potestas esto, quam inde factam ex hac, qua te induo, toga, omnes intelligent. Quanta vero Reipublicæ in te fiducia sit, ex hoc ipse cognosces, quod hos libros tibi bono publico referandos, tuæque declarandos sapientiâ trado; his etenim divina, humanaque jura continentur, & publica, privataque cuncta reguntur, & gubernantur. Quid ergo muneris tui sit, tecum ipse dispicito; tantum te hortor, & moneo, ut quemadmodum hæc tuæ curæ, tuæque prudentiæ sunt permissa, ita quæ communi suffragio recepisti missionis insignia majoribus in dies augeas ornamentis, ut illa tibi, posterisque decora semper, & ubique sint *Claudio* nomini gloriosa. Cui prisca claritudine nobili tandem ea de causa congratulamur, quod per te deinceps futurum credimus, ut vetusta & pene obsoleta renoventur exempla; sicut enim Nervam Filium Nervæ parentis jurisperitissimi viri successorem doctrinæ, virtutis imitator

rem Romani veteres sunt admirati, quum iste juvenili satis ætate civium necessitati, commodisque consuleret: sic, quod optime tibi eveniat, illustrique familiæ, non modò cives, & exteri, quibus adesse, proficere paternum, avitumque censueris, sed Pater tuus Præses excellentissimus sacri, profanique juris cum primis consultus te *Franciscum Antonium* juvenem admodum hac potestate, quam accepisti, & ea, quam deinceps habebis, auditurus est ipse vivens, ac videns de jure, bono publico respondentem.

F O R M U L A S E X T A

Ejusdem argumenti.

Pro Petro Bertramo.

Sæpe vestri ordinis P. C. in me sum expertus humanitatem, quod mea, quæcunque illa sint, à vobis probari, non obscure cognoverim. At nihil ex hujus Collegij sententia mihi jucundius accidere potuit, quam ut *Petro Bertramo* ornatissimo Juveni honestam decerneretis à studijs missionem, & quem ego primum juris institutis privatim instruxi, primis honorum insignibus jussu vestro, vestroque judicio, publicè meis manibus exornarem. Vobis igitur pro egregijs in me beneficijs, quas possum, maximas habeo grates: tuque *Petre Bertrame* candidate letissime macte virtute esto. Hanc vero togam laboris præmium tui ab eo te suscipere jubeo, à quo primum cruditiæ, ac liberæ juris.

risprudentiæ hauseris elementa. Hoc pilcum capiti impone, quæ Sacerdotij illius velut insulæ sint, quod Reginæ, ac Servatrici Justitiæ Jurisconsultos gerere convenit, ut quemadmodum te sanctioribus imbui æqui, ac boni mysterijs, sic majoribus à nobis Themistæ sacris non ullo profano, & horrendi carminis ritu, sed ex indictis Pontificiâ Regiâque potestate sollemnibus initieris. Ejus non ambigua, & falsa responsa, qualia dedisse fertur, quum Regna, tripodalque teneret, sed veritatis, & sapientiæ plena ut promere poteris sis, hos libros adito: ex quibus certiora Reiquepublicæ utiliora sumentur oracula, quam ex Phæbi cortina, vel Sybillinis illis, quos adire, præter Decemviros, apud vanæ superstitionis alumnos prisca religio fuit. Idque postremo meminisse juvat, te ei deditum sapientiæ, & quasi devotum, quæ, si ab alijs arceat injuriam, in suis nec patitur lædendi suspicionem; sitque turpis, honestique quaestus juxta impatiens, ac inimica, ubi rem sanctissimam pretio venundares. Non odit justa compendia: non exigit; & quæ bene studium collocando mereris, petens amitteres. Nullum demum pretium operæ pro Civibus tuis impendendæ, quàm quod beneficia requirunt; quorum ea est natura, ut statim ac mercedem repossas, intereant.

FORMULA SEPTIMA

Ejusdem argumenti

*Pro Josepho Comite à Castronovo**Nunc in Collegium Jurisconsultorum adscripto.*

SI in conspectum vestrum P. C. tales sæpe adducam Candidatos, qualem *Josephum Comitem à Castronovo* videtis ad certissimam spem vestrarum laudum, & publici honoris perductum, nunquam videar aut Regis expectationi, aut Academiae desiderijs, aut populi votis, & utilitati defuisse. Quem enim Adolescentem virtus, & Charites quoque ipsæ, castæque Veneres magis adornent, raro visuri estis P. C. & in hunc Prolytarum ordinem rarius adscituri. Quoniam ergo vos cum in hunc numerum cooptandum censuistis, universus hic doctissimorum virorum confensus, omnesque, qui hactenus prudentiam, sedulitatem, scientiam: omnes, qui suavissimos ejus norunt mores, & vobis gratias, me auctore, agunt, & hac etiam de causa vestri judicij æquitate, & sapientia gaudent. Agedum igitur *Joseph Comes à Castronovo* tuæ scientiæ cum omni virtute conjunctæ honoris debita cape signa; quibus ex Academia in Fora, Præfecturas, conventusq; omnes litteratorum togato, & pileato tibi prodire liceat. Hæc enim toga pura illa quidem, ac simplex initium tibi futurum est earum dignitatum, quas Magistratuum prætextæ, curulesque sellæ præferre solent. Et si plu-

pluris faciendæ sunt animi, quam corporis vires: pluris mentis acumen, & morum gravitas, quam manus robur, ac vis, nemo negabit, majorem tibi gloriæ accessionem ex hac toga, pileoque factam, quam ex aureis illis coronis, ac militaribus ornamentis, fortissimis olim bellatoribus accessisse videatur. Multum enim interest inter sapientiæ, fortunæque pericula; hæc namque forti, & audaci, strenuo, ac temerario promiscua possunt esse: illa ut fiant, nisi docto & prudenti, diuque multumque in his priscorum sapientium disciplinis versato, acuto itidem, atque sollerti, religioseque jus, fasque colenti [quod ex his libris exprimendum est] à Superis immortalibus haud facile datur. Tu igitur spe, & honoribus auctus studia prosequere tua: vosque P. C. juvenem præstantissimum in summi petitione gradus honestare decreto honorificentissimo pergite.

F O R M U L A O C T A V A

Ejusdem argumenti

*Pro Carolo Hyacintho Boleono in idem**Collegium adleſto.*

Optare profecto unusquisque vestrum deberet P. C. ut similes *Carolo Hyacintho Boleono* spectatissimo Candidato, omnique virtutum genere cumulatissimo Juveni ad hos aspirarent honores: ita namque fieret, ut ætas hæc nostra haud minus felix illis temporibus esset

esset, quibus Academia Taurinensis alumnorum suorum famam nulli secunda videbatur. Quid enim est P. C. quod in hoc juvene sive sacrorum, sive civilem disciplinam consideratis, desiderandum supersit? An sententiarum pondus, an responsionum eruditio, subtilitasque? an rerum copia: an morum veterum, novorumque scientia, an ornamentum non vulgare, & splendor orationis? Neque hæc fortasse miranda; habet enim, quæ imitetur, domestica exempla: habet *Raphaëlem Stephanum Boleonum medicinæ Professore egregium*, cujus in dicendo gravitas, & venustas clarior semper evadit, quem laudibus quum prosequi haud possim, gliscente scriptorum suorum gloria debet esse contentus. An qui designatum hunc Prolytam effuso studio literaria curricula conficientem, admotis veluti calcaribus, extimularit impulerit, non fuit tertius *Joseph Antonius Medicinæ Candidatus optimus* tertia sane spes eruditæ familiæ? Ita nempe Superis propitiis, ac volentibus factum videtur, ut inter duos de rebus doctissimis disputantes, differentesque germanos, *Carolus Hyacinthus Boleonus* Juris ipse peritus, quasi fraternæ virtutis judex, arbiterve sederet. Ne sane tanta doctrinæ concordia, atque conjunctio publico frustretur laudis testimonio ex amplissimi Collegii nostri decreto honoris ergo te à studiis missum esse, denuncio, iisque omnibus dignitatibus habilem, quibus gerendis

dis Pontificis Maximi , Regis Augustissimi, cæterorumque Principum sanctiones hujus ordinis studiosos idoneos , habilesque fecerunt , ac fecerint. Exinde liberalis pilei , togæque Academicæ tibi potestatem facio, quo veluti stipendio auctoratum , & in eruditorum Juvenum societatem , conventumque te cooptatum ex formula scito. Hi demum libri tibi erunt ejus , quam accepisti , præcipua potestatis insignia , quibus non terror incutitur animis, ut prælatis fascibus, exercitisque gladiis , sed fiduciæ, inermisque Justitiæ signa tolluntur, inopibus, vexatisque [quos ubi dolus valeat, & impotentia, bono juvare consilio, ac tueri debebis) præsto semper , & extemplo adfuturæ.

FORMULA NONA

Ejusdem argumenti,

Pro Carolo Antonio Bozotto.

Qui otio, ac libidini student, ideo a via laboris, & honestatis declinare creduntur, quòd illa læta , facilia , commoda putent, hanc ærumnarum, tristitiæque plenam, curisque velut obseptam. At nunquam virtuti defuit vera voluptas, quæ magis mulcet , & allicit, quo magis est felicitis animi propria, & sine vitiorum, malorumque contagione, mortalium allabatur animis, interiorique mentem, sed suavissimo sensu delectat. An ullo censeam sinceriori gaudio perfundi posse hominum pectora, quam eo, quod ex sapientia
pro-

profluit, quam observantes & Deo, & patriæ, & amicis, & nobis haud inertem vitam ducamus, cunctis innoxiam, pluribus utilem, & quantum ad nos attinet, de humano genere non male meritam? Ecquænam diuturnior, puriorque voluptas, quàm quæ virtutum tuarum memoriâ transferri possit in posteros? Veruntamen hæc [ut exempla vetustiora præteream] tibi *Carole Antoni Bozotte* minime latent, qui ad hunc lætissimum diem ut pervenires, socordiæ nunquam indormiens, tot pervigiles traduxisti noctes. Non hæc tot sodales ignorant tui, qui ad studium, & civilium disciplinarum amorem nihil sibi fecere reliqui. Nunc tibi, & illis, quod bene eveniat, cape pretia doctrinæ, habe laborū præmia, togam, pileum, & hæc sanctarum legum reclusa volumina; quæ, & acceptæ dignitatis insignia sint, futuræ tuæ sollertiæ auctoramenta. Quum hæc autem consequutum esse, memineris, animo id quoque voluta, quomodo hujus diei lætitiâ, qua delibutus exinde recedes, crescente virtute, & majoribus impetratis honoribus, facias auctiorem.

FORMULA DECIMA.

Ejusdem argumenti,

Pro Mathia Bellino.

B*ellinorum* virtus non hodie primum eluxit P.C. scit enim Academia, cognoscit patria, nec ignorat Europa, quantum illorum industriæ sit tribuendum. Noster itaque digna
sc,

se, digna Lyceo facit, suisque digna majoribus, quòd sollertissimam jurisprudentiæ navet operam; cujus rei causa possideat Academica præmia, addatque veteribus familiæ titulis nova nomina. Mittatur ergo honoris causa *Matthias Bellinus* a studiis, pileum, togamque capiat Juvenum doctorum insignia. Libris publici, privatiq[ue] juris fontibus potiatur, & unde familiæ decus accessit maximum, ipse scribendo, meditandoque famam, & utilitatem hauriat, & honores.

FORMULA UNDECIMA.

Ejusdem argumenti,

Pro Horatio Cottalorda.

HOc, quod caput tuum velaturum est, pileum communi Patrum decretum imperio id cunctis ostendet, tanti apud amplissimum hoc Collegium virtutes fuisse tuas, ut dignæ prudentium laudibus, dignæ publico munere censeantur. Civilium honorum ingressus, atque primordium ex hac tibi toga futurum est, quod indumentum eorum proprium, qui Rempublicam gerunt, te muneribus publicis aptum, habilemque declarat. At qua potissimum causa hisce fueris ornamentis donatus, hæc præferunt aperta volumina, quorum arcanam sapientiam non vi corporis, vel ope fortunæ quisquam expresserit, sed ingenio duce, ac viam præcunte labore solis illis rectè promere datum est, qui veritatis amore Orbis terrarum præsidem Justitiæ

fo.

solum observare, solum colere consueverint. Quæ igitur ab hoc Collegio præmia tibi delata sunt, ita suscipias, ut maiora promereri in animo tibi sit; ita tuearis, ut hæc data esse *Augustissimum Regem*, cujus auctoritate, & iussu hæc omnia geruntur, nullo unquam tempore, vel modo poeniteat.

FORMULA DUODECIMA

Ejusdem argumenti,

*Pro Josepho Ignatio Abbate Bellino Mathiæ Fratrem
nunc Vercellensi Canonico.*

PLura sunt, quæ mereri *Abbas Belline* debuisti, antequam in Prolytarum tabulas nomen tuum relatum, inter optimorum juvenum bene de jurisprudentia meritorum nomina conspiceretur, multos exantlare labores, multa perferre. Quibus factum est, ut nos Candidato meritissimo hos honores detulisse certi simus, & tibi post diuturnam expectationem hæc insignia futura sint gratiora. Pileum præstolabare; & illud ea de re tibi decretum agnoscis, ut frons illa, & caput condecoretur; ex quibus multus pro litteris, & Juris scientia manavit sudor. Libris jugiter institisti æqui, ac boni custodibus; eosque pro concione recipies; Neminem enim alium magis hæc volumina decent, quam illum, qui per vestigandæ veritatis cupidus, raro sine libris, & pugillaribus est visus. Toga, si ulli conveniat, cui magis debetur, quam ei, qui, & virum, & Jurisconsultum iuvenis, agit? Ma
gna ;

gna hæc quidem si potestatem spectes, quæ tibi conceditur, at longe maiora virtuti servantur, si speratos illa fructus asferre perrexerit. Rara felicitas temporis, quo semper mercedē virtutis comitem videre possis!

FORMULA TERTIA DECIMA

Ejusdem argumenti,

Pro Johanne Comite Capris a Castromonte.

NUnquam P.C. & huius Academiæ claros honores, & vestra beneficia melius collocata fuisse putem, quam in hoc Candidato clarissimo his dignitatis insignibus amiciendo; quæ, si merita recte perpendimus, jam olim huic debita erant, si Juvenis præstantissimi desiderium, sæpe, multumque flagitanti serius, quam par esset, concessa videantur. At sive propria id acciderit, sive communi quadam Juventutis necessitate, vestrum semper laudandum consilium censeo, quod hæc signa virtutis, & honoris nisi, qui plurimis laboribus, vigiliisque diu, multumque in optimis hauriendis artibus desudaverint, non concedere consuevistis. Quamobrē hoc tu pileum *Johannes Comes Capris* nobilissime Juvenis, hanc togam induito, non inane quoddam, ac ludicrum ornamentū: at sollertiæ, at virtutis, at sapientiæ symbolum, atque mercedem: illāque propalam utitor eo modo, quo prisci Quiritium, a quibus jurisprudentiam accepimus angusti clavi tunicam alterius ordinis viris impertiebant, ut simul intelligas

esse aliud, quod ab hoc Collegio sperandum tibi supersit, ut tandem Jurisconsultorum, & Patrum in numerum adsciscaris. Et quæ laborum tuorum causa fuit, rerum omnium moderatrix jurisprudentia, hæc decoris, hæc laudis, hæc illius, quam tibi deinceps parere debes, origo sit gloriæ. Hos quoque libros sanctarum legum evolito: ex his responsa civilis edito sapientiæ, quæ deinceps in Recuperatorum, Duumvirumque subselliis expromere queas. Id autem omni studio, ac omni diligentia curato, ut quod frequentis Academiæ sententiâ est hodie declaratum, recte, ac ordine fecisse te, quod honestam studiorum perieris missionem, hoc in summi, supremique gradus petitione primo quoque tempore, majorique cum laudum tuarum accessione, & cumulo censeamus.

FORMULA QUARTA DECIMA

Ejusdem argumenti,

Pro Constantio Celebrino.

SI, quod est in fabulis Pollucis exemplar fratrem divisa secum immortalitate frui malentis, atque inter sydera micare, quam tota se beatitate felicem æterna luce splendescere, vanum potius alicui, & Poëticis solum decorum fabulis commentum effectum temere videatur, quàm pulchra Fraternalis caritatis imago, *Constantium Celebrinum* consideret ista petentem, quæ diu neglexit insignia litterarum. Maluit enim eruditissimus Juvenis, cui
divi-

divinitus contigit id, quod rerum humanarum est optimum, ut ejus quamquam aliunde notissimi notior esset virtus, quam nomen inter gregarios Academiae milites agere, quam honoris prerogativam, ad quam plurima eum merita vocabant, germano natu majori praeipere. Cujus exemplum, quamvis haud in magno negotio, quod ipsa semper cum virtutibus caeteris pietas adolescat, humano generi conducibilius arbitror, quam per Romulum, Philadelphum, Persea, Caracallum gesta, historicis monumentis nobilitata quidem, at caesorum fratrum sanguine contaminata, & barbaricis foedata sceleribus violatae naturae. Nunquam ego lubentius de his praemiis constituisse vos arbitror, quam ut haec docto, proboque Candidato decerneretis, majora quoque daturi, ni studiorum potius tempus, quam illis querenda doctrina deficeret. Jubentibus ergo Patribus, & una gratulantibus, suscipe pileum, & libros; quae plurimis satis grandia vittutis pretia sunt, tibi maiorum velut atra, ac sponsio praemiorum. Quae ne uno Senatus nostri consulto conferantur si leges vetant, quod vetant, non tollunt, at differunt. Nec gloria caruerit allata dilatio; quippe si maturae virtutis in longum mercedem trahas, meritis mora ipsa crescentibus prolatata praemia vix paria reputantur.

FORMULA QUINTA DECIMA

Ejusdem argumenti,

Pro Carolo Octavio Avenato Senatoris F.

PARUM si dixerō P.C. in *Caroli Antonii Avenati* adolescentis eximii commendanda sollertia, non id puteris Candidato plurimæ scientiæ tribuendum. Nihil enim foret, quod meritò de hoc prædicare non possem. Ingenii, & prudentiæ splendor simul emicuit. Nec ei defunt exempla domesticæ sapientiæ adhuc in communi hac luce spirantia, & futura fortassis apud posteros in illustrium virorum memoria clariora. Id mihi propterea velim attribuatis, qui, dum juveni pileum doctrinæ insigne concedo, togam eundem jussu vestro induere jubeo, librisque divini, ac humani juris ejus in studiis diligentiam memorari, ac juvari significo, vobis in omnibus morem, Patres consultissimi, gero. Exercitationibus fessi continuis, brevem (an fallor?) orationem cupitis? Habetote brevissimam. Hæc ætas extulit adolescentem æmulum paternæ integritatis, ac laudis, avidumque gloriæ sæculi sui. Quod reliqui proferam, nihil habeo; nam quod ad te Adolescens, & patrem clarissimum attinet, hanc mihi veniam date, si malim hæc dotes vestras subticere, quam loqui. Apud tales, idest acutos viros, & sapientes, non minus in pretio virtus est, quod vel coram laudetur parce, vel voce silente, probetur.

FOR-

FORMULA SEXTA DECIMA

(Ejusdem argumenti,

*Pro Josepho Philiberto Balbis Canonico**Maurianensis Ecclesie.*

Pilleum, togam, & libros tibi de Juris prudentia benemerenti, *Joseph Philiberte*, Senatus nostri consulto, sed ex Regia auctoritate concedo. Dixi: nihil vos moror, Patres, si ita videatur, discedite. Vos, quod vestrum, ego, quod meum erat, absolvi. Insignia Juveni non insipienti dedimus; satis illa ex seipsis illustra, si jure debita. Prævertit ista, decoratque virtus; denunciant illa virtutem. Ast nascentis doctrinæ sunt ista decora; quid, Prolyta, adultæ promittatur, intelligis: hæc ad majora specimina, si mihi credis, semper allicient, semper trahent; nobis aliquid ultra concedere fas non est. Ita tibi in posterum optima quæque agendi locus erit; nobis dandi majora. Sic itaque [te hodie hoc pollicente] vivemus, quasi tua, & nova merita præstolantes: tu nostra præmia sic præstolare, quasi ob hæc vivas.

FORMULA DECIMA SEPTIMA

(Ejusdem argumenti,

Pro Johanne Gulielmo Cassini.

Plerique P. C. tales præstitere se se, quales ad Jurisconsulti exemplum compositos requirimus Juvenes. Quem tamen inter tot Candidatos uno *Johanne Gulielmo Cassini* Candidato notæ virtutis dixerim in schola, & vobiscum magis assiduum, vel qui attentius,



ac sollicitius se disciplinis civilibus asservuerit ? Ego quidem puto nullum fuisse Academiae experimentum in hac sapientiae sede perfectum, in quo non eum conspexerimus modò, sed & suam non simus attentionem, diligentiam, curam, vigilantiam admirati. Quid plura ? Multi fortassis inveniuntur, quos Jurisprudentiæ, ut sic dicam, intime tangat amor, nemo tamen illum signis, factisque magis declaravit. Jure propterea, meritoque Juvenis bonis artibus addictissimus in eorum recipiatur ordinem, quos hactenus suspexit, ac frequentavit. A studiis honoris causa misso togæ gestandæ perpetua potestas fiat; ei nempe, qui nihil omisit, quod pertineat ad studiosum, quo diligentior nemo reperiatur. Pileo veletur caput optimis, saluberrimisque præceptis imbutum. Dentur discendi cupidissimo libri, & præmium simul, & materia laboris. Cuncta demùm honorifica tribuantur, qui cuncta passus incommoda studiorum est, & qui hæc accipit, sed cumulos doctrinæ fructus mox redditurus.

FORMULA DECIMA OCTAVA

Ejusdem argumenti,

Pro Michaële Angelo Comite Mazzetto.

MAjores nostri P. C. ætatem ita divisam voluerunt, ut quum homines certam ejus partem attingerent, virilem togam sumerent, auspicatò tamen, ac rebus divinis factis, ut rerum bene, & fortiter gerendarum

rum initium à Superis immortalibus repetere viderentur. Melioribus nos auspicijs togam induimus, quippe non ætati illam tribuimus; sed virtuti, & hanc non ex corporis habitu, & robore, sed ex mentis acuminē, & viribus æstimamus. Hoc modo clarissimo Juveni togam hodie concedimus, quæ non adultum eum esse ostendat, sed Virum. Pileum nos addimus neutiquam operiundo capiti, sed honorificis Academicæ dignitatis exuvijs exornando. Libros potissimum adhibemus; nam quod viro litterato, & Jurisconsulto insigne præclarius? Quodnam Juveni studioso ad discendum invitamentum præsentius, aut utilius instrumentum! Hisce *Michael Angele Comes Mazzette* potitus, quid habeas, scis, quidque sperare possis, habes: majora sperato, sed ita, ut, dum illa speras, ea studeas ut assequaris.

FORMULA UNDEVICESIMA

Ejusdem Argumenti,

Pro Dominico Antonio Morello,

In Jurisconsultorum Collegium cooptato.

QUum publico disputationis periculo in ea, quam de te privatim coepimus, spe, hodie nos adeo confirmaris, ut Patrum sententiâ tibi honesta studiorum missio sit decreta, quo testimonium tibi perhibeatut virtutis egregiæ, hoc pileo te *Dominice* dono, quod suscepti pro re litteraria laboris præmium sit, & insigne gloriæ apud posteros

immortalis. Togæ quoque gestandæ tibi facio potestatem, quam moribus, institutisque nostris nulli Juris Candidato induere licet, quin causas orandi, Præfecturas sine fraude petendi, illaque bono publico administrandi Jus habeat. At quod omnium caput est, & præcipuum, hæc tibi pervolutanda civilis scientiæ volumina, & explicanda permitto, ex quibus pro Reipublicæ salute, & regimine, pro privatorum utilitate, & commodo, æqua consilia, & decreta sumenda sunt; neque tamen verendum tibi, ne in vulgares, humanoque generi noxios incurras errores, ubi veterum illorum expresseris disciplinam, qui universum pene terrarum orbem ad optimas leges, & instituta ita composuerunt, ut accepta præceptis eorum æquitas, justitia, & humanitas ipsa referenda videatur. Tandem, quod Deus volens propitius vertat bene, te hortor, & moneo, ut civilis hæc ornamenta virtutis majoribus auctibus augere pergas, ut Academia summis honoribus prosequatur alumnum egregium, & civem te Respublica sentiat utilissimum.

FORMULA VICESIMA

Ejusdem argumenti,

Pro Ignatio Cavallerone, postea Verruce Juridico.

Nihil tam conjunctum prudentiæ civili quum sit, quàm Pontificij juris scientia, ut vix ille rectè dicatur Jurisconsultus, qui non utramque sequatur, bene tecum actum

actum puto *Ignati Cavallero* genere, ac doctrina spectabilis adolescens, si Patres post decretam civilis juris missionem te quoque sacrarum legum honore dignentur. Hoc itaque pileum, quod iterum suscipis, sit ejus, quam accepisti, dignitatis complementum; nam publici juris enucleandi potestatem illi addidisse æquum fuerit, qui studia studijs augeat, laboribus labores accumulet. Parum tibi fuit humanas nosse leges, nisi divinas quoque posses interpretari: hæc igitur cape volumina: munere fungitor, & sacri Juris, quod cætero præstantius est, sensa disquisiturus in Pontificum recipitor adyta. Demum hanc togam, quam suscepisti, sic gerito, ut nunquam obliviscaris divini, humanique Juris Prolytam creatum, quæ Divino, quæ humano comprehensa sunt jure, non modo scire debere, sed ab omni violati divini, humanique Juris macula abesse.

FORMULA VICESIMA PRIMA

Ejusdem argumenti,

Pro Carolo Pelliono postea Leinici Iudice.

SErò tandem tibi conceduntur honestæ missionis insignia: at conceduntur tamen. Non equidem tam laboriosum fuerit ad hæc adspirasse, quam hæc consequutum semel, ac tandem esse, gloriosum. Eluxit doctrina, eluxit modestia, & labor eluxit, quibus omnibus ducibus, tibi hæc, & majora comparantur, quò tardius con-



concessa, eò illustriora. Pileum, & togam accipito nulli magis debitum, debitamque; Quidni & ista dicam, quæ commemorantur ab omnibus? Superat tua virtus invidiam, Libros hos demum accipe, quos sociorum tuorum nemo magis fortasse pervolutavit. Hæc equidem exantlatorum à te laborum præclarissima signa: hæc (dum tibi jure optimo conceduntur] alijs, qui te imitari debent, acerrima incitamenta.

FORMULA VICESIMA SECUNDA

Ejusdem argumenti,

Pro Josepho Matthæo Comite Vialardi.

NEque doctrina, neque meritis destituetur *Josephus Matthæus Comes Vialardi*, si hoc brevissimo tempore laudibus, & Oratore destituatur. Ita namque censeo P. C. ut solem, sic virtutem, ut aurum, sic viri scientiam sua luce, pretioque contentam esse oportere. Fecit operæ pretium, qui, nulla quoque mercede, benefactorum præmium in sola conscientia collocavit. At huic quamvis verbis nostris nec adornata non desunt insignia, pileum, toga, volumina; exinde caput, humeros, manus clari moribus, & sanguine Juvenis domi, & foris honestatura. Quod Oratoris munus erat, ista præstiterint. Nam si à vobis hæc ipsa decreta, hoc pro summo præconio fuerit, non immerenti vos detulisse. Ergo si Candidati dotes ista sub omnium aspectum ponere queunt, si in Academia

demia, si in foro peræque nitent, honorant, illustrent, quid amplius agam, vos ego morans nihil acturos? Intelligo P. C., & sinam, ut actâ quasi fabulâ, spectatores Juveni plaudant, & conventus, me tacente, discedat.

FORMULA TERTIA ET VICESIMA

Ejusdem argumenti,

*Pro Carolo Uberto Abbate Malpassuto à Montilio,
postea Casalensis Ecclesiæ Canonico.*

Non mihi eam Superi dedere mentem P. C., ut homines, vel ob fortunæ beneficia, vel ob naturæ munera laudarem. Quæ namque sunt viri partes, ubi nobilibus se se parentibus ortum, ubi copijs affluentem, beatumque se prædicet? Porro nihil facilius in hujus inauguratione Candidati, quam nobilitatis suæ decus, & cumulum honorum expromere. Ullumne ex ijs, qui præcesserunt eo nomine, crediderim præstantiorem? At hæc omnia, vel non sua, vel plerisque communia; illa, lectissime Juvenis, propria, & quasi privata, doctrina videlicet, & virtutum in adolescente prima, modestia. Hac summis æqualis: illâ nulli secundus: hæc fundamentum excelsæ nobilitatis, illa generosi pectoris ornamentum: hoc utriusque rarissimo foedere magis gratum, ac spectabile nihil. Quum ergo hisce virtutibus æquales longe superaris, optimo Jure honestæ missionis decora tibi permessa, pileus nempe; quo præsertim ornatu Juvenem gloriari de-

decebat, qui præstantis ingenij sodalibus ijsdemque nobilibus famâ præivit. Quid in Urbe, & in otio claram natalibus juventutem agere deceat, hoc exemplo cognoscat. Ex libris, quibus de more donaris, discent plerique nobilium, quæ tandem civilis sit disciplina, quam innumeri profitentes, assequuntur pauci, non copijs ex venali scientia inhiantes, sed virtutis, & laudis, si cætera desint, lucro contenti. Toga, qua nunc amicis, te ea prudentem ætate circumdat, qua levia, & præter modum jucunda complecti cunctis impunè, multis loco dexteritatis, aut magnitudinis animi fuit. Et utinam voluptatum remissiora, & sapientiæ studia forent intentiora; non tam enim rara vera laus videretur, nec virtutum nomina vitijs imponere cogeremur, nec illas in veteribus, maioribusque commemorare posse: vino, somno, ludo, libidini studuisse, ea nunc ignavis, foecordibusque nobilitas esset.

FORMULA QUARTA ET VICESIMA

Ejusdem argumenti,

Pro Francisco Bernardino Bruno.

Virtus P. C., quæ nunquam à labore sejungitur, ita nutritur, & crescit, ut præmiorum spe vires in dies acquirat, donec sua firmata robore, nec spe, nec timore mutetur. Nec ullum magis Juvenum virtuti prospexisse Rege prudentissimo censeam, qui longo intervallo restitutis varijs honorum generibus

neribus, operâ vestrâ sive recens illam naturam, sive paullo grandiore, sive florentem, & optimos producentem fructus apto veluti pabulo sustentat, & alit. Quarum rerum ergo non solum providentiissimo Principi, quod opus absolvere properet, sed & vobis gratiam studiosa Juventus habere debet, cujus laudi, & commodo, cujus famæ, & gloriæ, diligentia, sudore, doctrinâ consulitis. At si quis grati animi signa erga vos ostendisse videatur, is profecto putetur *Franciscus Bernardinus Brunus* nec immodestus Juvenis, nec imperitus. Hunc equidem suorum meritorum immemorem solâ gratissimi beneficii vestri recordatione devinctum, obligatumque dimittitis, quippequum, & quod est, & quod futurum se fore sperat, totum vobis debere prolixè, cumulatèque fateatur. Itaque quod vos pileum, & quam togam ipsum à me sumere voluistis velut accepti muneris signum induit, & eximie in se beneficentiæ monumentum. Sic autem voluminibus istis utetur, ut eundem hæc à peritissimis Patribus accepisse, nunquam pudeat: vosque nunquam pigeat concessisse.

FORMULA VICESIMA QUINTA

Ejusdem argumenti,

Pro Carolo Botto.

QUod semper optasti tempus advenit, diligentissime Botte, quo & doctrinam tu ostenderes tuam, & nos Candidato multè
sol-

sollertiæ debita præmia jugi, constantique labore parta retribuamus. Ut nos ingenii tui vim, aciemque cognovimus, sic animi nostri judicia, quæ de te sint, hæc dona præferunt. Pileum namque, quod geres, liberalium disciplinarum studiosum te adeo in illis profecisse significabit, ut ex litterario certamine coronatus evaseris. At hæc corona pretiosior expectat, quæ dumtaxat conceditur illis, qui non inchoasse contenti sunt, sed perfecisse quod cœperint. Toga virum te esse demonstrat, quam te gestare, non raro conveniet; nihil igitur quod grave non sit, cave viro excidat tibi. Nullo tamen præstantiori signo declarari doctrina potuit, quam libris istis, qui te illam nactum esse designant, ac deinceps adaucturum promittunt. Vale propterea Juvenis familiæ decus tuæ, & ita cœpta perfice, quemadmodum ominamur: teque incolumem serva Reipublicæ, literisque.

FORMULA VICESIMA SEXTA

Ejusdem argumenti,

Pro Francisco Flaminio Sanmartino

Comite ab Alladio.

Nobilissimo, studiosissimo, & Academiæ spectabili quondam, lectissimoque Rectori librorum, togæ, pilei munera deferuntur. Non fuerunt adolescenti volumina, non magistratuum hæc indumenta Juveni inusitata: nec si pileum diademati simile fecerim, incognitum verè fuisse dixeris tam electo generi

ri diadema. Quædamus igitur non nova, sed debita. Debit genio sanguinis indulgisse: debuit quoque suo. Nihil vulgare splendidissimus ille poscebat; at præclara, præcipuâ; magnis hic suapte naturâ studebat; præstantius quod exhiberet, in hoc litteratorum otio, in hac florentissima pace quid habuit? Percurrit honores congruentes ætati: non labori, non studio pepercit media [quod magis mirentur omnes] in aula. Ad id persequendum suo incitatus ingenio fuit, quod nisi moliretur, poterat Principis perspectâ voluntate perficere. Mirandum, & hoc posteris, novum nobis exemplum: ministrari proxime Principi posse, cuius domesticus, & nobilis famulatus incendat ad studia, & cui dum obtemperes, queas servire Regi, servire litteris. Non multum de suo commodo oportet esse sollicitum, qui sic imperat: nisi suum ad commodum revocet, quæ sit utilitas suorum, ac publica. Quis unquam ante vidit ex aula nobiles Juvenes secedere in Academiam? Quis unquam ex Regio splendore, lautitiis, munditiisque nasci viderat Musarum amorem? Quam bona nobilis esse debet Juvenis indoles, quem hæc non inescant; bonique Principis quantum valere debet nutus: quantum auctoritas, si mores Juvenum sic format, & expolit? Felices, quibus illa contigit: at utique feliciores, quibus sic imperatur, ut jussa & menti, & moribus, & societati proficiant.

FORMULA VICESIMA SEPTIMA

Ejusdem argumenti,

Pro Paulo Nigro.

SI unquam Academia nostra summorum ingeniorum copia redundavit, nunc profecto maxime laureatorum Juvenum studio lætatur, affluit multitudine, gloriâ triumphat. Sic enim vidimus otii fuisse sterile tempus, sic doctrinis abundans, ut quod tempus discernendis honoribus destinatum est [nec profecto est illud exiguum] integrum, si hodiernum diem excipias, summis dignitatibus afficiendi Prolytæ sumserit. Gaudeo tamen inter tot eruditos Athletas laureâ quasi Pythicâ coronatos, hoc pileum cum libris, & toga doctissimo juveni decretum fuisse, ut ne studiorum labore perfunctis semper delatâ coronâ, hæc abesset ab iis, qui in palæstra decertant una & merces, & stimulus. En igitur tibi hæc *Paulle Niger* ipsa detulimus: Candidato, ut nobis videris, rem cum sæculi vitiis, ambitione, voluptate, desidia gerenti. Hanc egregiè Spartam ornato: eam studendo palmam assequere; tunc mihi potior eris, quam in Græcia quondam sacris è certaminibus rediens Olympionices, ac Romæ triumphans. In ludo, ac bello superasse cæteros, quam domi semetipsum vicisse minus egregium est. Gloriosa sane victoria! Qui namque pugnares vicerint alios, plures: paucissimi sunt, qui se vicerunt, & vincant; pulcherrimum verò, quod

quod maxime rarum.

FORMULA VICESIMA OCTAVA

Ejusdem argumenti,

Pro Johanne Baptista Comite Osasco Cacherano.

CLaris, magnisque parentibus ortum Juvenem ea maximè decent, quæ vetustam familiæ claritudinem non obscurasse, sed magis auxisse videantur. Vana nominis species, & larva quædam inanis, ac fallax nobilitas est sine virtute. Quis enim ferat hominem gestis majorum clarum, quæ vel ignavia, vel turpitudine dehonestet sua? At splendida lucent illa, nisi tenebras vitiorum offundens ipsis defueris, quod te fecisse, clarissime Juvenis, videmus, atque lætamur. Ea propter Academico ornatu insignis habeberis, ut nobilis juvenus agnoscat, non tam decorari te nativa sanguinis claritate, quam illam propria tua luce fulgere. Ex libris istis, unde civilem, & sacram hausisti prudentiam, maius tibi decus accedit, quòd cœptus sis haberi magnis rebus idoneus; id quoque toga, pileoque portenditur, quæ nostris institutis, neque vana sunt signa virtutis, neque mendacia. Sic tua tibi servatur claritas, sic generi; labore, & virtute parta, sine labore, ac virtute deficiunt. Familiæ namque lumen, vera nobilitas, difficilius licet incipiat, quam cœpta custodiatur: subducto virtutum pabulo, nec unquam cœperit, nec unquam, præterquam in vulgi opinione, constiterit.

FORMULA UNDETRICESIMA

Ejusdem argumenti,

Pro Friderico Abbate Patritio a Scagnello.

QUam Patres, togam, quem pileum, quæ juris nostri volumina peramplo decreto, detulerunt, hæc tu *Abbas Patriti* apud studiosos omnes, ac in propatulo recipis. Modicus ne honos hic tibi putatur? Non te quid demus, reputare convenit, at quibus hæc destinata. Studiosis, probisque dantur: studiosum, probumque decreto publico declarari, si cui paruum contemtnumque videatur, hoc ipso sese contemnendum, & despiciendum jam propinavit. Quid? Alia fluxa, & caduca bona magni quis ducat præ fama, præ gloria? Nulla auri vis, nulla humana beatitas huic uni sit comparanda. Sed quæ, Superi, tandem est ista gloria? Quæ nempe fluit ex doctrina, atque virtute. Nunc abi, & aliud quære præstantius, aliud cogita melius. Nisi enim animo bono, & excello virtus sufficiat doctrinæ conjunctæ; &, quod illarum fructus est, clarum nomen, quid sat esse possit, & tu nunquam repereris, & ego frustra requiram.

FORMULA TRICESIMA

Ejusdem argumenti.

Pro Carolo Antonio Comite Bottilia.

MAGnum equidem P.C. & nobili dignum Juvene præmium illud est, quo virtus, & doctrina dignoscitur, & denotatur. Quid enim

enim aliud magis exposcunt generosæ Juven-
tutis animi, quam scientiæ, quam gravitatis
opinionem? Quare non parvi academica de-
cora sunt pendenda, quibus, quod bonum
ex omnibus est perfectissimum, sapientia
commendatur. His ergo, quum tu *Carole An-
toni Comes Bottilia*, condecoreris, quid quæso
est, quod ea, quam agis, ætate cupere magis,
honestiusque possis? En togam habes, & pi-
leum, quo legum matura peritia designatur,
illa nempe tua præcox, & pluribus nota pe-
riculis. Libros accipis sacri, profanique Juris,
in quibus cuncta penitus vivendi præcepta, &
Justitiæ dogmata quum exprefferis, hauseris,
ingentem gloriæ segetera sis inventurus.

FORMULA TRICESIMA PRIMA

Ejusdem argumenti,

Pro Paulo Apollinari Fantagutio.

QUod clarissimorum virorum testimonio,
Collegiique sententia ita te, *Paulle Fan-
taguti*, bene de nostra meritum Academia fuisse,
atque Jurisprudentiæ operâ navasse liquet,
ut dignus videare, qui honestam studiorum
obtineas missionem, hoc pileum olim liberta-
tis, nunc sapientiæ signum accipito, quo tam-
quam ovali, vel sacra minore quadam co-
rona caput tuum exorno. Hanc quoque to-
gam capito Advocatorum, & Magistratuum

insigne præclarum, ut potestatem tibi factam intelligas causas orandi, simulque cognoscas in municipalibus honoribus petendis tui posse rationem haberi. At quum hæc munera obire debebis, illud attendito, nihil scilicet à Jure alienum, aut profitendum, aut statuendum tibi; quam ob causam hos libros Romanæ sapientiæ fontes recludito, ex quibus optima quæque derivanda doctrinæ sunt, qua vel in Jure dicundo, vel in causis agendis utaris. Ad extremum huius Academiæ nomine tibi denuncio, ut maiora semper scientiæ pericula facias, quo tandem ad eorum te numerum adscribamus, qui summis ab illa acceptis honoribus, æternum nomen, & gloriam adjunxerunt.

FORMULA TRICESIMA SECUNDA

Ejusdem argumenti,

Pro Comite Gaspare Angelo Radicate.

Nemo fortasse P. C. aut studiosius, aut submissius à vobis hæc petiit, quam *Gaspar Angelus Comes Radicate* nobilis candidatus, cui me hercule nihil defuit, quo doctus juris Candidatus, quo optimus Juvenis polle-
re deberet. Nemini propterea justius ad hæc aditus patuit, quam huic uni, qui ut magis hæc promeruisse videatur, nihil se promeritum esse fatetur. Superata doctrina a modestia sit, an modestia scientiâ vincatur, satis ambigere queas, dummodò rearis utramque prudentissimo Juveni summam
esse.

esse. Hęc tamen præmia doctrinæ ex consuetudine dantur, cui sociam adfuisse moderationem magis laudabile fuit. Et pileo igitur, & toga induto in publicum prodeundi tibi facultas esto, ut quæ bene, & ordine postulasti, munera geras. Hęc autem verecundè, dum flagitas, decorem meritis adjungis; nam doctrinæ modestia sic est ornamento, ut ori honesto, & liberali ingenuus quidam, & virgineus pudor. Unde quoque tibi hęc omnia evenere, illuc te revoco: libros consulere jubeo, sapientiæ civilis origines: inde prima hausisti elementa, hinc perfectam legum scientiam habiturus. Meruit approbationem industria, meruit & pudor amorem; felix principium auspicatissimæ potestatis! Cuncta assequutus est Juvenis, quem, probi, & prudentes, & magni ducant, & ament.

FORMULA TRICESIMA TERTIA

Ejusdem argumenti,

Pro Stephano Julio Badino.

EXtremum prælij sperata victoria: victoriæ palma supremum est. Quid interest tantum in Jurisprudencia profecisse, nisi virtutis, *Stephane*, fructum aliquem expectasses? Neque incassum es præstolatus; en tibi pileum pro navata litteris opera impono: libros do: te quoque induo toga; hęc dimicationis tuæ expectata fuere stipendia, quibus potitus honores amplissimos opperiris. Nul-

la meta cupiditatibus, dignitatibus autem præscripta meta, ultra progredi nemo potest. Has tamen sic exoptato quasi nulla ipsis esset præscripta meta. Nihil non assequeris, ubi sic omnia concupisces: nihilque non bonum optabis, ubi contrarium acturus, dedecoris maculam exhorresces. Quamvis in prærupto loco virtutis, & artium ingenuarum templum situm esset, ad illud adires, imò advolares, desiderio, & metu comitibus. Hi segnibus quoque dant alas; ex ignominia namque timore, ex gloria cupiditate quid nascitur? Mentior, nisi virtus, & doctrina nascatur.

FORMULA TRICESIMA QUARTA

Ejusdem argumenti,

Pro Josepho Petro Francisco Buzano.

NON equidem præmia, si iusti semper fuimus, benemerentibus deesse debuerunt: Id perspectum vos habuistis, quum hæc P. C. Juveni præstantissimo decreveritis. Pileum namque, quod nunc impono, *Josepho Petro Francisco Buzano* vos concessistis. A capite exordior. Caput omnium honestarum cogitationum promptuarium fuit. Toga corpus ejusdem innecto, nobili videlicet omnium civilium potestatum integumento: hoc ejus alterum erit insigne, qui sudavit, & alsit doctrinae potiundæ causâ. Demum libri manibus dantur Pontificiæ, Romanæque Justitiæ, perfectæ nempe doctrinae causæ imperfectæ

sectæ præsidia. Hæc, Adolefcens, ne contem-
ne præsidia : hisce utitor scientiæ caussis.
Non insperata gloria sequetur, quem fre-
quentem hæc volumina spectatorem habe-
bunt. In hoc labora, desuda : inque hæc lu-
stranda totus incumbe. Hoc solo pretio nu-
meris omnibus absoluta doctrina compara-
tur. Vile sane pretium, quo nullo comparan-
da thesauro virtus, & sapientia comparatur !

FORMULA TRICESIMA QUINTA

Ejusdem argumenti,

Pro Ignatio Pelliono.

QUæ moribus, institutisque majorum
studiosis Jurisprudentiæ præmia tri-
buuntur, illa, *Ignati*, sic tibi debita sunt, ut
quæ sunt maximè ; neminem enim fugit
quanta tuæ sit doctrinæ, & eruditionis copia,
qualis dicendi candor, & integritas, quanta
Pontificij, & Civilis Juris prisclarumque re-
rum, quum sacrarum, tum civilium ubertas,
& peritia. Jure itaque pileum cape, quo, dum
honestaris, intelligis talem esse doctrinam,
qua polles, ut in hoc pulvere pro virili de-
pugnans coronam merueris, atque præconia.
Quam dispar corporis, animique victoria !
Vires ostentabant in arena Romani cum im-
manibus belluis digladiantes, integrâ famâ ;
si id non compulsi facerent : at *honoratos* ma-
culabat infamia ; (a) decertant in hoc sa-
pientiæ ludo vim mentis Juvenes exerturi,

[a] *Vid. l. 1. §. 6. ff. de postuland. & S. Cyprian. epist. 56. p. 93. edit. Benedic.* sed

sed nullo habentur in pretio, ni coronentur. Togatum deinceps prodire te posse noscito: & in eorum adscriptum ordinem, qui primordia Juventutis sic transegerunt, ut se se Justitiæ omnium virtutum principi, à Deo prognatæ parente, numinis administræ, ordinis matri, regiminisque præsidii dedicarint. Sacrorum, civiliumque librorum retrusa quæque enodandi, Juris ex lege reddendi tibi facio potestatem, quam sane rem ita Superi probent pijs faventes precibus, & fausta quæque propitiantes, ut tibi laudi sit, & Academiæ nostræ, & municipibus, quos jurisdictione regere poteris, semper felix, & fortunata.

FORMULA TRICESIMA SEXTA

Ejusdem argumenti,

Pro Honorato Camerano.

PLerumque illa homini laudi dari cognovimus, quæ ipsi forte fortunâ concessa deessent alijs, ingenio, & virtute præstantioribus; quod quum nonnulli faciunt Oratores, nesciunt non se se præconijs eos cumulare, de quibus ista dicuntur, sed quantumvis nobiles, ac locupletes celebrare viros ob res non prudenter, non fortiter, non in toga, non armis, non privatim munificè, non justè publicè gestas: quæ quum sint maximæ in illis, quos elatè isti despiciant, in ipsis ne mediocria quidem reperiuntur. Misera laus illa, quam non sibi mortales pariunt, sed ex majorum sepulcris, vel arca thesauri sanctio-

re quæritant; hi namque in sapientium vi-
rorum Republica egregiorum facinorum in-
opiâ dum premuntur, velut ostiatim emen-
dicare videntur inanem sanè gloriolam .
Quam contemnere fortis, ac sapientis arbi-
tror, eisque bene semper egisse, minimum
de se loquutos esse, duraturam famam con-
ciliasse non dubito, quum ex hominibus
nullum clara parentum nomina, vel magnæ
fortunæ bonum virum, prudentemque fe-
cerint. Ne igitur hodie à nobilitate, divitijs,
Honorate Camerane vir egregie, laudem expe-
ctato, sed quòd potius in tanta temporum
corruptela non desidiæ vacare, non vitijs,
sed moderationi, doctrinæ, severitati, procul
à domesticis commodis, à parentibus, à con-
juge, à liberis, studere conatus sis, Superisque
volentibus, quod molitus es, quoque perfe-
ceris. Interea togam, pileum, & libros, no-
tas quasdam sapientiæ illustres & inclytas ca-
pito; unde nonnullos æquo cum cæteris ju-
re vivere doceas, illos, inquam, quos viva
tuæ vitæ sapienter, innocenterque traductæ
exempla non moveant. Qui tandem si glo-
riam quærant à mortuis, non fumosum, at-
que pulvereum à cineribus majorum sibi
nomen trahendum putent, sed à gestis illo-
rum, quæ vel bello imitentur, vel pacis ar-
tibus vetustæ sapientiæ perfectissimum hau-
riant, in his libris præsertim expressum, quod
illis veram, perennemque famam conci-
liabit

liabit cum terrarum orbe dumtaxat apud mortales interituram.

FORMULA TRICESIMA SEPTIMA

Ejuſdem argumenti,

Pro Joſepho Vaſſallo de Vicendet.

L Ibenter id oneris mihi imponi permitto P. C. ut Candidatis in concionem prodituris, ac publicè verba facturis præſto ſim, quaſi vadem apud vos doctrinæ cunctorum, & veſtræ viciffim erga Juvenes ingenioſos humanitatis, æquitatiſque ſponſorem acturus. Quum enim diligentiffimos vobis, ac peritiffimos ſiſtere cuperem, ne mearum falſerem promiſſionum fidem, aut veſtram expectationem cluderem, vix unquam non adſtitere Superi votis; minime namque me præterit, quantum verſati fuerint in melioribus diſciplinis, quos, me ſuaſore, bonis avibus ab honores eveximus. Quorum in ordinem optimo planè conſilio *Joſephum* hodie referimus, cui ſuffragijs veſtris, ſuâque ſibi jam virtute quæſita, hæc ornamenta concedimus. Tibi propterea togam adoleſcens habeto, eâque indutum, & pileo, ut è numero ſtudioſorum te veſtis, & infulæ ſegregant, ita virtus, atque doctrina inter ſocios te tuos præſtantem, nobilemque faciant. Aſt ne deſit labori ſeges, & occaſio virtuti; voluminibus iſtis utitor, in quæ tota veterum ſapientum prudentia redundavit. Hæc ſunt, quæ Juvenilibus annis promeritus es: hæc
iti-

itidem sunt, ex quibus lauream illam, ad quam omnes bonorum, ac tui diriguntur affectus, & possis, & simul debeas expectare.

FORMULA TRICESIMA OCTAVA

Ejusdem argumenti,

Pro Petro Josepho Serotto.

Spectator tunè tantum *Petre Joseph*? alienarum laudum tantum auditor? Quid profuerit, privatim demonstrata virtus, nisi palam laudibus afficiatur, & præmijs? Hæc præstosunt, ac talia, quæ adhuc militi animū addant, nondum laurum adepto. Insigne tibi erit emeritæ toga militiæ, cujus munera in præfecturis geres, & commoda senties, Prolytis, idest honoris causâ missis à Principe destinata. Eat bellator ad sagam: tu illam gere, cui cedunt arma, & ad quam frustra miles adspirat, quæ pacis est signum, & otij litterariæ libertatis ornatus, cui pileum additum coronidem addit. At quorsum libri juris, nisi ut laborem doctrinæ conjungas? non iners otium, non obscura quies, ac segnis tibi promittitur: at clara, at negotiosa, at Republicâ digna. Interim ire licet, commeatum dæ, missionis addo honorarios codicillos; licet quoque volenti in schola versari, & quasi veterano stipendia facere. Modicisne contentus eris, an majoribus inhiabis? Agnosco quid capax polliceatur ingenium: conijcio quid meditare? Quæ pulchra, difficilia; nulla

nulla celsa virtus magno sine sudore, nulla summa præmia sine virtute; at laborum sunt hæc volumina incentivum simul, & pretium; minorum curarum præmia, & irritamenta majorum. Quid ambigis? ne studijs primo quoque tempore deesse velis edico; ne laurea tibi sollerti, doctoque desit. Quorum alterum in hac rerum conditione desidiosum; alterum, quod à tua indole alienum puto, Juvenis esset inglorij.

FORMULA UNDEQUADRAGESIMA

Ejusdem argumenti,

Pro Johanne Dominico Mainardo.

SI toga, quæ deinceps tuis pendebit ex humeris, si libri, qui subijcientur jugiter oculis, tegumentum denique, quod caput ornabit, illi hodie accedit honori, quem aurea crux exhibet dependens à latere, quid aliud ad dignitatem attinens magis optaveris? At cunctis tibi petito ne id desit, oportet, quo Prolytarum illa ornamenta ne alteri quidem cedant. Istam tamquam inclytum, & excelsum insigne sibi fortes, ac nobiles: illa clari, & docti viri sibi sumpsere. Utra alteris præstent, ambigitur. An tu postponas forti prudentem, militi doctum gladio calamum, robori scientiam? Utrique servis? Cave ne jurisprudentiæ deficias, si curas ne muneri desis. Magnum quidem pectoris hoc ornamentum, magnum & capitis. Si munus, quod suscepisti, ideo perficere coneris, quod

quod honori hoc tibi sit, doctrinam ne neglexeris, id enim est gloriæ. Imò & huic potius te servire fas est, quia fructus ex scientia diuturnior; et si licet quoquo modo differere, quòd ista tegitur, foveturque capite, robur manu exercetur, & clauditur pectore; magnum sane portentum est, subijci pectori caput.

FORMULA QUADRAGESIMA

Ejusdem argumenti,

Pro Vito Modesto Gerbaldo.

VIX recte coniecerim, an majori desiderio, *Vite Modeste Gerbalde*, hanc togam libros, & pileum, quæ tu recipis, exoptaris, an potiori jure missionis honos tibi verè modesto Juveni deberetur. Doctrinam tuam hodie ex hoc loco pœne loquentem audiebatmus: & desiderium nunc quoque videmus, quasi prospectans ex oculis: satis utrique pro merito fecimus. Sic autem doctrina desiderium semper exacuat, ac majorum rerum desiderium doctrinæ ministret, ut gliscat utrumque, donec perfectam sapientiam consequaris. Sic enim futurum est, ut summa, quæ flagitas, assequare. Nequicquam sine labore, præmiorum cupiditas animum tenet.

FORMULA QUADRAGESIMA PRIMA

Ejusdem argumenti,

Pro Vespasiano Deblandrate.

Quid tibi, Adolescens, cum hac toga virili

rili, cum præmijs hisce Academicis? Quid cum hoc pileo virorum integumento, cum libris seniorum ingeniorum oraculis? Imo quid mihi cum hac, qua utor, oratione? Tu adolescentulus, at ingeniosus: vix pubes, at doctus: vix Candidatus, & tamen omnium suffragiis, & laudibus exornatus. Prævertit ætatem matura prudentia, judicij maturitas adolescentiam, Nervæ Filij Juventuti simillimam. Togâ per me utaris licet, ut ea velut ex ephebis excedens, publicè possis in hoc loqui consessu virorum, & munera capere Prolytis obeunda. Pileo, ac libris potitor illis, vix concedendis ætati muneribus, at debitis maturæ doctrinæ. Miraculum, tantulo in corpore tantam potuisse reperiri virtutem!

FORMULA QUADRAGES. SECUNDA

Ejusdem argumenti,

*Pro Josepho Francisco Marchione Moroti
de Bianzeto.*

SI, quæ hic proposita sunt, honestæ missionis insignia, ulli jure data sunt, nunc profecto, *Joseph Francisce Moroti* inclyte Marchio, tibi merito decreta fuere. Ecquis enim te doribus omnibus clarior? Nihil erat, si antiquissima nobilitate, lectissimisque moribus, si mentis magnitudine, si prudentia in Juvenilibus annis virili florebas: nisi eloquentiæ, physiologiæ, & sacræ historiæ disciplinâ præstares. Omnia dixi, quum hæc
di-

dixerim ; imò parum. Multa hæc sunt : sed hæc multa non uni sufficiunt. Addam ergo , nisi & rerum humanarum , divinarumque notitiâ habereris insignis . Sic igitur eloquens, ut dignus sis, qui ab eloquentissimis lauderis ; doctus , ut à doctis magni tua æstimetur virtus ; prudens ita , ut dignus videaris, qui, vel Augusti, vel Alexandri tempore nascereris. Fallor; imò , ut hoc tempore nascereris ; an ne gloriosius quidem est eo sæculo nasci, quo doctrinam imiteris plurimum ubique florentem : an verò nascentibus doctrinis adjumento esse, præsidioque? Multa loquens complura reticeo ; sed hæc aliquando. Nunc accipe pileum illustrium tuorum gestorum præmium non sane maximum ; quis enim nescit tibi potiora deberi ? Togam induito Prætextæ prænunciam. Utramvis opta vel Magistratibus , vel Sacerdotibus debitam. Minus sperare mihi religio . Libros sumito, te dignum munus, sive causam respicis, sive auctores. Hæc sudata sunt studia nobilissimorum Romani Imperij ingeniorum ; tui ergo similia. In illis tu doctrinam non disce , sed perfice. Hæc terrarum Orbem ad humanitatem redegit , sapientia ; digna igitur , quibus continetur , ut hodie tibi tanquam præmium represententur. Sic æternæ tuorum studiorum famæ consulimus, sic Juveni nobilissimo , bonorum amico , doctrinarum cupido , omnibus demum ornam-

mentis

mentis prædito, ob strenuam in confutandis adversariis collatam operam, Academia vicem reddit.

FORMULA QUADRAGESIMA TERTIA

Ejusdem argumenti.

Pro Ludovico Hieronymo Malabayla Canaliũ

Comite.

Mihi ne laborandum, ut de *Ludovico Hieronymo Canaliũ* inclyto *Comite* digna loquar? Id suffecerit unum, si cum *Juvenale* dixerim; hic est *pulcher, & acer*

Felix & sapiens, & nobilis, & generosus.

Brevius? Hic laudati *Prolytæ*, quem hodie coram adduximus, & amicus, & similis. Dies est igitur *Academiæ* læta veluti duplici triumpho. Prisca nobilitas præ doctrina minus poene dixerim clara splendescit. Excelsa nempe doctrina, purisque ex *Philosophiæ* fontibus repetita, verbis ornata, eruditione condita, denique nobilis. Plebeia est illa scientia, quæ alio incedit ornatu. Apage tetricam, sordidamque disciplinam; apage rigidam, & vere cynicam sapientiam; hinc virtus, sed laeta, sed festiva, sed ridentibus comitata veneribus, qualis *Cæsarem* decuit, vel *Ciceronem*. Vos hoc melius cognovistis, quos in *Academiã* deblaterantes salibus iste perfricuit. Indoluitis: at irasci non dabatur, vera namque ridendo, dicebat. Ob eam tamen, quam in te laudat rerum humanarum, divinarumque notitiam, pilco insignitum te vult *Academia*, neq; hoc solum

lum contentus esto; maiora namque jam parat. Toga, qua indutus inde discedes, amplissimis honoribus maturum te esse prænunciat. Libri civilis, & sacri juris te Jurisprudentiæ Romanæ verè Candidatum, verè Prolytam esse declarant, idest, mente, & virtute Romanum, Catonum, Sulpitiorum imitatore, consilio prudentium, nobiliumque sanguine. Similes illis habitura est Academia, si tu idem semper eris, & alii genere clari similes tibi. Tunc omnia florebut, ubi nobiles docti fuerint; quantum enim nobilitati de studiis accedet, tantum Academiæ accrescet & ornamentum. Debellatum cum omnibus hostibus est, si plures tibi pares nostri fiant. Quod speramus, si in id incumbas. Enitere, & omnia benè evenient, feliciterque. Eam namque obstrinxeris Academiam, quæ de optimè factis tunc silebit, quum æterna sui monumenta, quum scripta, vocesque eruditæ, quum servatrices immortalium facinorum litteræ conticescent.

FORMULA QUADRAGESIM. QUARTA

Ejusdem argumenti,

Pro Dominico Maria a Turri.

QUæ Collegii mandato tibi tribuimus honestæ missionis signa, & tuum studium, atque sollertiam, & tuum debitum jugiter in animum revocabunt. Quomodo namque labor mercede donetur, hoc pileum, hæc toga humeris suspensa tuis ubique præ-

seferent : quid Reipublicæ debeas, libri indicabunt iusti, & æqui clarissima monimenta. Idcirco fruiere quæ accepisti, eorum non oblitus, quæ tu debeas. Fac quod debes, & dabimus ; fac doctrinæ tuæ maiora pericula, maiora dabimus præmia. Gloria virtute, fama doctrinæ specimine conciliatur. Si vis, tibi quod deest consequi, facile fuerit ; facilis volenti labor, & studium. Vis famæ, vis gloriæ servire? labora, & stude; vis honoribus, vis dignitatibus? stude, & labora.

FORMULA QUADRAGESIMA QUINTA

Ejusdem argumenti.

Pro Josepho Secundo Carretta.

Fortunatius nihil, feliciusque anni nascen-
tis initio tibi, *Joseph Secunde Carretta*, contingere potuit, quam Academicarum auctus dignitarum. Si extremum initio respondet, nihil est, quod timeas: omnia fausta sunt even-
tura. Nihil tamen deerit, ubi prudentia semper adfuerit comitata doctrinâ. Et prudentiæ, & doctrinæ insigne deferimus; pileum videlicet honori dicatum, & litteris. Toga Romanorum est; ei qui Romanæ sapientiæ sese totum addixit, quid magis conveniat, quam Romanorum insigne? libri monimenta doctrinæ, iidem effecta doctrinæ, antea laboris causæ, nunc laborum solatia, & notæ virtutis. Hic ne tuæ laudes finem accipiant: quamquam ego non ultra progredior. Sic
cres-

crefcant tuæ dignitates , ut huic anno innu-
meri fuccedent, tibi patrique Jurifconfultiffi-
mo viro felices extiruri, fi multos ab ipfo ini-
tio nova aliqua dignitate diftinguas . Nec
enim magis aufpicato incipere poteris, pluri-
mos annos , quos tibi , tuiſque , toto ſuffra-
gante Collegio , felices auguror , precorque.

FORMULA QUADRAGESIMA SEXTA

Ejuſdem argumenti ,

Pro Petro Franciſco Paſſera.

Civili, ſacræque Juſtitia Myſtam initiamus,
Patres , animo , & lingua favete. Sacra-
mento te huic addictum , primum id ſervare
conveniet, quo ſancta colantur Jura, colantur
leges. Quod ut præſtes, tu probè caveto, ne quid
ob aliquem conſulas , ſtatuas, quod tibi, ſi ius
reddatur, arbitreris iniquum arbitreris injuriū.
Tum quid publica ſalus requiratur, decernas, edi-
cas: non quid privatorum ac tua. Hæc ſumma,
hæc infima rectiſſimè lex una diſponit. Huc
omnia his comprehenſa codicibus, ſive Ponti-
ficum , ſive Principum, ſive Romanarum le-
gum Interpretum, referuntur inventa. Aurea
quidem inventa , & primum ab ipſo deducta
ſacrario , Imperatorum, ac prudentum aucto-
ritate lata , Pontificum ſapientiâ caſtigata ,
præſentis Numinis in terram è Coelo delapſi,
partim permiſſa , partim (quæ redemptorum
fors fuit beata mortalium] vocibus imperata.
Tu illarum Cuſtos, tu illarum interpres , hos
libros apud te ceu depositos habe : tibi datos,

ut enodentur , interpretare : præscripta tu
 serva , nec non præscribe reliquis , uti serven-
 tur. Velatum caput non filo , quod Flami-
 nes profano ritu gestabant , sed pileo te ha-
 bere maximè decet , ornatui quod possit esse ,
 sed specioso , sed consecrato Musis , & The-
 midi. Puram togam humeris , brachiisque sus-
 pendis : puræ vestes puro conveniunt , non
 vivo flumine puro , sed mente , sed manibus.
 Non in cædem iniquam , non in turpem rapi-
 nam extendantur manus semper impollutæ ,
 semper innocuæ , puriorisque conscientia mi-
 nistræ simul , & indices. J , per nos licet , Pro-
 lyta , sed memor , & cautus parce verbis ina-
 nibus , nec enim præstabit accepta vulgasse ,
 nisi vel consulendo juveris , vel judicando
 profeceris.

FORMULA QUADRAGESIM. SEPTIMA

Ejusdem argumenti,

Pro Josepho Francisco Comite Capra ab Azano

Archigymnasij Rectore.

SI te , clarissime Rector , hodie debeam infi-
 gnibus honestare missionis honestæ , vel
 nova quærenda sunt , & hæctenus inusitata ,
 vel nihil agendum. Quid enim tribuerim ado-
 lescenti , quem omnibus illis in hac ipsa con-
 cione amictum intuear ? Togatone toga pro
 præmio concedenda , pileumne pileato ? tibi
 nempe pileum , togamque dederim , quam
 Augusti Regis , qui te ad hoc munus allegit ,
 pene dixerim manu susceperis ! At pileum ,

togamque suscipies, quam induisti. Non hæc tibi quondam data, sed dignitati : & si tibi ob hanc dignitatem ; nunc vero tibi, nunc propter te hæc ipsa decernimus. Laudabile quidem fuerit lectissimæ Juventutis sic tibi conciliasse studia, ut te Rectorem legerint inter plurimos : grande fuerit Principis voce fuisse renunciatum ; majus semper erit Academiae promeritum hæc esse suffragia. Quod namq; Magistratum te Princeps creavit, multitudinis id votis indulsit, quibus nihil incertius ; quod Academia te Prolytam designandum censuit, id paucorum sententiâ fecit, qua nihil prudentius, graviusque. Est itaque magis illud fortunæ, quæ si providè agere voluit, neminem præter te legere debuit : sunt ista præmia virtutis ; illud annali spatio duraturum munus : ista perpetua ; illud Academiae parietibus, vel urbis tantummodo continentibus ædificiis terminatum : hæc dumtaxat illis deponenda locis, ac regionibus, ex quibus litteræ, leges, humanitas excesserint, eruperint, effugerint exulatum. Quod igitur anni spatio pileum gerere, togamque debebas induere, perpetuum gere : semper induito ; diuturniora quam cætera, debent esse, quæ doctrina quæsit. Addimus & istis præfecturas petendi, certisque in locis de jure respondendi facultatem, quam hæc signant aperta civilis juris, sacrique volumina. Hæc munera sunt viris, doctisque dignissima, in

his non suffragia Juventutis Princeps inspicit, sed uniuscujusque studium, & virtutem, cujus hæc sunt in Academia nostra signa raro fallacia. Habebas, Rector illustris, quo lætareris, si te Princeps elegerat, repulsis in petitione competitoribus; sed nunc tua gaudia sunt potiora, quod te inter tot studiosos sordidæ repulsæ nescia doctrina distinxerit. Sic tibi non uno nomine gratulamur *Rector amplissime*, quod in tanta nobilitate natalium, quod in tanta muneris dignitate non ipse conquiescas, sed addens laudi laudem, honorem honori potissimam tuam, perpetuamque gloriam a sola virtute requiras.

FORMULA QUADRAGESIM. OCTAVA

Ejusdem argumenti,

Pro Josepho Ignatio Corte.

Dicere quid debeat de te *Joseph Ignati*? Laudabo Poëtarum more florem adolescentiæ vix erumpentem, formam corpusculi non indecoram, animulamque candidam innocentissimarum virtutum, morumque nutriculam? Non hæc loci hujus, ac temporis. Commendandum potius in parva statura, membrisque teneris, magnum ac firmum ingenium. Procul hinc este, provec̃ta ætate, sed nulla virtute, robustique Juvenes, sed indocti. Date locum adolescentulo illis insignibus digno, quæ consequi nullo jure potestis. At tu *Joseph* pileum dignitatis accipe, quod nunquam nihili quædam, & vanissima capita gesse-

gesserint. Libros tenellis tere manibus, aleas tractare nesciis, ludis sordescere non assuetis. Togam ante viriles annos induito, hæc præcocis in adolescente iudicii signum, & præmium. Rarum videtis P. C. virtutis exemplum! Adolescentulum eorum honorum dignum, eorumque capacem, quos plurimi provectæ ætatis homines frustra requirant.

FORMULA UNDEQUINUAGESIMA

Ejusdem argumenti,

Pro Alexandro Rugerio.

POSTrema die, Candidato non ultimo quidem hæc non suprema deferamus insignia. Aliis alia præcurrunt: præstantioribus inferiora. Ut cuncta teneas, habeas, possideasque, coepisse, ac laborasse non juvat; perficere coepta necessum est. Laborato, & inchoata perficito; præmia amplissima te præstolantur. Hæc tamen insignia missionis honestæ sint tibi ad labores illecebræ, & incitacula. Tibi nempe pileum do, togam quoque, & libros impertior: idest præmia digna, ubi perfecta fuerint, *Alexandro*. Mentior? illo, inquam, quæ concedantur ab Alexandro, cui severitas non magis, quam sapientium perpetuus comitatus æternum peperit nomen. Quid enim aliud, quam de jure respondendi facultatem peritis concederet Alexander? Quid aliud expetis Alexander? Severi tempore digna gere; non enim defutura est respon-

dendi potestas. Quæres adhuc, ubi hanc acceperis, Alexandrum? En aderit, sed re *Victor*, & nomine; hic gloriâ, hic sapientiâ Macedone, Romanoque præstantior est Alexandro.

FORMULA QUINQUAGESIMA

Ejusdem argumenti,

Pro Victorio Amedeo Pelliono.

Tertium P. C. coram adduximus eodem è genere Candidatum, duobus ætate minorem, non ingenio, non probitate. Bene Reipublicæ consultum erit si, prout domus una regno tria doctrinæ pignora dedit, reliquæ tantum singula dederint. Felicem parentem talibus liberis dicere non dubitarim, quos una laudis cupido stimulat, una virtus impellit. Vidit Catonum, & Scævolarum familia Jurisconsultos, & Fratres aut lege conjunctos, aut sanguine, sed utraque duos: vidit Ælia gens eodem parente genitos duos Jurisconsultos, & Consules: Nemo fortassis eadem ex domo vidit formari Collegium posse Jurisprudentium, & germanorum. Rara parentibus, & inusitata trium adeo sapientium natorum jura. Non ergo negandum huic fuerat, quod primi tulere: nec debuit togatos fratres virtutis eorum æmulus togâ nudatus aspicere. At illi vel tribunali, vel rostris addiæti, vel judicent, vel Clientibus adsint: Sacra hic munera non ineunda cæteris unus ineat: geratque pileum.

capite, manibus codices: qui futurus est apice dignus, & lituo. Sic vivant concordēs fratres, sic doctrinam colant, & augeant, ut eorum parenti id accidat in vita, quod Metello Macedonico contigit; quemadmodum enim hic tribus ex filiis Censorium unum, duos Triumphales vidit, Consules omnes; sic ille, quem unum hodie Prolytam inauguramus, Sacerdotij splendore conspicuum: duos Magistratu præstantes: omnes Jurisconsultos honore, nomine, famâ præclaros intueatur.

FORMULA QUINQUAGESIMA PRIMA

Missiois honestæ,

Quam specialem appellant.

EN, Candidate spectatissime, præmia, quæ ingentia, nec alijs tentata peperere certamina. Magis quam cæteri desudasti, non plusquam cæteri nactus es: imò minus quoque, si rectè respexeris. Toga, pileum, codices sunt omnibus, qui è portu solvere meditantur, promiscuæ symbola dignitatis. Sed tu, quod illis datur, tenes, at non quantum eis conceditur [post hos tuæ varios fortunæ casus] fortassis habueris. Hæc accepisse reliquis semper honori, tibi quoque decori poterunt esse. In lubrico versaris, ac præcipiti loco. Si tamen cuncta, quæ restant, absolveris, tantum tu ab illis, quantum illi à vulgo, distabis. At si, quod abominor, contra evenerit, summi labores incassum

caſſum cecidere, multo minus meruere, quam quod omnes. Qui in hoſtes deſecta ſigna ſequentes hæc ab humo extulerunt, non adhuc de Republica benemeriti poſſunt haberi, niſi in vallum, illis incolumibus, rediere ſoſpites. Jactam ludis aleam, ſed non arbitrio fortunæ. Virtuti ſervis, virtuti fidendum; ab hac una ſalus, & gloria. Hæc Herculi viam patefecit ad inferos, hæc ab inferis ad Aſtra perduxit; hæc Theſeum inextricabili à labyrintho, Minotaurique faucibus liberavit. An putas hæc alia de cauſſa conficta, quàm, ut bonorum, ac magnorum Virorum, inter quos cenſeri debebis, varij vitæ ſignificentur eventus? Longa quidem, & anguſta remanet via: at de cætera judicare à decurſæ periculo datur; ſalvus huc evaſiſti, ideſt dimidium jam percurriſti cum laude ſtadium; quidni, virtutè duce, reliquum fortunatè conficias? Maſte animo, maſte doctrina. Magnis periculis, magni triumphi comites, & omnium triumphorum laude potior virtutis fama, ſcientiæ nomen. Optimè tum labores impendiſſe tibi ipſe videre, quum omnes pertuleris. Sed quem animum, quod hortor ingenium? Si tibi ad hæc aggredi liberum, perſequi neceſſarium: coepiſſe magni fuit animi, proſequi glorioſi: rem non abſolviſſe deſidiſ, imprudentis, ignavi; vel non coepiſſe debebas, vel coeptra ſequere, & vince.

FOR -

FORMULA QUINQUAGES. SECUNDA

Laureæ , quam specialem dicunt.

Circum hujus tempora viri ite triumphales lauri ; nec enim rectius aliud eximio Prolytæ dederim. Inclyta tamen, & immortalis laurea debetur tantæ virtuti. An fortis Athleta, strenuusque pugil : an agitator in circo sedulus, & quotquot sacris in ludicris decertantes Græco, Romanoque populo placuerunt, potiore jure meruere præconia, præmia retulere ? An triumphator unquam reportavit justiore de causa coronam ? Non equidem alacer, tu studiosorum optime, de trucidatis hominibus, deque afflicto humano genere triumphares. Nec obgentibus clades illatas, abactas prædas, irrogatas injurias, nullo discrimine sexus, ætatis, incendijs calens, & sanguine, inter catenatos senum, puerorum, mulierumque greges, inter direpta spolia captarum Urbium, & everfarum, Capitolium superbus inires, lætum agitans diem, quem funestum tot miserorum non immemori conditionis humanæ gemitus, atque suspiria facerent. Sic ille cruentis manibus, cruentis hostijs, facto sui & exercitus spectaculo, post data flebiliter lascivienti multitudini à victis, vinctisque ludibria, pollutas aras, & altaria cruentabat. Nonne decentius sacra laurus viri à cædibus puri, ac docti caput ornaret ? Ast tu nemini noxius plurimos effudisti sudores, melior ut
esset

esses, & doctior: nulli inimicus, nisi socordia: semper industrius, sed hominibus uti proficeres. Ergo pileum quasi lauream habendam, gestandamque perpetuò, justius quàm quisque gentium domitor accipis, justius quàm triumphator. Non igitur palmatam, & pictam huic togæ rectè contulerim. Non Scipiones his monumentis sapientiæ: non currus, & sellas huic solio meritò comparaverim. Ut hoc jure conscendere queas, summarum potestatum auspicijs, auctoritate (quibus stat, & stetit Academia) te doctorem, Jurisque consultum in Collegium hocce conscriptum nomino, dico, creo: quod æquum, ac justum fuerit hinc à te Juvēntus accipiat, consultor intelligat. Hoc modo tanquam legum, ac juris antistiti volumina damus, non ut inde discas, at doceas. Ex illo deductum te osculo prosequor, inque Patrum gradibus colloco, quo datum eis Collegam te videas, quos hactenus Magistros habueras, & Censores. In posterum de studiosis æquissimè judica, quemadmodum de te semper optimè est judicatum: tu illorum expende doctrinam, cujus septies examinata doctrina, septimò promeruit approbationem, privatim honorificam, publicè splendidam, amplissimamque; Annulum duplici quoque jure gestabis, & quod signandis præsertim de jure responsis Jurisconsultis eum licet habere, & quod in hoc
ad-

adlecto Collegium nihil magis convenire videtur, quam quod Senatorum est signum. Nos quoad licuit, nec sapientiæ tuæ, nec muneri nostro defuimus: cætera Superi curent, fortunent, ac prosperent. Vos propterea Divi, Divæque omnes supplicibus favete precibus. Tu Virgo Dei Genitrix, tu Numen propitium votis adeste. Vos Collegam nostrum sublimi donatum ingenio, singulari scientia locupletastis: vos ei tam longum, imperviumque conficienti curriculum magnis in periculis, summoque in discrimine volentes tulistis opem. Cui clementer annuistis, juvate, defendite: ut sic Reipublicæ sine noxa, & nota ministret; sic gerat honores, munera, Sacerdotia, quemadmodum hætenus repulsæ vacuus, inoffenso pede, bono publico, summa virtutis, & sapientiæ opinione, longèque majori, quàm cæteri famâ, gloriâ ad omnes [qui vestro beneficio doctissimis, peritissimis, optimis, parati, promissi sunt] gradus, & dignitates adscendit.

FORMULA QUINQUAGES. TERTIA
Codicillorum missionis honestæ,

Litteras patentes appellant,

Impetrati gradus vel Civilis, vel Theologici.

HUmani generis interest non modo vivere (1) sub legibus homines, sed & legum

(1) *Si de Theologia loquimur, addi potest: Divinis,*

gum exercitores sacrorum, (2) & Civilium institutorum longe consultiſſimos eſſe, ut beata mortalium vita, quæ ſine æqui, & boni conſtitutione nulla eſt, ſemper æqualis, & adverſis intacta [3] Præſidium vigilantia, & curâ perenner. Nec porro bene de Republica mereri videtur, qui ſanctiſſimam rem (4) Jurisprudentiam contemnens, ac negligens, Magiſtratus, ac poteſtates gerere velit, & tractare (6) provinciarum frena non dubitet, juſti, injuſtiſque peræque rudis, & neſcius. Contra è re communi majores noſtros feciſſe dicendum eſt, qui nulli [7] Juris dicundi poteſtatem dedere niſi ſtudijs legitimo tempore peractis, ac teſtimonijs impetratis operæ non perperam in illis collocatæ; quorum præcepta ſi Poſteri tenuiſſent, non promiſcuo Gymnaſiorum fato, re perdita, & proſtigatis optimis moribus, nomina dumtaxat ſignificationis expertia coluiſſent, ac ludicros, pudendosque ritus in lucem prolatos otioſis, ac irridentibus obtuliſſent. Qua flamma, ac peſtilentia, ſi bona quondam ſtudia contabuere, Jurisprudentia (9) ſorduit eloquentibus, & eruditis, Academia

- [2] *Prætermittit Civilium.* (3) *Adde Chriſtiani Cultus; vel loco Præſidium ſcribe Antiſtitum, vel Sacerdotum.* (4) *dic. Theologiam.* (6) *Eccleſiæ gubernacula minime.* (7) *Dic. ſacra docendi.* [9] *Theologia.*

miæ ludibrio haberi cœptæ sunt; desidia, & quæstu ingruentibus, necesse fuerat Principem nasci, qui pro virili opem labentibus artibus, afflante Numine, ferre vellet, ne (eo deinceps Auctore) splendida quondam, & vere studiosis debita præmia ignâris, ignavisque venum, ac pessum dari contingeret.

Id sane præconium *Victori Amedeo Regi* disciplinarum nutrix Italia rectè tribuerit, qui latis legibus, restituris honoribus, instauratâ penitus Academiâ, doctrinarum omnium, & cum primis (10) Jurisprudentiæ decori consuluit, virtutemque Juvenum excitare, fovere, amplificare se dignum, idest, magnanimo Principe censuit. Cujus exemplo moti, & auspicijs ejus cuncta gerentes, de doctrina *Antonij Ferrerij* Artium Magistri, Jurisprudentiæ [a] Candidati, ac postremo missionem honestam adepti, hoc testimonium nostrum, ac Virorum illustrium perpetuis, & publicis demandatum litteris ultrò perhibere non dubitavimus.

Quum V. C. Antecessore Regio in Collegium Jurisconsultorum adlecto verba faciente de tribuendo *Antonio Ferrerio* Jure missionis honestæ, quam *licentiam* majores vocaverè, diremtis suffragijs Patres censuerint, haud indignum Candidatum videri, qui beneficijs, insignibus, privilegijs perfrueretur honoris causâ missorum à studijs, placuit

(10) *Dic. Theologiæ.* [a] *Dic. Theologiæ.*

Antonium Ferrerium ingenuatum Artium Magistrum, Jurisprudentiæ Candidatum à studijs (1) Divinarum, humanarumque legum honoris ergo dimitti, eique missionis signa concedi: rectè, ordine, exque re litteraria facturum fuisse V. C. Antecessorem, si Collegij nomine, luculentisque verbis eadem ex formula daret. Meruit enim sollertissimi Prolytæ virtus, ut Academia, quoad ejus fieri potuit, illius desiderijs obsecundaret; quod post transactum in (2) sacra, & civili Jurisprudentia triennium privatim interrogantibus tribus Antecessoribus, ac duobus è Patribus doctrinæ sudore quæsitæ fidem fecerit, idque publicis litteris consignata eorum, qui judicando adfuere, suffragia demonstrent, Magistratus Academici decreto probata. Ob quod periculum publica disputatione naviter instauratum jure placuit, universa missionis honestæ jura *Antonio Ferrerio* Prolytæ creato competere, quæ Pontificum, quæ Principum legibus, quæ majorum moribus cum honore missis à studijs ubique Terrarum concessa, comparata essent, erunt: eaque Pontificiâ, Imperatoriâ, Regiâ potestate, optimâ lege dari, quasi ejus dumtaxat causâ data, parata forent.

At ne civilis opera præstantissimi Prolytæ huic Regno subjectis inutilis videretur, id

(1) *Dic. Philosophiæ, & Theologiæ.*

(2) *Dic. Divinis litteris.*

id quoque placuit *Antonium Ferrerium* in ditionis ejusdem præfecturis, municipijsve, præterquam ubi Judex vice sacra, Præses Provinciæ, aliusque beneficio Principis lectus Jurisdictioni præesse solet, jus dicere, judicare, causas orare, de jure respondere (3) aliaque facere posse, quæ Prolytis agere legibus, moribusque fas est, erit.

Quod judicium nostrum, & amplissimum ordinis universi consilium non modò in *Academix* tabularijs asservari, minori dignitatum laterculo consignatum, verum etiam ad optimi Prolytæ perennem laudem, post adempta missionis insignia, munera, jura, bene juvantibus Superis, edi volumus, ejusque ex fide descripti diu permansurum exemplum, & illustre concedi.

FORMULA QUINQUAGES. QUARTA

Ejusdem Argumenti,

Pro Medicina Prolytis.

Salubrem humanis corporibus Medicinam quum in pretio haberi ab hominibus, tum ab ijs tractari convenit, qui diu meditando, & agendo, insignem vitæ partem, juventutem in diligenter explorandis causis, effectisque naturæ penè consumserint. Res namque exempli non boni fuerit artem Civibus utilem, vulgò, & sine discrimine

* E

pro-

(3] *Hoc totum in Theologia omittitur, quippe de qua Regis Constitutio intelligi minime possit. Sequens tamen §. apponitur.*

profiteri nonnullos, qui ex necessitudine quæstum, ex imperitia nomen, ex fallacijs, & quasi præstigijs vulgarem captantes auram multis mortalium vel parant, vel maturant exitium. Quod quantum optimi regiminis legibus adversetur, omnes videre populi, quotquot constituerunt, ne cui liceret medicinam injussu Principum exercere, dato Virorum doctorum universitati negotio, nequid ex violata harum sanctionum reverentia populus detrimenti caperet.

Ea sanctius instituta Taurinensis Academia servat, quippe quæ plurium annorum spatio Candidatorum diligentiam, peritiamque ponderat, approbat, exigit: ac per varios honorum gradus ex intervallo datos, quantum maxime potest, ad perfectam doctrinam perducere conatur. Per triennij porro curriculum in Athenæo exercitos, haud ita dimittit, ut amandet in majores Urbes, nihil adhuc præclarum aggressos, necdum tradita usui aptandi peritos; sed faciliore mandatâ Provinciâ, ad municipia, & præfecturas allegat, non laureâ donatos, at honoris causâ missos à studijs; sic omnia disponens, ac temperans, ut nequis studiosus, haud transitis medijs, ad extrema properasse velit. Haud tamen minus eorum famæ, gloriæque favet; nam quantum falsæ laudi detrahit, tantum addit veris honoribus non oblita laborum, & pro meritorum modo præmia dispensans. Sic.

Sic igitur certa de scientia *Josephi Antonij Boleoni* Artium Magistri, & Medicinæ Candidati, quod *Raphaële Boleono* Fratre Regij Archigymnasij Professore C. V. rogante, universis placuerit *Josephum Antonium Boleonum* missione honestandum, ejusque dignitatis ornamentis augendum, Candidati justis precibus annuit. Quamobrem de consilij sententia decrevimus,

Uti *Josephus Antonius Boleonus* Magister Artium, Medicinæ Candidatus à Physiologiæ studijs, honoris, & laudis ergo missus esset, ejusque rei causâ missorum à studijs, beneficijs, immunitatibus, juribus frueretur; eaque propter Latinorum amictu in conventibus literariis, & quando sua videretur interesse, posset incedere; quæ Prolytarum signa *Raphael Stephanus Boleonus* Professor V. C. egregiâ, brevique oratione pro concione, mandato, viceque Collegij tribueret. Quamvis enim peregrina Medicina sit, & in regionibus nec nata, nec alta Romanis, merita civitatem est, & honores assequuta similes æmulam gerit Italæ Jurisprudentiæ. Cujus exemplo quæcumque rescriptis, edictis, consuetudine, Medicinæ Prolytis attributa, quæ sita forent, quâ Pontificia, quâ Imperatoria, quâ Regia potestate, quam demandatam habemus (extraquam, si quid factum esset, quod Academica lege vetitum, exceptumve fuit, ac fuerit

fuerit) ut ad eundem pleno Jure, perfectoque spectarent.

Igitur, ut idem ornatissimus Prolyta in omnibus inalpinæ, subalpinæ ditionis, ac Regni locis, præterquam in urbibus, oppidis, in quibus Senatus haberi, Præses Provinciæ constitui, Judexve beneficio Principis creari consuevit, artem medicam exercere, profiteri possit, simili modo decrevimus, jussimusque hos honoratæ missionis Codicillos ejus dignitatis, potestatis, beneficiorum, Jurium, insigniumque datorum ad ipsius Prolytæ perpetuò duraturum decus, & gloriam exarari, ut doctrinæ suæ domi, forisque æternum sint documentum.

FORMULA QUINQUAGES. QUINTA
Codicillorum laureæ vel Civilis, vel Theologicæ.

Optima veterum instituta perennem utilitatem habentia, si nunquam posteritas negligere debuit, illis procul dubio pessimo publico derogasse videretur, per quæ doctrinis vel certi statuuntur honores, vel doctis justæ potestatis legitima decora permittuntur, ut populus, qui non ab egregiè factis viros dignoscere solet, ornatu, nomine, dignitate discretos oculis usurpare, præsentisque vereri condisceret. Et quemadmodum nihil est tam exiguum, quod maximo in pretio esse nequeat, si rarò, & optimis tribuatur, sic magna quamvis præmia dignitatum si indignis, & passim con-

cedantur, ita sordescunt, ut nihil eis possit esse despectius. Vidit quondam Romana Civitas fortissimos milites ob accepta pro patria, pro Civibus vulnera, quernâ, gramineâque fronde contentos: vidit & summos Duces victis hostibus ovantes, triumphantesque myrto, & lauro redimitos; Olympiorum verò victorem per diruta in patriam moenia curru revectum, oleastroque coronatum immortalibus epinicijs maxima Græcorum ingenia celebrarunt. Hæc levia, & quantumvis humilia nemo sanus non magis miretur, ac velit, quam aulicorum quorundam [1] superbas statuas, altas effigies, vel elatos, locupletesque libertorum [2] honores, licet insolitis Romani Senatus consultis, ac signatis in ære titulis, amplificatos, quibus non illi sublimes abire poterant, carentes omni virtute: sed honorum ipsa pretia, quasi obruta coeno, pessum ivisse videantur. Constabit enim mercedi dignitas, quoad illa virtuti conjuncta sit, quicum humilia non extolli nequeunt,

* E 3 parva

[1] *Sejani, Tigillini, & similium vid. Tacit. lib. 3. annal. cap. 73. & lib. 4. cap. 2. Senec. de Consol. ad Marc. c. 22. Dion. lib. 58. Sueton. in Tiberio cap. 48., & 65. vid. quoque eund. Tacit. lib. 15. cap. 72.*

(2) *Ut Pallantis vid. Sueton. in Vitell. cap. 3. & Tacit. annal. 12. cap. 53. Plin. lib. 7. ep. 29. & lib. 8. ep. 6.*

parva non crescere præmia, & quâ remotâ, clara non obduci tenebris, magna non deprimi.

Profectò [a] Romanorum vetustissimis optimè positum in moribus erat, ut [b] Juris iidem custodes essent, qui Religionis, qua re salvus honos utrique foret, quum illos prætextâ (c) & apice decoratos plebs venerari, & augustos [d] putare consuevisset; donec ex adytis deducta Pontificum, & solio (e) donata (f) Jurisprudencia [g] Civitates Principes sui studiosos haberet, (h) ac mutatâ Republicâ confugeret in palatium, in quo Imperatorum arbitrio, selectis duntaxat, & gravissimis Viris facultas ejus tractandæ fieret. Mansit ejusdem dignitas cum Imperio, [hh] ac barbaricâ exundante colluvie, restituta sæpissime fuit, bonarum artium domicilijs excitatis, instauratisque; vetustæ tamen originis non oblita, pileo, & togâ (i) Romanâ cultos suos Professores habuit, quibus ne defuisse videretur ex illustri doctrina nobilitas, aureus datus annulus excelsiorum ordinum signum, & de-

(a) *Vel Christianorum.* (b) *Vel dic. Theologia.* (c) *Sacris indutos.* (d) *Adde merito.* (e) *Cathedra.* (f) *Theologia.* (g) *Populi doctissimos.* [h] *Cætera ad finem usque periodi in Theologia omittuntur.* (hh) *Adde Romano.* [i] *Dele togâque Romanâ dic. Pallioque.*

decus. Quæ cuncta peti, & obtineri nunquam è Republica visum est, nisi [1] Jurisconsultorum prima munera præstitissent, qui bonis artibus insistere potius, quam inertiae, ac luxui voluere, ne clara quondam nomina, quæ ad nos usque pervenerunt, à prisca, nativæque præstantia, pretioque degenerarent. Obliteratis igitur Hieronicarum honoribus, bellicisque victorum trophæis, ac palmis usu sublatis, stet (n) Jurisprudentiæ vetus amplitudo: servet, quod promittit *Doctoris* nomen: nec quisquam [o] se se Jurisconsultum verbo, scriptove profiteatur, qui, quod spondit, præstare Civibus, exterisque nequeat. Sic etenim parilis erit sudoribus merces digna, quæ repetitis ex vetustate nominibus, publice conferatur, & quæ cōferatur à Principe.

Hanc laboriosam oppidò viam, postquam *Johannes Baptista Mazeus* semel inivit, & per adversa periculorum, itinere annorum plurimum absoluto, in doctrinæ, ac virtutis culmen tandem evasit, jure præmiorum cupidine flagravat, quæ Taurinensi in Lyceo doctis dumtaxat, probisque servantur. Quare, quum V. C. Antecessor in [a] Jurisperitorum illustri Collegio, de Laurea lectissimo Prolytæ destinanda referret, hæc singulorum fuere suffragia, Collegij totius summa consensio-

* E 4

ne

(1) *Dic.* Theologorum. (n) Theologiæ.
[o] Theologum. [a] Theologorum sacro.

ne , latisque vocibus excepta , demandata quoque litteris, ac promulgata.

Censuere Patres , quòd *Johannes Baptista Mazeus* primis usque à studiorum suorum temporibus sollertiæ , studijque plura specimina dederit , & quæ diligentia retulit egregia testimonia, quater privatim, bis publice, nec dolo malo surrepta, nec à veritate aliena fuisse probarit : quòdque Magister Artium liberalium , Jurisque divini , humanique (b) Candidatus , Prolyta renunciatus , quæ munera ad Academiam pertinerent , rite perfecit, quum extra ordinem in habitis ex publicâ potestate conventibus se se disputatorem idoneum, acremque præbuerit; & quòd demum , quid scribendo posset octo & quadraginta disputatis enunciationibus ex delectis binis Juris Pontificij , & Civilis capitibus (c) semel & iterum demonstrarit, uti *Johanni Baptiste Mazeo* omnes Lycei nostri dignitatum gradus ordine adepti, quæ studiosis, necdum Jurisconsultis (d) renunciatis convenire queunt, post quinquennij (e) tamen emensum tempus, Jurisconsulti munus , doctorisque nomen deferretur ; & hoc ampliusè re litteraria nos facturos fuisse, si id ordinis judicium ratum habentes , nostra quoque sententiâ confirmaremus.

Quo-

(b) Dic. Theologiæ. [c] Dic. senis questionibus. [d] Dic. Theologis. [e] Quadriennij.

Quocirca V. C. Antecessor mandatu nostro, nobisque præsentibus, ac rei auctori-
tatem accommodantibus, post habitam de
laudibus viri lectissimi orationem pro tri-
bunali pronunciavit, *Johannem Baptistam Ma-*
zenum publici, privatiq[ue] Juris (f) doctorem
esse eâ optimâ lege, rituq[ue], quo Juriscon-
sulti [g] Pontificum auctoritate, Princi-
pumq[ue] constitutionibus qualibet in Acade-
mia creari solerent. Laureæ propterea ge-
rendæ perpetuò facultatem habere, qua do-
ctrinæ decus togato non absimile foret, quod
olim bellicis cumulado virtutibus erat. Au-
reo quoque donatum annulo civilis nobili-
tatis luminibus auctum significavit, quæ pro-
prijs quæsitâ laboribus, nec arcessita remo-
tius, propria esset, & sua. In Cathedram in-
de (a), velut in solium Jurisconsultorum in-
ductum, librisq[ue], doctrinæ symbolis clau-
sis, & apertis ostensis, ac traditis, ad oscu-
lum more majorum admisit, quo tandem
& se se ipse Jurisconsultum (b) jure optimo
creatum agnovit, nos vero, & Patres eun-
dem doctorem, quod Academiæ bonum
esset, ac faustum, gratulabundi consaluta-
vimus.

Quæ

(f) Theologiæ. (g) Theologi. [a] Dic.
Theologorum, ac de me sequentia. [b] Dic.
Theologum, etsi de speciali laurea sermo sit.
Dic. in Collegium allectum nos Doctorem
peculiari jure creatum, Collegam Patres,
consalutarunt.

Quæ cuncta Pontificia, ac Principali, quæ mandata fruimur, potestate cœpta, perfectaque declarantes, definimus *Johanni Baptiste Mazeo* Doctori renunciato Jus esse ubicumque Terrarum in posterum consulendi, deque jure publico, privatoque respondendi, nec non [si id è Republica censeatur] judicandi, jurisque dicundi sacras dignitates, civilesve magistratus gerendi, quos magistratus, potestatesve Jurisperitos gerere legibus, vel quo alio jure conveniat: (c) ejusque dignitatis ergo gentilitio stemmati, quod habuit, habueritque, si sua interesse putaverit, imponendi signa patentium galearum. Cætera demum, quacunque sanctione, rescripto, privilegio, beneficioque Doctoribus, jurisque peritis (d) concessa, permessa, perfecto, absolutoque Jure, uti ei competant, volumus; eaque, quantum nobis datum est, proferentes, enixè curamus, ut hoc luculentissimo Codicillorum, & in perpetuum valituro documento non solum immortalis honoris memoria servetur, sed quoad fieri potest, ejus splendor, & fructus quoque redundet in patriam, suos, & posteros.

FOR-

[c] *In Theologia loco suprascriptor. dic. de morum, ac Religionis disciplina, decretis, & jure consulendi: Theologica præcepta tradendi, profitendi, sacrasq; dignitates administrandi, quas Theologos S. legibus, vel quo alio Jure. [d] Dic. Theologis.*

FORMULA QUINQUAGESIMA SEXTA

Ejusdem argumenti,

Pro Medicinæ Doctoribus.

Disciplinarum omnium altricem, & magistram, humanitatisque parentem Græciam, ex qua primum cum litteris in universas(a) Orbis plagas Civilis vita decentius constituta profluxit, quum omnium artium genere delectatam esse compertum videtur; tum utilibus illis ac salutaribus studiis, quibus cultius, humaniusque mortalium genus effectum est, hominesque non agrestes, atque ferini, quos Barbaria edere solet, sed humani, Civilesque populi, beati atque florentes, mansuetas inter nationes eminuerunt. Inde namque mathesis, eloquentia, rerum naturalium peritia, rationalis & universalis philosophia, & cum primis Medicinæ studium in Italiam, & ex hac in reliquas Mundi partes commigrarunt; quarum pulcritudine captæ reliquæ gentes, non prorsus immani natura feroces, ita ad eas se transtulerunt, ut apud prudentes, gnarosque vivendi maiori quoque in honore forent, quæ magis in istis excellerent. Ratione siquidem longe discreti ab animantibus homines, quo ratiocinando magis, quam cæteri valent, eo magis & à feris distare, & ad divinas illas, immortalesque mentes propius videntur accedere, quibus nulla materiæ contagione fœdatis, quidquid perspicere datur, purum, ac liquidum, & nullius obvolutum erro-

[a] terrarum

ris

ris caligine pater. Quæ præstantium virorum ingenia, si quæ meditando possunt, ea omnia in Civium utilitatem disponant; ac flectant: æternum merito nomen inter externos affequantur, quod egregiis operibus sibi inter suos acquisierunt. Cui juvando, propagandoque, publicas, summasque potestates excubare præstat, ne subductis honoribus virtutum, & artium stimulis, conatus illorum langueant, ac torpeant, cœtusque mortalium, velut hebescente lumine, vagis opinionibus, ac pravis erroribus iactatus, atque perculsus in eam sensim agrestem negligentiam morumque barbariem relabatur, quam longo temporum intervallo summo labore, ac studio discussit.

Magno propterea in pretio solet Academia Taurinensis habere viros, quibus ea divinitus contigit ingenii & doctrinæ vis, ut profuturæ mortalibus eorum meditationes, & studia videantur. Quorum causa, quum *Josephum Brunum* adeo Physiologiæ, & Medicinæ vacavisse constet, ut profectu minime poenitendo eam artem colere, profiteri magno cum Civium & exterorum commodo queat, publicam hujus faciundæ potestatem ei de more concedere, post quadriennij tamen perfecti labores, atque pericula, æquissimum censuit. Quum enim viri in Philosophia præstantiam exploratam habere, quod vario experimento doctrinæ magister Artium primum, dein elementis

mentis Medicinæ diligenter arreptis, ejus facultatis Candidatus dictus, creatusque sit; & positis artis utilissimæ rudimentis, post longa simul, & plura de ipsius assiduo, jugique studio tentamenta, plenamque cognitionem Magistratus decreto privatim, publicè Collegij universi sententiâ Prolytæ cum honesta missione nomen adeptus sit, ad summum honorem non perduxit, nisi sero, & instauratis privato, publicoque specimine, liquidisque probationibus rerum medicarum peritiâ demonstratâ. Quamobrem hoc insigni virorum illustrium testimonio, comprehensisque cœtus universi consulto præconiis, in ævum permanens sic affectus est, ut parem virtuti mercedem retulisse videatur.

Quod *Josephus Brunus* ob ingenitam animo studendi cupiditatem in Academia Taurinensi per quadriennium operam in Medicina perdiscenda sollertem, nulloque labore, periculoque interceptam ita collocavit, ut de studiorum assiduitate testimonia diligentissime, & per legitima intervalla retulerit; quumque neque vigiliis pepercerit neque sudoribus, ut coepto molimini finem imponeret, & ob id ipsum (licet antea sæpè tentatâ, perpeniâ, exploratâ viri scientiâ non una pluries inire discrimina debuerit,) extremum ac cæterorum difficillimum subire periculum minime detrectaverit, acute, docte, sollerter omnibus respondendo

dendo, satisque interrogationibus de facultatis universæ partibus, & quæstionibus faciendo; quam ob causam amplissimum ab universo Magistratu præsentè decretum cum laude reportavit; demum, quod publicâ, postremâque disputatione, octo & quadraginta diligentissimè proprio Marte compositas, editasque theses & ritè, & more exposuit, impugnatas vindicavit, & rationum contrariarum pondus elevavit, aciemque argumentorum maximo cum assensu coronæ retudit; Collegio placuit *Josepho Bruno* lauream impertiri, cæteraque hujus rei causa permessa, darive solita præmia Clementissimi Nostri Regis auspiciis, nec non summarum potestatum jure, privilegiisque, quibus Academia nititur, ac illustratur, uti maximâ, optimâ, absolutissimâque lege concessa hætenus sunt, fuerint, viro præstantissimo dari, permitti, quæ cuncta, domi, & ubique proficiant: eique decori, & claritati sint, sicut quælibet honoris prærogativa cuique, qui eam optimo jure potestatè publicè nactus sit, competit, competitæ.

Hoc clarissimi ordinis judicium Præconis voce renunciatum nos comprobantes C. U. Medicinæ Professori curationem dedimus, ut honoris signa *Josepho Bruno* ex permessa nobis auctoritate tribueret, qui cum medicinæ Doctorem creatum renunciavit, postquam de laudibus ipsius sollemni recitata lau-

laudatione, libros clausos, apertosque dignitatis summæ, perfectæque symbola tradidit, inque cathedram perduxit virum docendi capacem, & aurei annuli jure tributo non perfectam libertatem, sed egregiam dignitatem, ejusque propriam exituram, & claram eidem indulgit. Laureâ deinde capiti datâ periculis omnibus egregie defunctum ostendit, quæ potiundæ virtutis causâ pluries subire certamina debuit. Eo vero modo creatum Doctorem, publicisque decoratum insignibus Collegium, vocibus consalutavit, osculo agnovit, necnon excepit amplexu.

Quibus plenam præstantes auctoritatem, & ea peramplo diplomatis testimonio confirmantes declaramus, *Josepbo Bruno* Artium Magistro, Medicinæ Candidato, Prolytæ, Doctorique creato potestatem esse artem Medicam ubique faciendi, & cum ea Philosophiam profitendi, docendi, cæteraque gerendi, quæ, quacunque lege, consuetudine, privilegio, Medicinæ, & Philosophiæ Doctores ubique gerere, habere, fruique conveniat; eique ad eos honores, dignitatesque aditum patefactum esse, quæ jure, moribusque Medicis, Philosophis, utrisque, vel eorum alterutris congruere potuerunt. Illud demum addimus, eidem honoris ergo, quem in Academico conventu suscepit, jus esse (dummodo id sibi convenire arbitretur) gentilibus signis, quæ habet, habebit, habuerit imponendi

reclu-

reclusæ symbola galeæ.

Omnia verò, quæ præscripta sunt, ut perpetuam firmitatem obtineant, hos Codicillos, seriem gestorum integram continentes exaratos de more concessimus, ut eorum memoriæ consulant, perpetuæque viri famæ serviant, quam nulla oblivio deleat, nec ætas aboleat, & familiæ ac patriæ nomen illustrent, demum & gloriam longissime proferant, & amplificent.

FORMULA QUINQUAGES. SEPTIMA

Juris Civitatis, quo Studiosi donentur.

QUoniam *Petrus Josephus Ressia Josephi Dominici F. Juris Civilis (a) & Pontificii auditor in Academia Taurinensi*, in hanc urbem regni, gentisque caput ea sese de causâ contulit, ut bonis artibus vacans, in ipsa æternum habeat domicilium, quo major Civium copia sit, qui nobiles disciplinas addiscentes, eas colant, propagent, & ornent, *Petrus Josephus Ressia* studiosus Romani, sacrique Juris in patria nostra Jure Civitatis lares obtineat, habeatque. Quæ propterea, nostris Civibus quoquo Jure, conveniunt, quominus *Petrus Josephus Ressia Josephi Dominici F. Civis* allectus præstare, tenere, possidere, facere queat, vim injuriamque fieri, Magistratus urbani, quisque sua pro Religione, & auctoritate permiffa vetabunt.

FOR.

(a) *vel Theologiæ Medicinæ &c.*

FORMULA QUINQUAGES. OCTAVA

Ejusdem argumenti ,

Pro Facultatum liberalium Professoribus.

QUod egregiis , magnisque virtutibus in Rhetorica (a) disciplina tradenda sollertia , facilitate, (b) in rebus Civitatis ornandis studio , & Eloquentia , in reliquis omnibus eruditione , doctrinâ , integritate , modestia N.N. U. C. in Taurinensi Lyceo Professor , bonorum animos sibi jure, meritoque conciliavit , quodque etiam ex ejus in hanc Urbem adventu , & mora studiosæ juventuti plurimum utilitatis accessit , & ornamenti , ob scientiæ varietatem , virique in Hebraico , Græco , Latinoque (a) sermone præstantiam , cujus rei causa ad cæteras electas Artes addiscendas adolescentes instructiores , & doctiores aggrediuntur; nec non ob alia , quæ pars optima populi lubens accepit , erga quem præcipuum semper obsequium , summam benevolentiam , & caritatem ostendit: Civitas , quæ vicissim amandis , colendisque præstantissimis viris , de se , suisque bene merentibus nemini cedit , ut Juvenes sapientissimorum hominû exemplo digna Italico nomine perpetrare pergant: N.N.U.C. eloquentiæ Professorē Civem allegere censuit , eo scilicet modo ,

* F

quo

[a] Physica , Logica , Theologia.

(b) *Hæc omitti possunt si nihil ad Cives, & Civitatem spectans ediderit.*(c) *Hæc facile pro arbitrio in alia mutaveris.*

quo, more majorum, non nisi doctissimis, fortissimisve viris, qui scriptis, factisque Rempublicam exornarunt, nonnunquam facere consuevit. Ea propter U. C. Rhetorices in Athenæo Professori ob ea decora mentis egregia, & scripta præclare [d] in urbe nostra Jure Civitatis, Aræ, focique sunt, uti fuere in urbe cunctarum Principe majoribus nostris, qui Coloniae prærogativa deducti in hanc uberrimam Italiæ regionem, Principibus postea suis, Civibusque felicem, inde bonis avibus emigravere. Civium votis M. O. annuat Deus, ut quam suffragiis omnium N.N.C.U. nactus est patriam, eandem eximiis ingenii documentis, & permansuris operibus illustrare ne desinat.

FORMULA UNDE SEXAGESIMA

Jurisjurandi, a Professoribus præstari soliti.

QUANDO Victor Amedeus Rex nos arcessivit, jussitque, ut in Academia bonis artibus, & præceptis Juvenes informemus, neque ob id Catholicæ Religioni, Patrum institutis, bonis moribus, Principum potestati, dictis, scriptisve officiamus, idque legibus sanxit, ob eam causam, quemadmodum iis legibus, ut hæc omnia fiant, comprehensum est, ita ex animi nostri sententia juramus, ita hujus rei ergo Deum, cuius hæc sunt, quæ tenemus, Evangelia, testem advocamus. Si scientes, prudentesque fallimus, vivos nos ipse
Deus

(d) *Si quæ tamen sint.*

Deus perjurii vindex ærumnis, lethoque
datos, pœnis afficiat. Ego *Franciscus Dominicus*
Bencinus S. Theologiæ Professor, ut his con-
ceptis verbis præscriptum est, ita per hæc san-
cta Dei Evangelia spondeo, ac juro.

LEGIS ACADEMICÆ PRÆCIPUA CAPITA.

CAPUT. I.

De Dei, eiusque Matris cultu.

Studiorum initium iij. Nonas Novembreis
esto : ejus rei causâ Lycei Rector,
Antecessores, Professores, Collegia, in
Academiam coëunt; inde pompam ad Divi
Johannis Aedem ducunt. Sacrificio sollemni
Deum castè pianto : vota pro felici doctrina-
rum exitu nuncupanto. [a]

Virgini Matri Athenæi Præsidi binas quot-
annis supplicationes habento, alteram viii.
Kalendas Aprileis in Divi Francisci & Paula,
alteram xviii. Kalendas Septembreis in ejus
Divæ *Consolatricis* templo; primâ in medio
laborum cursu Divæ præsens auxilium im-
ploranto; alterâ stadio illorum emenso, pro
beneficiis grates agentes, vota nuncupata sol-
vunt. (b) Quotidie duo in Academiæ Sacello
Sacrificia celebrantur : ad ea studiosorum or-
dines adcunt piè; ut rectè, & de more pro-
cedant, ejus Rector Academię curato. [c]

* F 2

Festis

[a] *Ex lib. 2. Regiar. const. tit. 22. pag. 201. &*
sequent, §. 39. (b) 43. (c) §. 30.

Festis diebus studiosorum in eâdem Ædícula conventus indicuntur: hymnis, psalmisque Coeli propitianto Reginam. Sacerdos brevi sermone concionem alloquitur: mysteria divina perficito. Modestè sacro in loco cuncta gerunt. [a]

Quæ ad Dei, Divorumque cultum pertinent, cætera Rector *Reformatorum* consilio moderator.

CAPUT. II.

De Academia Magistratum, & aliorum officio.

Legitima Lycei imperia sunt: Qui Professores, studiosos patrocinio defendere, ipsorum immunitates, jura, privilegia tueri debeat, *Academiae Conservator* esto: ipse moribus juventutis, Athenæi decori, litterarum propagationi, cultuique consulito. [b] Omnes justo regito imperio; siue privato, siue publico judicio inter Antecessores, Professores, Ministros, aliosque decertabitur, Quæsitore, & Judex esto. Longa prohibeto jurgia: de plano cognoscito, ni rei gravitas prohibessit. Nulla provocatio esto, extraquam si maior decem aureis lis aestimata sit: aut criminali judicio reus poenam in vinculis pati debeat menstruâ longiorem. Tum ad Senatum provocatione vocanto; nequa tamen provocatio civilem sententiam remorator. (c)

Si in H. L. (e) commissum fiet, inquireto,
&

[a] §. 31. (b) §. 2. 3. 4. 7. 8. (c) §. 4. §. 5.

(e) *hanc legem.*

& vindicato. Honoraria Professoribus eius subscriptione solvuntur; si muneri præstitutis temporibus Antecessor, Professorve defuerit, Accensus in culpam subscripto: ob desertam commentationem salarii ratam temporis respondentem *Conservator* multam dicitur; præterquam si morbo fontico aliâve justâ causâ Antecessor, Professorve prohibeatur. Multaticiam pecuniam in Lycei ærarium inferri iubeto. (a)

Quæ thesis in Academia disputanda fiet, nequa typis cõsignator *Conservatoris* iniussu. (b)

Ipsæ in Moderatorum consilio primas tenent. Moderatores Antecessoribus, Professoribus, Collegijs, studiosisque præsumunt. Quæ dubia in Academiæ constitutis fuerint, (c) interpretantur.

Singulis quibusque mensibus consilium indicitur *Conservator* semel, pluriesve. Anno studiorum labente idem vocato: quas anno sequente doctrinas tradi oporteat, oportebit, de Professorum sententia constituunt (d).

Religioni Dei Opt. Max. nequid absolum doceantur Adolescentes, neve Principum majestati contrarium, vident Moderatores: ob eam rem semel quotidie commentationibus Professorum audiendis in orbem vacante singuli: quantum studiosorum quisque proficiat, attendunt: Juri, modestiæque,

* F 3

loci.

(a) §.45. (b) §.8. (c) §.9. & 10. (d) §.12.

locique reverentiæ nec congruentia coërcen-
to. [e]

Vacantia Professorum stipendia ad Athe-
næi ærarium conferunto. Pecunia ex fide ab
Ærarii Præfecto servata in utiles erogator li-
brorum impensas. (f)

Ut H. L. (a), quæve alia in posterum
rogata fuerit, servetur, neve adversus
eam fiat, sententiamve ejus, ab Aca-
demiæ Magistratu Fisci Patronus, & Censor
in tempore diligenter exposcito. Eo nec au-
dito, quod Academiæ, suæque interesse vi-
debitur, nihil agunto. (g) Scripta typis
mandanda ipse sollerter examinato: noxias
Principum Juribus, Regni tranquillitati, &
Lycei dignitati contrarias opiniones oblite-
rato. De ea re Quæstorem sacri Palatij, quem
magnum Cancellarium dicunt, facito cer-
torem.

Kalendarium, Academiæ Censor de Mo-
deratorum sententia quotannis absolvito:
dies, studiorum tempora, doctrinasque tra-
dendas rite describito. Commentarium stu-
diosorum ex tabulario descriptum habeto:
eorum nomina, patriam, hospitia, moref-
que censeto. Moderatores de his postremis
monitos facito. (a)

Lycei Rector creandus à Principe, prius
à Consiliarijs inter studiosos aliquot nomi-
nator

[e] §. 13., & 14. (f) §. 15. (g) §. 16.,
& 17. (a) *Hæc lex.* §. 19., 20., & 21.

nator. Trium, ex quibus unum deligere Rex possit, hi nomina designanto. Ut Consiliarij creentur, quatuor è condiscipulis suæ facultatis scripto studiosi singuli apud *Conseruatorem* edunto. In quos sine fraude plurimi consenserint, ijdem jure creati sunt. Ex tribus disciplinis Theologica, Legitima, Philosophiæ, & Artium, duodecim eliguntor. (b)

In sollemnibus Rector prætextam togam, & infulas, in reliquis de more puram induito: contentiones non ingenij exacuendi gratiâ susceptas, & turbas sedato. Ad Academicas dignitates nullo suo dispendio, vel suorum adsumitor: eique alium legendi, qui nullâ impensâ honores assequatur, facultas esto. [c]

Præfecto Bibliothecæ, minores Bibliothecarij, & Custodes parento. Quærendorum illustrium operum ei curatio esto. (d)

Quotidie tribus horis ante meridiem, totidemque post meridiem faciundæ librorum copiæ in Athenæo Bibliothecarij, & Custodes versantor. Ferijs, pomeridianis horis labori parcunto. Ab Idibus Octobribus ad iv. Nonas Novembreis vacationem integram ab eo munere nanciscuntor. (e)

Scriba Academiciæ tabulario præficitor:

* F 4

acta

(b) §. 23., 24., 25., & 26. (c) §. 32. 33.

[d] §. 34. (e) §. 35.

acta judiciorum excipito, & gesta consilij :
in tabulas cuncta referto. (f)

Diebus fastis in Archigymnasio semper
adepto. Pecuniæ pro impensis Academicis
expendendæ descriptum publice modum ha-
beto. (g)

(f) §. 36. [g) §. 36.

C A P U T. III.

De studiorum ordine.

Primum studiorum diem annua oratione
Eloquentiæ Professor auspicator : bre-
viori Fisci Patronus, & Censor commemo-
rato Antecessorum, & Professorum officia.
Quod singulis annis Rhetoricæ Professor, id
semel novi Antecessores, Professoresque ini-
tio præstanto : exinde uti libuerit, ita vel
de facultatum præstantia, & utilitate præsan-
tor, vel pridie Nonas Novembreis ad enu-
cleandas bonas artes statim aggrediuntor. (b)

Horæ, & quadrantis spatium commenta-
tioni præscriptum esto : hoc intervallo dicta-
re, scripta Professores explicare, ipsorumque
jussu tradita memoriter recitare debento stu-
diosi. [c]

Hebdomadis supremo die disceptandam
thesim illi legunto : hanc aliquot ante die-
bus Studiosus, cui id negotium datum est,
pro foribus promulgato : ejusdem disputa-
toris nomen inscribitor. In eam à Professore
desi-

(b) §. 39. (c) §. 46.

designati dicuntur Candidati ; postea cuique discipulorum ad exactum usque temporis spatium ratiocinandi jus esto. Matheſeos , Eloquentiæ , Professoresque linguarum, quibus ea ratio convenire nec videatur, auditores aliter exercento. (d)

Anatomes Professor annali spatio artis præcepta doceto. Ipse, postque eum Chirurgus , hyemali tempore docendæ Juventutis ergô , humanum cadaver singuli disseccanto. [e]

Dies xviii. kalendas Septembris studiorum suprema tempestas esto. A kalendis Quintilibus ad id tempus , Antecessores , Professoresque antemeridianis horis, alternis docento ; pomeridianis, disputationibus publicis , alijsve exercitationibus operam danto. Emenso studiorum curriculo , scriptorum explanatorum descripta exempla singulis annis in Bibliothecam conferunto. (f)

(d) §. 48. , & 54. [e] §. 49. (f) §. 57. 58.

C A P U T. I V.

De privilegijs Academicis generatim.

Qui adolescentes ad Academiam confluant , nequi studiosorum nomine, ac Jure dignantur , ni prius nomen togatæ militiæ dederint , inque Commentarium Athenæi relati fuerint , eaque de causâ Codicillos acceperint , terque singulis annis diligentia testimonia à Professoribus retulerint. De studiosis neque sollertibus , neque modestis

destis, sibiue obsequentibus Professores testimonia ne perhibento. (b)

Magistratus, Professores, Domestici, Auditoresque eorum, & administri Lycei immunes à cibariorum, librorumque vectigalibus sunt. In conducendis sine fraude domibus sunt cæteris potiores: ejus rei causa pensiones, ne cui augere liceto; omnes à tutelis, curis, præbendis militaribus hospitij, publicisque muneribus excusantor. (c)

Qui Antecessores in Academia per annos quinque jura professi sunt, erunt, fuerint, quominus eis de jure Judicibus respondere, adfidere, magistratusve capere sine Senatus cognitione liceat, ne prohibentor. (d)

Doctorum tria sunt Collegia, Theologorum, Jurisprudentum, Medicorum. Eis ex H. L. convenire, ac nova instituta condere, quibus nihil H. L. obrogetur, derogeturve, liceto. Duos Academicorum honorum postremos gradus hæc tribuunt. (e)

Academicarum dignitatum gradus quatuor enumerantor: ijs insignitos artium Magistros, Baccalaureos Candidatosve, Prolytas, Doctoresque nominanto. (f)

(b) §. 59. & 60. (c) §. 61. [d] §. 62.

(e) §. 63. 64. 10. (f) §. 65.

C A P U T V.

De communibus Academicis honoribus tribuendis.

Artium Magistrum extitutum, *Conservare*, ejusve jussu, alio præsentente Moderanda-

deratore (g) Philosophiæ Professores de Logicis institutis interroganto; extra quam, si Medicam artem profiteri volet, tum enim Physiologicorum præceptorum expertem ab hoc ingressu dignitatum arcento.

Qui Candidatum gerere volet, post Theologicas, Legitimas, Medicas institutiones annuali spatio acceptas, de ipsis reddito rationem. In ejus scientiam *Conservatore*, *Moderatoreve* præsentem, tres à primo delecti Professores inquirunto. Semel renunciatus in Academicis conventibus ne recitare, ac disputare vetatur.

Prolyta ante tertium studiorum annum nemo creator. (a) Contra ejus studia triennio peracta, Collegij Præses, lectiq; duo Professores, Doctorq; in idem Collegium cooptratus probandæ doctrinæ gratiâ duarum horarum spatio decertanto. Interrogatione perfectâ, qui interrogarunt, eunto in suffragia: Moderator illa dirimito. Idoneum Candidatum, quo publico periculo iterum experiatur, decreto prosequitor. Candidati repulsam passi nulla in tabulario memoria servator: (b)

Candidati privato facto cum laude periculo, publice in Aulâ disputanto, Antistite sacrorum, Vicariove ejus, pro tribunali rem cognoscente. Ejus facultatis Professores, Doctoresque in Collegium adsciti, designato-
rum

[g] §. 66. (a) §. 67. (b) §. 68. 69. 70. 71.

Nova Const. anni 1724. cap. 1. §. 84.

rum Prolytarum Judices, Censoresque sunt. (c)

Disputationi, trium annorum, quod peregerunt, studium esto materies. Eam ob rem ex traditis doctrinarum partibus exquisitas quæstiones unoquoque anno Professorum judicio delectas, in urnam conjecito Conservator. Senas ex illis sorte ducunto: exque ijs, quas sortiti fuerint, octo & quadraginta publicè disceptandas theses Professoria censura haud notatas designati Prolytæ eliciunto. Has typis consignatas, post dierum quindecim intervallum, ab ipsa sortitione à trium Prolytarum argumentis tuentor. (d)

Academicorum honorum ad summum, supremumque gradum nequis ascendito, nisi exacto quadriennio à cœpto studio Theologico; Medicove: quinquennio, ab acceptis Jurisprudentiæ rudimentis. Hujus temporis profectum lecti judices quatuor nec pauciores, Magistratu universo vidente, privatim investiganto. Ea quæ H. L. [e] præscripta, imperataque Prolytis fuere, fuerint, cuncta servanto. Hoc modo probatâ Prolytarum doctrinâ, privatim, ac publice laurea donantor pro concione, & præconijs afficiuntor, domum cum plausu redeunto.

CA.

(c) §. 74. (d) *Nova Const. cap. 1.* [e] §. 77. 78. *N. C. cap. 2.*

C A P U T. V I.

De peculiaribus honoribus deferendis.

Qui simul ac lauream adeptus fuerit, in Collegium cooptari volet, id ei ex H. L. fas esto. Sed privatim ter, publicè bis Candidatus auditor, antequam eam ob causam honoris ergò mittatur à studiis. Mensis unius spatio, bis ejus privatos inter parietes disquiruntò doctrinam. (a)

Quantū tribus annis profecerit, prima interrogatione Professores H. L. delecti, Præses, Doctorque Collegii periclitantur. Trium horarum spatio ejus sedulò consideranto scientiam. Hæc si probabilis fiet, eum videri Jure in hoc ingressum esse curriculum, interloquuntur. *

In præceptis, institutisque unius anni tempore traditis, interrogatio secunda versator. Ea seligere Judices ipsi debent post primas privatim acceptas Candidati responsiones. Quantum in prima temporis impendi H. L. oportet, in hac tantum infumitur. [b]

Privatas hæce probationes excipito publica disputatio, cuique Prolytæ designato promiscua.

Ad tertiam privatam Judicum de profectu disquisitionem, Candidatum postea vocanto. Hæc primis tempore parilis, amplitudine maior esto; universæ doctrinæ præcipuas quæstiones amplectitor. (c)

Quæ

(a) *N.C. cap. 3.* * *Ibi.* (b) *Ibidem.* [c] *Ibidem.*

Quæ postea habenda erit publica disputatio, privatis spatio temporis par esto. Enunciationum duplo maior numerus esto, quàm earum numerus fuit, quas Prolytas non hoc jure designatos typis mandare, & de quibus disceptare convenit. Hisce perfunctum Candidatum à studiis honoris ergò mittunt, insignibus exornant. (d)

Qui præter hæc, Doctoris peculiare nomen, & Collegii jura nancisci volent, hi demum cum Præsidente Collegii, Professoribus tribus, ac Doctore in idem Collegium adscripto congregiuntur. De integra (e) doctrina quatuor, vel quinque annis accepta Prolytæ respondent. Horis hoc modo tribus supremo, maximoque proludunt certamini.

Pridie eius diei, quam postremum experimentum facere debeant, ex summis, præcipuisque totius disciplinæ quæstionibus duas Prolytæ sortiuntur. Has quatuor & viginti horarum spatio diligenter explicando, scriptisve, typisve vulgant. Ea de causa in Academiam secedunt: nequem ea tempestate, præter Bibliothecarium alloquuntur. Postridie quam sortitò quæstiones evenerint, senis horis in Academia, ante meridiem ternis, post meridiem ternis publicè differunt. Antemeridiano tempore binis cum Professoribus, Doctoribusve Collegii, *Conservatoris* arbitrio, de prima quæstione proposita; pomeridiano, cum
toti-

[d] *Ibidem.* [e] *N. C. c.4.*

totidem de altera decertanto. Perfectâ ea concertatione, necdum exacto tempore disputationi præstituto, alii Conservatoris mandatu è Professorum, Doctorum, Prolytarumve numero destinantor, qui aliis de rebus neutiquam binis illis quæstionibus comprehensis, quibus rebus Prolytæ integro cursu operam dare debuerunt, ad finem usque disceptanto. (a)

Theologi, Jurisperiti, Medici, qui scientiæ hæc pericula faciant, fecerint, ii peculiari nomine, ac laureæ Jure fruuntor: inque Collegium H. L. cooptati sunt, nullâ præter laborem impensâ: eorumque præcipua ratio in Regni Sacerdotiis, Magistratibus, honoribus obtinendis habetor. (b)

C A P U T. V I I.

Communia de Honoribus Academicis.

IN quem studiosum, Magistrum Artium, Candidatum, Prolytamve, quum honores petit, petieritque, privatim, ac publice Professorum, Patrumque suffragia plura consenserint, ei ex H. L. præmia deferunto, præterquam, si peculiaribus honoribus studeat; eum enim privatim interrogatum, si duo ex quinque, publicè disputantem, si tres è duodecim rejiciendum censent, censuerint, a publicis Academiae dignitatibus amovento (c)

Nequis in Collegium cooptatus, lectusque esto optimo Jure, ni publicis in Academiae conventibus ob honores Juventuri concedendos,

(a) *Ibidem.* (b) §. 94. (c) *N. C. cap. ult.*

dos, indictis tribus annis frequentes adfuerint, jussuque *Conservatoris* in eis peritè nec disputaverint, deque ea re Præses Collegii, duoque Professores jurati testimonium post trienniū dixerint. (a) Qui contra faciunt, faxint, Judices doctrinarum ne sunt, prærogativâ eorum propriâ, emolumentis, ac suffragii Jure privantor.

Si quis ante H. L. latam laurea donatus in Collegium adscisci volet, eidem ita Jus esto, si privatim interrogatus severis Judicibus satisfecerit, postremo sollemnique periculo raræ doctrinæ specimen dederit: triennialique spatio simili modo frequens fuerit, ac disputarit. (b)

Pauperies ne cui fraudi, ignominiaæve fuat; egenum, sed probum Juvenem, & diligentem gratis omni Academico honore dignantor. [c]

Si quid justum, legitimumque in causâ fuerit, quare cui gradus petere, obtinere necesse fiet, studia extra Academiam, urbemque Taurinorum Augustam perficere debuerit, si tamen præstituto hac lege temporis spatio ipsum disciplinis operam dedisse comperitum erit, E. H. L. N. R. (d)

SAN-

[a] *Ibidem.* (b) *Ibidem.* (c) §.62. (d) *Ejus hac lege nihil rogatur.*

S A N C T I O.

Qui Antecessores, Professores, Studiosi in eam Academiam venerunt, veniunt, venerint profitendi, addiscendive bonas artes causâ : quive Augustæ Taurinorum ob id morantur : quive in Collegia cooptati suo, vel quo alio jure, sine dolo malo, fuerunt, fient, erunt, universi, singulique in peculiari Principis fide, clientela, patrocinioque funto. (a)

Si quis contra H.L. facit, faciet dolo malo, quominus honores Academicos in ea petat, petierit, quo aliâ in Academiâ sine longo labore, multâque doctrinâ eosdem obtineat, obtinueritve, id ei fraudi esto. Neve propterea docendi, consulendi, judicandi, remve medicam faciundi, adque honores illorum causâ obrepenti, Jus esto. Neve acceptæ potestatis ergô, quid facere, præstare, petere, obtinere liceto. [b]

[a] §. 103. [b] *Ibidem.*



98
F O R M U L A R U M
E T O R A T I O N U M

LIBER SINGULARIS.

PARS ALTERA

ORATIONES CONTINENS.

De Pontificii juris addiscendi necessitate,

O R A T I O P R I M A

Habita in Archigymnasio Taurinensi

Anno MDCCXXI. VII. Idus Novembris.



Uum omnia bene, & prudenter
A. O. ab Inviſtiffimo, & Augu-
ſtiffimo Rege noſtro conſtituta
ſunt, ut Taurinenſis Academia ad
priſtinam laudem, ſplendoremque revoca-
retur, tum nihil ſtudijs veſtris accommoda-
tius eſſe mihi videtur, quàm quòd impera-
vit, ut illi nempè qui ad optimas tradendas
artes huc invitantur, primo quoque tem-
pore, veluti concione advocata, quid do-
cturi, de quo diſputaturi ſint, ex hoc am-
pliſſimo ad dicendum loco proponant, &
explicent. Quæ res, ut vobis miram præte-
ritis his temporibus delectationem, & ube-
rem fructum adoleſcentibus attulit, quum
plura doctè, & eruditione priſcâ referra,
multa diſertè, & pluribus ornata luminibus
orationis, nonnulla quoque feſtivè, & urba-
nè dicta audiebatis, ſic vereor, ne mihi de
Pontificio Jure dicenti hæc omnia contraria
reperiantur, ita loci majeſtate commoveor,

& tot illustrium virorum frequentiam extimesco ; quum præsertim in eloquentia parum præsidij collocarim , & disciplina ipsa , velut studium severum , & grave , majus quiddam esse videatur , quàm quod à junioribus scitè , & commodè pertractari queat . Licet enim summa forent in me adjumenta doctrinæ , quod certè mihi nunquam arrogaverim , temporis quidem satis non habui , ut omnino paratus , & instructus ad dicendum accederem . Quare ita me audiat , rogo , obtestorque , ut hominem , quem usu , copiæque dicendi omnibus , qui dixerunt , inferiorem esse censeatis , diligentiam verò , cui soli confidere consueverim , ita moderiter usum , ut neque præ temporis angustijs diu meditata possim afferre . Parendum enim clementissimi , fortissimique Regis imperio , mos gerendus Principi fuit , & liberalium disciplinarum reparatoris agenda omnia ad præscriptum fuere ; illius , inquam , cui non modò libertatem acceptam referre debeamus , verum etiam bonæ artes omnes priscam dignitatem , atque splendorem . Sed , ut de reliquis sileam , quæ mihi vobiscum esse communia solent , illud præcipuum Regis beneficium , ac penè Divinum præterirem ingratus , quo me non solum cæteris juniorem , sed etiam , qui nullo modo , aut ingenio , aut exercitatione , aut gloria , cum his clarissimis disciplinarum doctoribus con-

ferri possum, tradendæ ei facultati præfecerit, in qua de maximis rebus agitur, quibus tanquam præcipuis fundamentis Respublica nititur, quum eis sacrorum omnium, & Sacerdotij Jura sanctissima, & utilissima contineantur. At quemadmodum tam singulare, tamque præstans munificentissimi Regis beneficium majus esse cognosco, quam ut ei pares grâtiâs habere queam, ita dabitis veniam, Auditores, si de optimi Principis æternis laudibus, quas dicendo haud consequi possem, nihil dixero, ut ad rem ipsam, cujus negotium mihi datum esse videtis, statim digrediatur oratio; in qua non quis ego sim, aut quid efficere possim, considerandum vobis est, sed quàm necessarium Reipublicæ hujus disciplinæ studium sit, quo nobilissima Juris publici pars explicatur. Quare tota ad vos, Juris Candidati convertetur oratio mea, vos rogo, quæsoque, ut me attentis animis audiatis; nam si eam esse Pontificij juris necessitatem vobis ostendero, quam demonstraturum me esse polliceor, sic ejus disciplinæ desiderio raptum vos iri mihi persuadeo, ut neque prudentissimi Regis auctoritati, qui hæc studia impensissimè fovet, neque parentum, & amicorum expectationi, neque majorum vestrorum exemplis deinceps vos defuturos esse confidam.

Haud tamen vereor, Auditores, ne vos, quod aliqui impiè faciunt, & imperitè, omnem

nem vim Juris à sacrorum Comitiorum receptis sanctionibus, & Pontificum placitis abjudicetis; quum tot, tantisque præceptis summis ex sacrorum Conciliorum decretis, Pontificumque rescriptis, Christianorum societatem uti, regique videatis. Illud dico nullam omnino legem, nullum Jus esse posse, cujus notitiam haberi Reipublicæ non expediat. Quid enim tam absurdum, & tam rationi contrarium aut intelligi, aut excogitari potest, legem esse, cui parere necesse sit; qui autem vim legis teneat, interprete-
turque, nullum esse oportere? Quomodo Magistratus jus dicent ex legibus: fontes pœnam metuent, qua deterreantur ab improbè factis: boni quid sequi debeant, non ignorabunt, si nemo sit, qui earum vim percipere debeat? Aut igitur nulla lex erit, vincula societatis humanæ potissima dissolventur, totum jus, quod ad sacra pertinet, tolletur penitus, & abrogabitur, sacrificiorum, Sacerdotij, rerum omnium divinarum usus, ritus, memoria negligetur, & obsolescet; aut Jus Pontificium sciamus necesse est, ad cujus exemplum, & normam Respublica componatur. Rectè sanè, sapienterque Lycurgus, quum omnia Lacedæmonijs jura dedisset, vetustissimorum exemplo mortalium sanxit, ne severissimæ leges scriptis mandarentur, sed illas cives memoriâ custodirent, quo facilius converterentur in

mores; nihil enim referre putavit divinus homo, utrum populus leges haberet, quas ignoraret, an incerto jure uteretur, ritumque ferino sylvas, & saltus incoheret. In omni quoque bene constituta Republica, id vel cautum sanctionibus est, vel moribus ipsis invaluit, ut leges omnes, & jura promulgentur, & non modò sint, qui eas legere, & addiscere possint, verum etiam qui jus interpretentur, & tradant, ne civilis societas tam necessario, tamque firmo præsidio carere videatur: unum dumtaxat Jus Pontificium esse dicemus, cui quum obedire teneamur, quo quum Sacerdotij, & sacrorum jura contineantur, tamen non necessarium, non addiscendum, non diligentissimè memoriæ commendandum, imò negligendum, spernendumque arbitremini?

Negant quidam Pontificium jus ad civilem societatem ullo modo spectare, negant publicum civitatis respicere statum. Sed quo in loco id affirmare non dubitant? in hac urbe, in hoc præclarissimorum virorum conventu, & corona, in qua quum omnes sint, qui varia polleant eruditione, & doctrina, illud tamen tanquam præcipuum sibi plerique vindicant, ut majorum suorum exemplo de Juris Pontificij percipiendi necessitate optimè sentiant! At primùm ab istis quæro, nullam nè civilis juris, cujus causâ hæc dicunt, esse necessitatem agnoscant

scant? Neminem inquiunt, tam amentem esse posse, qui non fateatur, jus civile, & leges, quibus utimur, non utiliter modò, sed necessariò quoque junioribus tradi. Si enim nemo esset, quem eas doceremus, brevi non solum in tribunalibus solitudo, vastitas in civitate fieret, verum etiam æqui, & boni ignorance, justitia à privatis domibus, foro, delubris, urbe, imperio cum cæteris virtutibus exularet, quum bonæ causæ justus Judex, innocenti defensor, legibus vindex, humanæ societati civile vinculum, quo omnes obstringimur, & concordem vivimus, quadam veluti amicitia, & caritate conjuncti, deesset: improbis nocendi aditus patefieret, injurijs, cædibus, flagitijs omnia redundarent, nihil inviolabile, nihil sanctum reperiretur, quod furor, audacia, dolus, astutia non expugnet, violaret, subiret, invaderet, & divina, humanaque omnia permisceret.

Quòd si tantam juris, & legum, non utilitatem modò, sed etiam necessitatem esse dicunt, quanta vel mente comprehendere, vel explicari vix possit; quis vestrum dubitabit, Auditores, quin cum primis necesse sit, sacrarum doctrina rerum juvenes instrui, ac informari? Nec enim Pontificium Jus à reliqui civilis Juris veluti societate, & consortio est abstrahendum, quasi diversæ sectæ, vel disciplinæ duabus illis oculis continean-

tur. Quum enim non à quo rogatæ , vel quo modo latæ sint leges , considerandum sit , ut earum diversitas intelligatur , si ejusdem populi consensu pro utilitate Reipublicæ promulgentur , omnibus profecto compertum esse poterit , quum Jus utrumque communibus Christianorum commodis , salutique prospiciat , Jus potius unum id esse , quod ex diversis conflatum præceptis , institutisque , quasi ex multis fontibus flumen promanasse videatur. Nam ita à Christo Deo , ac Servatore nostro res Christiana constituta est , ut pace nempe stare , concordiam semper , & caritate cresceret , & unanimi populi consensu firmior permaneret. Unde Johannes , cui auream ob eloquentiam Chrysostomonomen fuit , vir ut dicendi genere , ita vitæ sanctimoniam præstantissimus , recte dicebat , nihil de civili societate detractum per Christi legem , nihil dentum de veteri hominum , & communi consuetudine vitæ ; præcepta tantum præscripta , quibus virtutes fierent sanctiores , hominesque non metu poenarum , & cruciatuum , sed pulchritudine ipsa virtutis ad honestatem invitarentur. Quamobrem humanum genus , quod amicitia , & miti ingenio societatem inivit , in qua legum vinculo tenebatur , ex Christi præceptis majus sibi , multoque validius præsidium comparavit. Quid est enim , cui magis prospexerint humanæ leges , quam populorum felicitati , quid est

est quod sit sancienda civili concordia accom-
modatius, quam neque vim, neque inju-
riam facere, scelera odisse, amicum juxta,
inimicumque diligere, omnes beneficijs, &
caritate prosequi, quæ cuncta divino illo,
& Christiano Jure sunt constituta? Quod
quum totum migravit in Romanum Impe-
rium, ex duabus veluti Societatibus corpus
coaluit unum, vinculo caritatis, atque vir-
tutis, quam civitatis jure coniunctius. Uni
igitur Societati, cui idem finis, eadem vo-
luntas, eademque Religio, quis negabit
unum quoque jus esse ex sacris constans, &
civilibus legibus?

Atqui, inquit, ex diversis potestati-
bus humanæ sanctiones, & Pontificia decre-
ta profluxere; quasi Romanæ leges, quæ à
diversis, & potestate & ordine magistra-
tibus latæ sunt, eandem vim penitus non
habuerint. Quid tam distinctum priscis tem-
poribus, quam Ordo amplissimus à Plebeio?
Nulla auspicia, nulla sacra, nullæ dignita-
tes, nullum connubii jus inter eos; quis ve-
rò non sine summâ juris civilis ignorance
dixerit, plebiscita, quæ plebejo Magistratu
rogante sciscebat populus, jus civile non fuis-
se, quod ad summum ordinem non perti-
nerent? Sed & illud, Auditores, providete,
ne si eam ob causam Pontificium Jus civi-
lis Juris partem esse negetis, nullum omni-
no Jus reperiatur, quod civile sit appellan-
dum

dum. Jurisprudencia namque Romana, quæ septingentis fermè annis floruit incorrupta, auctoribus priscis illis Pontificibus in lucem prodiit, in quorum sacrariis, ac penetralibus abdita, antequam [a] Gn. Flavij Scribæ operâ divulgaretur, originem cepit, & adolevit. Neque enim vetustis temporibus de jure respondere cuiquam licuisse satis constat, nisi Pontificibus illis, qui jus civile, quod interpretatione coeptum, & auctum erat, tamquam rem aliquam sacram custodiebant. Sed an putatis brevi temporis spatio hanc veterem consuetudinē tenuisse? Centum annorum curriculo hac vivendi ratione usa est Romana Respublica, donec Flavius ille reperiretur, qui subtractum à Domino librum de legum actionibus pertractantem populo dederit, ut arcana illa Jurisprudencia, quæ tanquam aliquod ex Eleusiniis mysteriis diu latuerat, tandem publicam lucem aspiceret. Morem pene dicam veterum illorum tenere Romani Pontifices, qui plures, & difficillimas quæstiones ita definierunt, ut magnum Romanis legibus ex hoc nostro Jure incrementum accesserit. Si igitur spectemus auctores (liceat mihi, Auditores, profanis sacra; veteribus nova componere) à Pontificibus jus civile bono publico coepit, si res, quæ pertractantur, etiam ea comprehendit

[a]. Pompon. l. 2. de orig. Juris. A. Gellius Noct. Atticar. lib. 6. cap. 9.

hendit , quæ sacra sunt. Neque, ut hoc probem , aliquis mihi veteribus ex Pontificibus ab inferis est excitandus. Quid enim testimonio Ulpiani præstantius , quid evidentius , dum ait , Jus civile , quod aliud publicum , aliud privatum est , in sacris , & Sacerdotibus quoque consistere ? Prætereo M. Tullij Ciceronis oratoris clarissimi testimonium , neque mentionem faciendam arbitror earum legum , quæ in Codicem sunt relatæ , ad sacra spectantes , Antistitesque sacrorum . Id solum , quod contendo , mihi concedatis oportet , quum Juris civilis summa necessitas sit , & eiusdem potissima pars Jure Pontificio comprehendatur , maximam esse quoque addiscendi Juris Pontificij necessitatem.

An verò hæc tantum ad eos pertinent viros , qui procurandæ religioni operam omnem impendunt , & quemadmodum plerique rerum prorsus ignari censent , à Jurisconsulto sunt aliena ? Immò sine horum cognitione , neque eum Jurisperitum existimem , qui vel totum id , quod prisce legum Interpretes , & Principes omnes , vel constituerunt , vel litteris aliâ de causâ consignarunt , intelligat , teneatque memoriâ ? Egone illum prudentem existimarim ; cui doctrina desit ea , quâ de ritu Matrimonii , de ipso inhibendo , dirimendove , de divortiis , repudiisque , de religiosis funerum , de asylorum jure , de immuni-

tatibus

tatibus templorum, ac ministorum, ut reliqua sanctiora præteream, consulere, judicare, jura reddere debeamus? quæ omnia de prisco jure detracta novis, sacrisque legibus melius, uberiusque sunt constituta! Audivimus ipsi nos, audivimus (proh pudor ætatis illorum, & muneris!) viros apud suos, qui à nobis, non remotissimi sunt, summæ opinionis, & famæ, quibus non imprudentibus talia sæpè exciderunt, quorum & juniores, & vix Jurisprudentiæ rudimentis imbutos, summo perece puduisset. Hos ego Jurisconsultos: hos sapientes appellem? his bona, famam, vitamque civium credendam opiner?

Quod ergo, Deus immortalis! Ius profitentur? id quod civile videri volunt, quum tamen partem ejus sanctiorem, & utiliore abjiciant, quasi peregrini Juris, ac barbari! At si privatarum legum studium adeo necessarium credunt, ut nihil magis esse videatur, quid de publicis existimare non debent? si jura quæ de profanis, abjectivæ rebus non raro disponunt, maximo in pretio habere solent, cur sacra, & divina contemnunt? An plurimi duci debent hereditatum, dotium, stillicidiorum, fontium, fluminum (nequid aliud humiliter proferam) leges; negligi verò quæ pertinent ad Sacerdotia, Sacramenta, Sacrificia, augustissima, sanctissima, & maxima totius Religionis, ac Reipublicæ fundamenta? An Severi, Caracallæ, Diocletiani, Papiniani, Pauli

Paulli, Ulpiani sanctiones, & responsa plurimi fient; Nicænorum, Chalcedonensium, Byzantiorum Patrum; Cypriani, Arhanasii, Augustini, Leonis, Leonique similium decreta, & sententiæ parvi pendentur? Quæ civilem societatem respiciunt, quâ solum ab animantibus feris usquequaque distinguimur, toto pectore complectemur; nihili verò ducemus, quæ sanctorum respiciunt communionem, quâ ab Hæreticorum, & Judæorum conciliabulis, quâ ab Ethnicorum, & Barbarorum coetu dividimur, à Religione superstitio determinatur, à pietate scelus, impietas segregatur?

Sed si in omni societate civili ea magis sunt retinenda, quæ publicam tranquillitatem, salutemque respiciunt, quàm quæ privatas copias, & fortunas, eo magis necessarium Pontificium ius esse constabit, si sacris legibus æquabiliter constitutis, non modò florentem, atque beatam, verum etiam salvam, incolumemque Rempublicam habeamus. Quoniam verò duabus potestatibus populus regitur, sacrâ, atque civili; tum demum salvæ res erunt, si utraque certis finibus concludatur, qui a Christo inter utramque sunt constituti, neque altera vim patiatur ab alterâ, neque concordia illa divini amoris afflatu firmanda pessimo publico dissolvatur. Nulla enim capitalior pestis humano generi potest accidere discordiâ omnium potesta-

testatum, quâ pacis status convellitur, & salus publica periclitatur. O dolendam, Auditores, temporum illorum memoriam, quibus vel hujus disciplinæ ignoratione, vel illorum qui propria auctoritate abutebantur, nequitia perniciosæ illæ controversiæ sunt agitatæ de sacrorum potestate Antistitum, quæ in diversa totam traxerunt, & lacerarunt Ecclesiam! Nonne quidem græcas regiones hæc exitiabilis pestilentia ita pervasit, ut cum Byzantino Antistite, tota demum a verâ, concordique Christianorum omnium societate Orientalis plaga descisceret? Nonne sapius his controversiis pacem regnorum everfam, Jura sanguinis perturbata, ferro ignique vastata omnia, atque consumpta, Rempublicam civili maduisse sanguine, vel legimus, vel audivimus? Unde hæc invecata calamitas, flamma, perniciēs, unde tot mala, nisi hæc, quæ diximus, statum Reipublicæ respicerent universum, nisi hoc jure æquissimè constituto, tota staret Christiana Respublica? Nempe juvat Pontificii Juris arcana cognoscere: juvat auspicatorum decreta Conciliorum, sanctorum Patrum, atque majorum nostrorum tradita; juvat sapientissimorum Pontificum jussa, monita, rescripta perpendere; unde innotescat, quibus finibus Sacerdotum dignitas, ac potestas terminetur, ne perperam civiles Magistratus, quamvis summo præditi imperio, in ejus fines irrumpant; neque contra

Sacerdotes, quod est omnino civilis regiminis, affectent, arripiant. Quæ igitur major disciplinæ necessitas esse potest, quàm nostræ, qua non pervulgatarum rerum doctrinâ traditur, sed publicarum, maximarumque, quibus stantibus, stat Respublica, & corruiit prolabentibus?

At neque illud prætermittendum esse putem, ex Pontificio Jure regulas omnes esse petendas, quibus corruptissimi Christianorum mores ad justitiam dirigantur, ne tanquam incerti vagemur in tenebris, aut voluptatum dulcedine illecti feramur ad vitia. Et quidem, si verum fateri volumus, Auditores, nihil est magis Christiano homini necessarium, quàm sese componere ad majorum exempla, ut in hac vitâ, in qua, velut hospites sumus, a viâ virtutis, & æquitatis ne deceremus. Ita enim naturâ comparati esse videmur, ut quamvis honestatis causâ omnia nos facere debere profiteamur, tamen perturbationibus animi sæpius inducamur in fraudem, & quod bonum sit, in corporis voluptate, & doloris amotione perquiramus. Unde semper in deteriora prolabimur, exundante quotidie vitiorum colluvie, & rationis lumen, quo rectum sequi debemus, & ad honestum pervestigandum adducimur, etsi non extinguatur, ita tamen culpâ debilitatur, ut vix quid bonum sit, præ illis, quæ insunt in animo errorum tenebris, discernere queat;

sequi

sequi certe non potest, nisi gratiâ illius fretum, qui omnium dominator rerum, cuncta hæc gubernat, atque disponit. Ut enim ab initio justitiâ, atque innocentiam præditus homo, hanc primum suavissimam lucem aspexit, cujus usuram execrando flagitio sibi, posterisque suis eripuit; sic vitiorum radicibus, quæ nobis orientibus nascuntur in nobis, ad nequitiam ita inclinamur, ut eam etiam amplectamur; ita amplectimur, ut tanquam Sirenum cantibus, cæteris neglectis virtutis officiis, somno sepulti jaceamus. Quamobrem sapientissimus inter Philosophos Thebanus Cebes humanam vitam, quasi coloribus exprimens, Fraudis poculum nobis in hujus vitæ curriculum descendentibus propinari dicebat; unde malorum omnium originem, tanquam venenum aliquod imprudentes ebibimus. Qui igitur in tanta errorum caligine, & vitiorum sylva, in tanta perturbationum, & affectionum confusione certum quid sequi putaret, non aliter quidem erraret, quam qui sine nauticæ artis præsidio, & adjumento inter procellas, & scopulos navim regere, & cursum tenere profiteretur. Quapropter nitendum nobis, & curandum diligentissimè, ut eos sequamur duces, quibus in unum coeuntibus divinum doctrinæ lumen affulsit, vel Dei munere regimini morum præfecti, tantam justitiæ, & sapientiæ laudem promeruerunt. Quorum præcepta, quæ ad sancien-

dam

dam pertinent honestatem, in qua disciplina traduntur utilius, quàm in hac nostra, in qua tot Conciliorum, Pontificum, Patrum monimenta, & regulæ ad vitam, ad mores, ad virtutem pertinentes habentur, & enodantur. His enim maiorum nostrorum imitatur exempla, bonitatem respicimus, eorum, penè dixerim, vitæ consuetudinem totam effingimus, &, quod majus quiddam est, atque divinius, illorum animus caritatis plenus, & innocentia in nos ipse transfunditur, unde corporibus fato cedentibus, Christianæ Reipublicæ spiritus, qui suo quodam, perpetuo, & interiori motu cietur, permanet idemtidem, & cunctis sanctissimè providet, & moderatur. Si igitur hoc jure diriguntur errantes, mens illustratur, exemplis Patrum evadimus meliores, nihil sane magis humano generi necessarium Pontificio jure poterit inveniri.

Demus igitur operam sacris legibus, ex quibus civitatis faustitas pendet, & incolumitas, quibus vita civium, & Christianorum mores convertuntur in meliora. Quod si plus auctoritati, quam rationibustribuendum esse putetis, auctorem huius sententiæ longe gravissimum Gregorium nonum Pontificem Maximum habetis, qui summam Pontificij juris addiscendi necessitatem agnovit, & eius usitatissimam partem, ad studiosorum utilitatem in quinque digessit libros, quorum in

Academia, & in foro, quæ auctoritas sit, non ignoratis. Sed an Innocentium III. Bonifacium VIII Clementem V. Gregorium XIII. aliosque Pontifices, ut divinâ, quâ pollebant, dignitate, præstantes cæteris, ita sapientiæ nomine maximos, diversum sensisse creditis, quum omnes pro virili sua tam necessariæ consuluerint disciplinæ? (a) At quid ego memoriâ vetera repeto? An Victore Amedeo Rege auctorem quærimus graviolem? Quid aliud medius fidius censuit ille, qui optimorum memoriam Principum virtute superavit, dum hoc bonarum artium domicilio, tanto sumtu, tantâque magnificentia restituto, ex privatis laribus in hanc publicam celebritatem jus Civile transtulit, & Pontificium? An hæc studia, quæ nunquam corrupta in hac florere dititione, privatim non excolebantur à pluribus, & præstantissimis viris? An veteribus illis Fabris, Vaudis, Belloniis, Germoniis, Gubernatiis, quorum memoriæ ex hoc ipso loco æternum, atque præclarum ab aliis disertissimis viris datum est laudis testimonium, hæc ætas complures non extulit quàm simillimos? O divinam Regis pace belloque maximi providentiam. Censuit Princeps optimus, ac prudentissimus necessarias Reipublicæ disciplinas publico quoque indigere præsidio; censuit eos, qui his studiis operam navant, Regio dignissimos patrocinio. Quare nolite

[a] *Vid. cap. ignorantia cap. nulli dis. 38.*

nolite, Juvenes, tam magnum, & immortale invictissimi Regis beneficium contemnere, qui tot bellis confectis feliciter, tot victoriis de potentissimis gentibus reportatis, hanc vobis patriam integram, incolumemque servavit, vos salvis parentibus sospites reddidit, à fortunis vestris, opibus, diisque penatibus omnem vim hostilem avertit, & parta demum pace hæc vobis otia constituit litterarum. Cui nullam, mihi credite, gratiam referetis acceptiorem, quam si Reipublicæ, ad cujus felicitatem omnes ejus conatus diriguntur, his pacis artibus vos præstiteritis utilissimos. Ita igitur necessariis his disciplinis operam date, ut digni maioribus vestris, digni hac patriâ existimemini, digni demum, qui ab Augustissimo, & Invictissimo Rege Provinciarum, Civitatumque regimini, vel Sacrorum curæ præficiamini.

Dixi.

116 *Formularum &c. lib. singularis.*
IN LUDOVICI GENTÆ
COOPTATIONE

ORATIO SECUNDA.

Habita X. Calendas Aprilis M. DCC. XXIII.



Conventus hic vester P.C. ornatus, & auctus circumfusâ lectissimorum juvenum multitudine, & recens eorum, qui ante me dixerunt, splendor, & gloria altè infixâ mentibus vestris me dicere instituentem ab ipso principio, & quasi limine orationis summovent, ac repellunt; quòd illis hodie me facere verba conveniat, quibus admirantibus ac plaudentibus, præclari complures adolescentes a disertissimis viris adeo laudati sunt, ut ad immortalem potius evecti famam, quam hac donati studiosis debirâ laureâ videantur. Quæ namque spes mihi affulgeat, posse me unquam animum vestrum, delectare, vel pro loci, ac muneris dignitate ita differere, ut vobis fecisse satis putem, si cuncta in illis maxima fuerunt naturæ artisque præsidia, mihi vero durioribus, incomtisque studiis valde occupato nulla hæc, vel summè jejuna? Ergo quum omnes, qui hætenus ita studia litterarum sunt prosecuti, ut eis laureatis ex Academia in publicum prodire licuerit, meritis virtutum præconiis sint affecti, te solum, Ludovice Genta, quòd summâ
ope,

ope, & infinitis propemodum laboribus dignus habitus sis, qui in amplissimum doctissimorum virorum numerum coopteris, taciti præteribimus quasi obscurum in Lyceo juvenem, & penè dixerim illaudatum? Siccine Taurinensis Academia, quæ optimos quosque juvenes insigni laudum testimonio semper prosequi consuevit, in te uno, quem omnes suspiciunt æquales, majores laudibus extollunt, a suo novo instituto, & prisco more deflexit? An quòd alii sortiti sunt me homine haud quaquam in his artibus exercitato viros ad dicendum instructiores, & ad augenda, & illustranda cujusque præclara facinora natos, excultosque, abditæ virtutes tuæ, & incultæ jacebunt? At quanquam hoc dederis differētis infantia, ut neque ornatè satis, neque eleganter, ut cæteri, dicat; negaverisne bonis omnibus, ut breviter, ut sine ornamentis, & quasi detracta veste, animi virtutes exponamus tui? Ita profecto P. C. fiet; nam animi dotes clarissimi Candidati, sine ullâ meâ operâ, decoras, ornatasque satis ipsæ se demonstraverint. Nec est quod torum ejus vitæ curriculum mente percurrere debeamus; namque anni tantum spatium complectetur Oratio, quo anno ante oculos vestros in Academia, in foro Ludovicus Genta frequenter obversatus est; ut quod Poëtis in describendis Heroum factis fixum esse dicitur, ut anno solum finita gesta comprehendant, in hujus

virtutibus sine fūco, vel arte narrandis translaticium esse videatis.

Ubi primum hujus Academiæ instauratæ fama longè, latèque pervagata exterorum animos partim admiratione, partim sui desiderio complevit, nihil Ludovico Gentæ fuit antiquius, quam ut ex omnibus sese eriperet impedimentis, & infinitæ illi, quâ tenebatur, discendi cupiditati satisfaceret. Igitur rogare parentes primum, dein acrius etiam instare coepit, ne se novis disciplinarum ornamentis, ac peregrinis cognitionibus, quibus promendis Augustæ Taurinorum Academiam restitutam fuisse fama erat, jam inhiantem, spe frustrari permetterent; & modo fructus doctrinarum, modo utilitatem Regii patrocinii, sub quo studiosi futuri dicebantur, modo exantlatos ante labores Romani itineris commemorare: quo tandem effecit, ut Pater Filii, quem unice diligit, amantissimus omnium rerum ad iter necessariarum illi copiam suppeditarit. At Ludovicum è patriâ jam discessurum aliis alia supervenientia impedimenta in patrio detinere solo, donec pestilentia illa, quæ totum terrarum orbem terrore replevit, Massiliæ nata est, ob quam itinera custodibus munita, commercia interrupta, omnesque populi suis regionibus clausi sibi ab aliorum hominum colloquio, aspectu, & propedicam nomine metuebant. At studiosissimum juvenem, ac
doctri-

doctrinarum appetentissimum nihil hæc morata sunt magis, quam impavidos, ac fortissimos viros flectere unquam possint levibus animis injecta terricula; nam perruptis omnibus moris, & gravissimi itineris laboribus, ac periculis superatis, cò advolavit, quò summo contenderat studio. Hinc orta juvenis præstantissimi gloriæ primordia, quæ ad ejus nominis valitura sunt memoriam sempiternam. Nulla enim delebit oblivio, nulla vetustas, Ludovicum Gentam difficillimo tempore, medio ardore Gallicæ pestilentia, inter milites locorum custodes, studiorum causâ è patriâ huc emigrasse; huc verò ubi pervenerit, ita in proposito perstitisse, ut nullus fuerit labor, quem non subire voluerit; ita demum subiisse, ut omnium studiorum non semel, aut bis, sed pluries, pluriesque summâ cum laude, & nominis celebritate periculum fecerit.

Nihil quidem illustrius, & homini gloriosius accidere potest, quàm ut virtutis, & sapientiæ sic capiatur amore, ut nequid intentatum relinquat, quod ad illam acquirendam, & jure suo veluti possidendam conferre possè videatur. Hæc enim sola est, qua ut animo, & mente à brutis discernimur animantibus, sic à cæterorum hominum sejungimur numero; câque fit, ut reliquorum mortalium, diuturnitate temporis memoriâ letho datâ, nostra læta, virensque apud posteros

steros floreat. Hac spe, quâ meliores, nobisque ipsi præstantiores evadimus, plerique omnis ætatis, ac generis homines, rerum abiectâ curâ domesticarum, incognitas peragraræ terras, nova terrâ marique subire pericula non dubitarunt, ut patriam inde novis artibus, ac inventis excolerent. Hoc modo mortalium sapientissimi Græci Indiam, Ægyptum; Romani Græciam; Barbari Italiam perlustrasse perhibentur, & inde nobilissimam secum ipsi tulisse doctrinarum partem, quæ fata in peregrinis terris adeo coaluit, ut novi virtutum surculi nihil de dignitate, ac præstantia, unde deducti fuerant, plantæ concedere viderentur. Ita nempe perpetuò creditum est, sapientiam esse veluti mercem, quæ ut à remotioribus Orbis terrarum plagis ad nos delata est, sic pretiosior habeatur; videntur namque minus in se pretii continere non conquistæ longius disciplinæ, vel quod otium, libido, rerum affluentia familiarium multum nostræ intercipiat diligentia, vel quod illarum facilis acquisitio sæpè vertitur in contemptum. At Ludovico Gentæ quàm eximia, quàm antiqua discendi cupiditas! Romam primùm non animi gratiâ, aut studio visendarum magni quondam Imperij reliquiarum, considerandique busti Romanæ potentia, sed percipiendæ Jurisprudentiæ causâ, commigravit, quæ in urbe omnium principe & nata, & ad summum
cre-

creditur evecta fastigium. At quæ ibi gesserit, cui rei assiduam die, noctibusque impenderit operam, ut deinde ob continuas vigilias, ac numquam intermissum quieti laborem in ardentissimam febrim, diuturnumque morbum inciderit, haud quaquam commemorabo; excedunt hæc à propositis finibus Orationis; quam mihi legem ab initio dixi, hanc religiosè servabo. Id solum P. C. considerate, eo tempore Ludovicum Gentam non de adventu, deque studijs cogitasse, sed in hanc urbem inter militum arma, inter pericula à cive magis, quàm ab hoste timenda, inter teterrimæ mortis imagines advolasse, quo tempore, præterquam de salute deliberare rarum, à parentum divelli complexu difficile sit, iter arripere grave, evadere periculosum.

Sed hæc fuere studiorum illorum, quæ summo deinceps nisu perfecit, imperfecta quædam initia. Quis enim diligentius rem optatissimam aggressus est, quàm Ludovicus Genta studia literarum? Quis ardentius formam visu pulcherrimam adamavit, studuitque constantius adamatæ, quàm Ludovicus Genta Jurisprudentiæ? Quis unquam majores natu, à quibus lucrosam speret hereditatem, impensius coluit, quàm Ludovicus Genta sapientissimos viros, & omnium virtutum genere commendatissimos? Omnium quidem caput rerum, quæ ad profectum

etum pertinent adolescentium, id esse P. C. judico, ut optimos quosque, ac doctissimos observare, frequentare, ac perpetuo lateri eorum velut hæere debeant. Itamque quotidiano exemplo, familiarique sermone sublimioribus disciplinarum notionibus assuescunt; ita sapientiæ præcepta facilius, uberiusque radices emittunt. Quemadmodum enim cominus emissâ jacula fortius, altiusque feriunt, quam si eminus jaciantur; languent enim paulo remotiores ictus; infirmiusque corpora petunt, ac subeunt, ita sapientum doctrina validius mentem occupat, si amicâ quadam consuetudine, atque domesticâ sic effundatur, ut integra communicetur. Vix enim reperias, qui doctissimus quum evaserit, eruditorum virorum non sit societate, & consortio delectatus. Quid enim Socratis cum Platone, hujus cum Aristotele, Ciceronis cum Coelio, Papiniani cum Paullo, Ulpiano, & pluribus alijs familiaritatem, amicitiamque commemorare? Non enim longius à rerum nostrarum memoriâ nos retrahere cogitationes oportet, quàm sit necesse. Nonne Fabri nostri cum Antonio Manutio antiquæ Taurinensis Academiæ gloriâ, & ornamento, vitæ consuetudinem perspectam habetis? Nonne Bellonij eruditissimi viri cum Vaudo omnium elegantissimo, atque acutissimo, conjunctionem plurimam fuisse perhibent,

à quo & illum multa surripuisse fama est, & pro suis etiam promulgasse, quam ego rem à Bellonij doctrinâ, & probitate, à Vaudi stylo alienam esse contendo? At quos Ludovicus Genta, & quantos excoluit viros, quibuscum conjunctissimè vixit! Non mei nunc est instituti P. C. omnes enumerare. Unus tu, quem e numero summorum, & optimorum virorum nec ipsa, etsi maximè conetur, segregare potest invidia, honoris causâ nominabere, M. Antoni Comes Clarette; cujus ego, quum doctrinam considero, aliquem mihi intueri e priscis Jurisprudentibus videor, quum morum innocentiam, & probitatem Catonis alicujus, vel Aristidis integritatem, justitiamque, quum officium erga me tuum atque benevolentiam (si unum excipio) alterum te parentem rectè appellarim. At quod ad nos attinet, si maturè vitam Superi non ademerint, vel scripta nostra aliquo in pretio apud posteros fuerint, numquam præsens ætas, atque futura de tuis laudibus, numquam de egregijs in me meritis conticescet. Eo igitur viro quum sit Ludovicus Genta usus perfamiliariter, quum hujus monita, dicta, probè integrèque servaverit, illique non civitatis modò, sed amicitiae, sed affinitatis, sed sanguinis vinculo conjunctissimus fuerit; quid mirum, si quæ ad sapientiam, quæ ad honestatem, quæ ad morum candorem, quæ ad Juris divini, hu-

mani-

manique pertinent cognitionem , tam multa expreflerit , hauserit , & ex illo in alios diffusa creverint , redundarint ?

Ad hæc non inania studiorum prologia quantum laboris adiecerit Genta, fi plane dixerò P. C. dies prius me deficiet , quàm omnia comprehendere valeam. Quoties enim ex vigilijs antelucanis ad concubiam noctem ille studia protraxit vix interrupta ? Quoties ex Academia plurium studiosorum catervâ ftipatus migravit in forum ? Ita namque Ludovicus Genta fe fe Academicis exercitationibus mancipavit , ut nihil relinqueret, quod ad amicorum , quod ad familiarium , quod ad clientum , quorum multos adolescentis fama pertraxerat , neceffitatem , & commodum attineret. Virtutum P. C. hæc illa funt foedera , quæ in adolescentibus sæpe defideramus , quos ita ftudijs Jurisprudentiæ operam dare convenit , ut non oblivifcantur civium faluti , & utilitati fe potiffimum debere confulere ; hæc verò ita profequantur oportet , ut ne præproperâ quadam cupiditate juvandi ftudia nimis cruda in forum emittant. Quemadmodum enim Academicis exercitationibus femper addictus civis efferet reipublicæ non neceffarius , ita qui fpeculeris vel lucri , vel gloriæ vix Juris Doctõribus , ac Magiftris à limine falutatis , ex Academia in curiam fe fe proriperet , hunc arbitror non modò regno inutilem effer , fed
etiam

etiam multorum salutis perniciosum. At
quàm dissimilis. Ludovici Gentæ fuerit con-
suetudo ex hoc P. C. cognoscite, quòd ea
sic conjungere consuevit, ut quum omnia
forensis gloriæ causâ faceret, tamen nullus
in Academiâ repertus sit, qui cum diligen-
tiâ, ingenio, exercitatione præstaret. Alios
namque vidimus integro quidem anni spa-
tio in Academico pulvere sic defudantes,
ut nihil addi eorum laboribus posset; cæte-
rum feriarum saltem tempore honestis vo-
luptatibus, recreandisque absumentis diuturnâ
curarum serie viribus studuisse. Indulgen-
dum quippe censebant aliquid tempori, ali-
quid etiam adolescentiæ tribuendum, quæ
ætas quum hominis florentissima sit, nescio
quid etiam remissionis, ac laxamenti sibi
poscere videatur. Dandum quoque putabunt
aliquid necessariæ corporis quieti, atque
animi tranquillitati, ut iste vacuus aliquan-
do, liberque curis ad alias deinde suscipien-
das, & subeundas promptior esset alacriorque.
Quum ergo cunctis ferme studiosis ex urbe di-
lapsis, forû sileret, quiesceret Academia, omnes
Autumni amœnitate, ac dulcedine caperen-
tur, solum vidimus Ludovicum Gentam va-
letudine non firmâ, ore pallentem, ac longo
studio velut enectum, solum Jurisprudentiâ,
solum literis occupatum. Solus nempe Ludo-
vicus Genta, quem gravissimorum viro-
rum exempla, quem anni tempus jucun-
dum

dum, & delectabile, quem amicorum monita, vires attritæ, sanitas imbecilla non commovent, animi respuit oblectamenta, obterit voluptates, ludum, jocum, convivium, rusticationes nihili facit, studio, labore, vigilijs omni modo, omni tempore delectatur.

Quid amplius de adolescentis pertinaci labore; quid de curis addiderim? An forte silente schola, & fori jurgiis consopitis, aliquam Gentæ illarum partem non sponte remissam, at detractam tempore censeatis. O Juvenis diligentissimi industriam singularem! Obseratis Academiæ foribus, tacente voce Magistri, non Academiam ipsam desiderat Genta; ipse namque optimus doctorum, quos audierat, imitator se pluribus discendi cupidis adolescentibus ducem præbet, ac præceptorem. Illis civilis Jurisprudentiæ, illis Pontificij Juris doctrinam, quam hauserat, & quæ jam in ipso radices altissimas egerat, enodat, & explicat, commentariolis quoque illustrat, enucleat. Quæ Juvenis præstantissimi scripta, Deus immortalis, quanto in pretio apud tyrones sunt! Eum maxime ad primum in Jurisprudentia gradum facile pervenire posse confidunt, ad quem commentaria Gentæ pervenerint. Hinc mirum est P. C. quam multos ille timentes crexerit, dubios confirmarit, desides excitavit, fregerit, obsistentes. Quantum nempe
com-

complures in literis profecerunt, quæ sunt illi ab hoc Gymnasio præmia consequuti, quot hæc Academia ex Gentæ sodalibus habet optimæ sane indolis candidatos, hæc omnia sunt, quæ unius Juvenis studio, laboribus, diligentiae accepta referre debeamus.

Multa quidem de Candidati clarissimi solertia, ac virtute dicenti longe plurima sunt prætereunda, ut aliquem tandem exitum habere videatur Oratio. Quis autem cuncta narraverit, quæ hosce labores exceperint, ingenii, virtutisque pericula? Nemo P. C. ex tam multis, qui summâ cum laude præstantissimos doctores hætenus audiverunt, vel plura vel majori cum gloriæ accessione sollertia, ac doctrinæ edidit experimenta. Quis enim, majorem sibi comparavit famam, quàm publicis illis disputationibus, quibus Candidatus, & Prolyta renunciatus est, sibi peperit Gentæ? Cujus voce frequentius hæc personuit Academia, quàm Gentæ dissertationibus, & argumentis? Qui circulus, concio, conventusque publicus fuit, in quo Gentam non viderimus disputantem? Mitto reliqua, mitto ea, quæ vobis præsentibus, data sunt, diligentiae, artisque specimina. Audistis P. C. eum hodie differentem, audistis sententiarum pondus, copiam, soliditatem, acumen. Nam quæ privatis interrogationibus edidit, præteribo libenter, quum vos ipsos P. C. testes habeat, & laudatores. Vos præstantissimi Candidati

vir-

virtutes, vos doctrinam ad cœlum tollere consueſtis, vos privatâ illâ interrogacione, qua Ludovicum à ſtudiis miſſum poſtea declaravimus, & Laureæ, & Collegii honore digniſſimum cenſuiſtis. Quam de ſe captam opinionem tantum abſuit, ut ſecundâ interrogacione, quæ Regiâ lege præſcripta eſt, minuerit, ut etiam tribus ab illo reſponſis acceptis, cæteri Patres ab interrogando temperarent, qui honos poſt reſtitutam Academiam, præter Gentam, tributus eſt nemini. O præclaram Ludovici Gentæ apud doctiſſimos viros opinionem ! Tanti videlicet pauca ex ore Gentæ valent apud ſeveriſſimos Judices, Cenſoresque virtutum, quanti ſatis multa aliorum vix æſtimantur. O dignum antiquiſſimæ ſanè familiæ & germen, & lumen ! Quam ego dum conſidero, nescio an magis ab illis, qui pace belloque rempublicam geſſere, viris exornetur, quàm ex hoc uno acceptura ſit ſplendoris, & gloriæ. Ac ſi quidem mihi datum eſſet, ut eos omnes à Superis evocarem, qui Erigio avo tuo vivo Nicienſem Senatum conſtituebant Septemviri omnes tibi ſanguine conjunctiſſimi, eoſque Senatoriâ togâ indutos in conſpectu veſtro ponere liceret P. C. nescio an injuriâ hunc juniorem ætate, dignitate minorem, doctrinæ tamen famâ non imparem futurum in eorum numero collocarem. Quid verò illi, qui ſcriptis, editiſque libris, familiam nobiliſſimam illuſtrant

runt, dicturi forent, quum eundem sua viderent exempla jam exprimentem, & prompto lætoque animo vestigia bene, feliciterque calcantem? Quare P. C. quod hunc juvenem ad amplissimum Academicorum honorum gradum promovere decrevistis, id quidem puto recte, atque ordine factum; quod autem me potissimum elegeritis, qui donis cum civilibus publico nomine remunerarer, id non sine summa animi mei lætitiâ contigisse sciat.

FORMULA.

Itaque auctoritate, & auspiciis AUGUSTISSIMI, ET CLEMENTISSIMI REGIS, ac Reverendissimi Procancellarii mandatu aio te divini, humanique Juris doctorem esse, eo modo, jureque, quo ex Pontificia, Regiaque formula divini humanique Juris doctores, ac interpretes creari hætenus consueverunt. Hos propterea libros clausos, reformatosque trado, quo intelligas Juris explicandi tibi factam potestatem illorum exemplo, qui priscis temporibus fiduciâ ingenii, vel Principum auctoritate, vel transverso ambulantes foro, vel ex præcelso folio paratos se se de jure consulere volentibus ostendebant. At quanti apud homines hæc sint pretia virtutis inde significatur, quod hoc pileum laureæ nomine decoratum voluerunt, quod honoris genus illis solum, more majorum, concedebatur, quibus, cæsis fugatisque hostium copiis, triumphantibus in Urbem introire liceret.

Annuli quoque gestandi jus addiderunt, quod Equitum, ac Senatorum insigne erat, & ornamentum, ut nihil esset quod ad exornandum virum tractandis Reipublicæ gubernaculis aptum deesse videretur. His igitur concessis insignibus velut supremis, quæ ab Academia speranda sint, præmiis, nihil reliquum est, quàm, ut te, Pater omnipotens, Virgo Regina loci præses, cæterique Superi immortales rogemus, obsecremusque, ut hunc Ludovicum Gentam ita sospitare pergatis, ut ejus bona, fidelisque opera huic regno utilis sit, hæc quam accepit auctoritas innocentibus opportuna, miseris sit innoxia, & Civibus omnibus salutaris.





DE PONTIFICIJ

JURIS FACILITATE

Ad Juris ejusdem studiosos,

ORATIO TERTIA

Habita IV. Idus Novembris M. DCC. XXVI.



Nihil tam novum, & inusitatum esse videbitur, A. O., quàm studiosis ad ingenuas artes aggredientibus ostendere, quantum hæ laboris, difficultatisque contineant; quum doctissimi quique liberalium artium Professores nihil curent impensius, quàm ut mentes adolescentium ad illarum studium rationum pondere trahant, & dulcis orationis flumine ad ipsarum amorem alliciant. At gravissima sacrorum doctrina, eoque præstans nomine, quò divina cuncta regat, & moderetur, nullum ex alienis ornamentis, & laudibus sibi sumtura est, dicentis non solum Inopiâ, sed propriâ magnitudine quadam, & dignitate. Incredibilem, & noxium dumtaxat errorem, qui, nescio quomodò pervagatus sic increbuit, ut per multorum pervaserit animos, eximendum censeo, modicam, & nullius pretij rem Jus Pontificium esse

distitantium, quod Romanæ prudentiæ delibatis institutionibus facillimè perdiscatur: illosque, qui nunquam eam artem à limine salutarint, triduo posse Juris ejusdem se se consultissimos profiteri. Quod quum de studijs detrahat plurimorum, qui velut aliud agentes ad facultatem longe maximam, & Reipublicæ summè necessariam deferuntur, enitendum est omni diligentia, ut eam perniciosam opinionem pro viribus, ex intimis adolescentium mentibus evellamus, ut studiosa Juventus [cujus majorem in dies concursum Juris addiscendi causâ fieri videmus] intelligat, nihil sibi de profectu in hac doctrina posse promittere, nisi ad eam sic accesserit, ut ad excelsam, dignissimamque disciplinam, quâ bonum omne publicum, magna Reipublicæ vis, & auctoritas, Sacerdotum quoque, & Principum amplitudo, imperium, & majestas, divina demum Jura definiantur. Vos igitur, Adolescentes, de quorum ego commodo, & utilitate sollicitus sum, si quid, ut spero, dicendo profecero, hanc mihi vicem reddite, ut ne videlicet apud viros non invidos, nec indoctos, nec infictos, vel temerarius existimer, quasi in alienum locum irruerim, vel quòd tantæ sententiæ auctor ipse fieri voluerim, ob id superbus habear, prædicerque. Siquis enim alius extitisset, qui vobis in hac facultate quid sequendum, quid vitan-

tandum sit, explanasset, melius profecto vestris studiis consulisset, & communibus obstitisset erroribus: meque haudquaquam invitum suscepto labore, qui profecto non modicus est, & hac etiam, si mavult, invidiâ liberasset. At in eam nos venire possessionem, quam vacuum ipsi reliquere, non ægrè, si justî sunt, patiantur, ut quod caput in Pontificio Jure videtur exponentes, non prius vos, Auditores lectissimi, ad utilissima, uberrimaque præcepta convoletis, quàm ego vobis hodie, quidquid in illis difficile reperiatur, exposuerim. Quod si mihi pro vobis ea, quam non promerui, subeunda, tolerandaque nota sit, non multum resisto, quippe qui cuncta potius suscepturus incommoda sim, quàm ut quidquam de mea consuetudine prætermittam, cui tot præclari, doctique Juvenes, vel hærentes in foro, & fortiti splendissimas præfecturas, vel in Academia adhuc versantes, aliquid se se debere fateantur. Accedit & illud vel ex vicissitudinum humanarum contemplatione, & periculo comparatum, vel certissimâ spe æquioris apud vos, cæterosque bonos judicij, nos ita cuncta laturus, quemadmodum hætenus vel hominum nonnullorum, vel fortunæ, vel iniquum in nos animum, vel incommoda tulimus.

Et sanè qui picturæ, vel alterius artis præceptis imbutus, quum manum, pedem, au-

rem , aliamve corporis partem delineare didicerit , si quidquid oculis cernimus non modò coloribus fingere , sed etiam Hera- cleotem Zeuxim , Apellem , Polygnotum , aliumve inter priscos , & novos celeberrimum non imitari solum , sed etiam artis præstantiâ æquare se posse consideret ; is an bene , vel contrà judicio prudentum audiret , tam est manifestum , ut id procul dubio quisque cernere posse videatur. At si eum ipsum non modò hæc polliceri , verum & Phydiam , & Myronem , & Polycletum , aliosque , non sculptores solum , & statuarios , sed & Architectos assequi se prædicaret , quòd hæ artes finitimæ sint : ille profectò non desipere , sed penitus inter sanos furere censeretur. Nihil enim apertius , quàm neminem Artificem dici posse nisi totâ eâ cognitâ disciplinâ , cui se se totum addixit ; quam ubi perceperit , quamvis ad Parrhasij , vel Timanthis præstantiam accedere putetur , Praxitelem frustra æmulari speraverit , nisi hujus postremi facultatem primùm imbiberit . Quis è Logicis Physicam , quis è Geometris musicam , quis è Philosophis Eloquentiam , illis exceptis , qui has didicere , sibi petulanter arrogat ? Imò quis , ne dicam , abjectus operarius , sed egregius opifex aliqujus rei notitiam affectat , nisi ad illam aliquo temporis intervallo toto incubuerit animo ? Solus erit privati Juris consultus , &

sæpè

sæpè non ille , cujus domus sit totius civi-
tatis oraculum , sed è grege sumtus novitio-
rum , qui cum artis suæ , neque brevis , ne-
que perspicuæ , quædam præcepta vix no-
verit , nullam Juris sacri notitiam expresse-
rit , non solum in illa , ut Sulpitius , vel Va-
rus aliquis excellere , sed de hoc brevi , bene ,
feliciterque responsitare se posse non dubitet ,
& tanquam de coelo scientiâ delapsâ sic uti ,
ut consulentibus non responsa reddat , sed
varicina ? Quis sine cura , sine studio , sine
sudoribus , pignorum , hereditatum , obli-
gationum , codicillorum interpreti , & for-
mularum cantori , quod cæteris omnibus non
est concessum , polliceatur ? Longè namque
diversa , maximèque distantia quis facillimè
confociarit , ubi Jus sacrum cum profano ,
publicum cum privato , divinum cum hu-
mano Jure adeo confundat , ut quamvis
unius societatis civilis regundæ causâ latuna
utrumque sit , hoc solum accepto , illud se
nullo negotio tenere , profiterive contendat ;
illud , inquam , à sanctis Patribus decentissimè
constitutum cum hoc à populo Romano ,
Principibusque sæpè Christianarum partium
inimicis sancito ; illud in augustis religionis
conventibus cum hoc in profanis ethnicorum
comitiis ; illud non ante rogatum , quàm ca-
stæ piæque preces adhiberentur , cum
hoc quod populus non ante scivit quàm ani-
mantium exta , & auguria observaret ; illud

Sine corporis ullâ poenâ , & sine sanguinis mentione , cum hoc verbera , cruciatus , exilium , restem , crucem , culleum , bestias , ignemque minitante ; illud in Ecclesia cum hoc in campo , foro , palatio : illud Deo Præsidente optimo , maximoque , cum hoc in media falsorum Numinum superstitione nato , & adulto , & pene dicam , profanis expiationibus , & sacrificijs suis ab initijs inquinato.

An hoc studium suapte natura planum , expeditumque fortassis ab aliquibus existimetur , ut aliquâ , sed levi diligentia facile perdisci posse videatur ? Ex tribus hercule fontibus omnis disciplinarum difficultas exoritur , ex rerum videlicet excelsitate & amplitudine , subtilitate , ambiguitate. Si rerum nobilitatem , si præstantiam consideremus , ecquis non putet Jus Pontificium civilibus sanctionibus excellentius , majus , augustius ? Quid Sacerdotij dignitate , quid Pontificum Jure , quid Ecclesiæ regimine , quid divinarum denique rerum omnium disciplina gravius , sanctiusque ? An sacra Jura putantur leviora profanis ? Sacramentorum omnium , rerumque religionis sanctimonia sacris legibus , vel religiosè custodita , vel humanissimè vindicata , tam futilis , tam contemnenda res est , ut tutelæ , mandato , societati , contractibus demum , & actionibus privatorum postponenda censeatur ? Ab-

sit

fit, Auditores, absit, ut nobis excidant hæc portenta verborum? Nonne summæ Christianæ Reipublicæ potestates, quæ leges præscribunt, & Jura promulgant cæteris, submittunt non invitæ sacris constitutionibus fasces? Nonne fines illis utriusque statuuntur imperij? Quis unquam in controversijs inter Sacerdotes, & Principes, nisi ex hoc Jure protulit testimonium? Ex hoc arma, ex hoc defensio: hic murus otij, hoc propugnaculum publicæ felicitatis, vis Reipublicæ, robur disciplinæ, vitæ communis auxilium, Sacerdotij firmamentum, Majestatisque præsidium. Audes tamen cautionum auceps, & litium concinnator, eam doctrinam sic contemnendam asserere, ut cuique sine labore pateat, qua talium, ac tantarum rerum magnitudo, auctoritas, sanctitas vindicatur, augetur, ornatur. Debitne summus Jurisconsultus Gallus Aquilius, quum de facto quæreretur, ad egregium, & pene divinum virum M. Tullium mittere consulentes; debuit ne Publius Scævola doctissimus Jurisperitus, quum de prædiorum Jure consuleretur, quamquam & hoc ad Jurisprudæntis officium attineret, allegare clientes ad Furium, & Cascellium prædiatores, quum alteri, quod oratoris; alteri, quod prædiatoris esset, assumendum non videretur; non debent Juvenes vix tincti privatâ Jurisprudentiâ, quum non de quæstionibus

nibus facti, quum non de jure finium regundorum, aquæ pluvix arcendæ, rusticarum servitutum, viæ, actus, itineris, sed de Pontificum auctoritate, sacramentorum ritibus, & disciplinâ, Principum imperio, & potestate tractatur, maximis videlicet Christianæ Reipublicæ fulcimentis, Juris publici partibus, societatis Catholicæ nexibus, vinctisque, vel præcipiti, pravoque judicio temperare, vel diligentius, impensius, laboriosius, quod utile, quod magnum, quod arcanum in ea facultate est, non cupere, non aggredi, non lustrare oculis, non mente comprehendere, non memoriâ tenere debent? Quot sunt in tantâ Legulejorum, Causidicorum, Interpretum copiâ, in tanta librorum veterum, novorumque multitudine, qui de Sacerdotum Juribus, de maximorum Antistitum, & Principum controversijs non ornatè, solidè, graviter, sed probabiliter scripserint? Quot, qui rectè consulant? Quot, qui bene discernant? Potes itaque, quum paucissimos in ea disciplina videas non eminare, sed vix mediocriter esse versatos, sanus videri, quum non quinquennium in hac insumendum disciplinâ dicas [quod medius fidius in omni artificio nec necessario, nec liberali fieri solet] sed nec annum, nec mensem huic tam præclaro, tam necessario studio concedendum?

Sed quod tandem studium, quæ, & quanta,

ta, Superi immortales, est ista doctrina? Quâ videlicet universæ disciplina sancitur Ecclesiæ! Nulla igitur Ecclesiæ pars excluditur, regio excipitur nulla; peræque pertinet non solum ad Romanum, ad Hispanum, ad Gallum, sed etiam ad Latinum, ad Græcum, ad Barbarum; loco non circumscribitur, Provinciâ non finitur, non Regno, non jurisdictione concluditur; eos tantum fines habet, quos universalis, quos Christi habet Ecclesia. Itane jus, quo Galli, quo Græci vivunt, facile didiceris, ex tam diversis codicibus conflatum, ex tot conciliis desumtum, à tot Patribus stabilitum? Libertate suâ Galli frui perhibentur, idest, illo Jure vivere volunt, quo Respublica priscis temporibus utebatur; Metropolitaram jus adaugent, Antistitum potestatem exaggerant, omnia proinde perire malunt, quàm ut quidquam de eo Jure decedat, quo Magnus Gregorius, quo Gelasius, quo Siricius utebantur? Quid tu ex novo jure non Gallis, sed Græcis opponas, ubi Africanum, ubi universæ Ecclesiæ codices ostenderint, inculcarint? Sunt, inquit, hæc sacrosancta Juris Pontificii decreta Nicææ, (a) Constantinopoli, (b) Ephesi, (c) Chalcedone, (d) Ancyræ, (1) Neocæsareæ, [2] Antiochiæ, (3) Sardicæ (4) lata magnis Hieronymo, Basilio, Leoni

[a] *Ann.* 325. (b) *Anno.* 381. (c) *Anno.* 431.

(d) *Anno.* 451. (1) *Anno.* 314. [2] *eodem Anno* 314. (3) *Anno.* 341. (4) *Anno.* 347.

Leoni, Gregorio laudata, probata, servata. Hoc jus est, quod tibi contemnendum adeo videtur, quum illud ignores. Sed quid mihi, dices, commune cum Græco, cum Gallo? Satis mihi fuerint Jura sacra, sed illa Romana. O egregiam Jurisconsulti scientiam, Jus sacrum profiteri, & maximam juris ejusdem partem penitus ignorare! Canonicas scire leges cum Canones plane nesciveris eos totius, ut ajunt illi, *Mundi reverentiâ consecratos.* (a)

Sed quando ad Romanos me vocas Canones, parebo, nec tamen invitus. Romanus est codex ille vetustus, quo Zosimus, Bonifacius, Cælestinus ante sextum Ecclesiæ sæculum utebantur. Romani, Dionysii, Isidori, Ivonis, Burchardi, Reginonis, Bernardi, Anselmi, Innocentii, Vallengis, Honorii, & alii plurimi codices. Facile ne eos videtur evolvere, quos ego commemoravi? Facile diversos ritus, mores Ecclesiæ cognoscere, de omnibus ferre judicium? Facilius utique quis Institutionum quatuor, Codicis Justiniani duodecim, & Digestorum quinquaginta libros pervolutarit; sed in istis maximas inesse difficultates agnoscis; in illis non agnosces, nec numero, nec pondere, nec gravitate, nec magnitudi-

ne

(a) *S. Leo. epistol. ad Anastas. Thessalon. cap. 2. tom. 1. Concilior. Hard. p. 1767. vid. ejusd. epist. 25. & psendep. Damasi ad Aurel. tom. 1. Conc. p. 759.*

ne cum his ullatenus comparandis? Sed quid agant tandem intelligo. De Gregorii noni, de Bonifacii octavi, de Gratiani codice disputant. Quàm in angustam Juris Pontificii partem, & quasi angulum sese relegant! Hîc manifesta Jura contineri dicunt, nec subtilitate, nec ambiguitate civili Juri similia. O divini Juris sacros Interpretes, quantâ vos hodie curâ liberatos intelligo! Quid vetera, quid nova tanto studio, & labore tractatis? quid controversias Gordio nodo implicationes solvere conamini? sunt hæc curæ hominum egregiè otio, ac literis abutentium. Omnia sunt aperta pueris, & quod vobis & senibus, & eruditis, doctisque minime patuit, hodie semidoctis liquet adolescentibus!

At videte quæso, Auditores, ne si isti de Juris Interpretum scriptis me dicere intellexerint, statim ad id confugiant, a quo maxime vos abducere laboro: ideo magis esse respiciendum Juris Pontificii studium, quod cuncta Interpretum operâ sint enucleata. In quo tamen suo, ut aiunt, gladio conficiuntur. Si namque propterea facile Juris Pontificii studium arbitrantur, quod Interpretum operâ expositum, & in optimâ luce collocatum esse putent; facile & Jus privatum erit, quod totidem, pluresque habet Interpretes: facilis Theologica facultas; nulla disciplina non facilis. At si ex scriptorum multitudine, atque librorum quid assumendum sit, contrarium

rectius, ut opinor, colligetur; facit enim multitudo ipsa difficultatē, quū quid sequēdum sit, præ variis scriptorum opinionibus difficile videatur. Optimè idcirco Justinianus, ne commentaria in Jus scriberentur, interdixit; quod utinam in publico, privatoque Jure custoditum fuisset; non enim forum, scholæ, volumina tam variis, tamque dissonis sententiis redundarent; neque, quod esset optandum, tot sapientes viri sæpè fuissent de summarum potestatum concordia, de privatorum salute, fortunisque solliciti. Quām subtile igitur jus illud existimabimus, in quo declarando tot desudarunt, & desudant interpretes, nec numero, nec doctrinā, civilibus impares?

At verò si subtilitate, de qua multa prætereo, legibus Romanis par esse demonstravi Jus Pontificium; tamen ambiguitate obscurius esse contendo. Duo verò ambiguitatis genera agnoscimus, alteram, quæ verbis hæreat; alteram, quæ irrepat extrinsecus. Illa facultatis vitio nascitur, hæc hominum culpā; illa voces respicit, & sensa legumlatorum: hæc documentorum veritatem, vel falsitatem; altera ad interpretem pertinet: ad criticum altera; alterā Jus publicum vincitur à Jure privato: alterā vincit. Atqui nullā laborat ambiguitate jus Pontificium, quæ legum conditorum incuriā in privata jura confluit; qua, licet callide dissimulent, immāne quantum

tum discruciantur ingenia; cuncta namque in nostro dilucida, & nisi ex rerum magnitudine, numero, subtilitate labor oriretur, plana, & aperta, & quamvis non ornato, tamen simplici stylo conscripta. At hæc perspicuitas, quantam, Superi immortales, generis alterius continet obscuritatem? Illam, dum mirantur incauti; in hanc delabuntur, & dum perspicua & manifesta cuncta sibi cernere videntur, magnis, quos non vident, obcæcantur erroribus. Ab antiquioribus etenim sua Gratianus, & sæpe Gregorius mutuati, mutila retulerunt, & decurtata. Hinc prima Juris, quo vivimus, difficultas, non tamen maxima. Sæpe namque contingit, ut ad codices recurrere debeamus, unde in nostros illa sunt derivata; & quum ad eos accesseris, ad alios sæpè confugere necesse sit, quòd vel eodem præscripta modo sint, vel corrupta deterius in illis reperiantur, donec ad scatebram ipsam caputque pervenias. Promptum ne igitur & expeditum tot adire scriptores, tot lustrare volumina? Semperne codices illos, tam varios, tam raros, tamque magnos in manibus habere poteris? Sed hæc quamvis non levia, fortasse tamen toleranda. Quid si unum, idemque monumentum hîc Pontificibus, illic Synodis, alibi Patribus adscribatur? & ex codicibus, scriptoribusque, qui Pontificibus illud affingunt, alter Pontifici, qui rescribere consuevit; alter ei, qui nullas dedit epistolas;

Qui

qui Conciliis, alter e mentitis Synodis, alter veris attribuat; & rursus, qui veris, alter Provinciali conventui, alter universali, ut de Patrum scriptis, quæ falsitatis notâ laborant, nunc conticescam? Quæ obscuritas! Quæ perturbatio! Nec enim hæc parvi ducenda censueris; aliud enim, si œcumenicis ex Conciliis, Pontificumque rescriptis, aliud si ex alio fonte testimonium promanarit, statuendum. Quod si falsum sit, quamvis relatum in Gregorii codicem, nisi & hoc ipse cognoveris, nostris despectui fueris, exterisque ludibrio. An putas hæc rarò contingere? Et utinam rarissima forent; non etenim magnâ curâ, magnoque pretio, remotissimis in regionibus hujus argumenti nobis essent quærenda volumina.

Nunc sumas tibi quælibet ex hisce codicibus; id enim per me jure licuerit. Aintu, quæcumque in Gratiani volumine legeris, iisdem tibi, civibusque jura præscribi? Sed lex una cunctis nulla esse potest, quam non tota scivit Ecclesia, vel ea summa a Deo stabilita potestas, qua regitur Christiana Respublica. Nonnulla verò in Gratiani codice quum sint, quæ in civilibus, plura quæ in provincialibus, plurima quæ in dioecesium conventibus constituta, cognoscas privatâ tantum auctoritate collecta, hæc si communiter custodienda docueris, tenebras offuderis animis, Legesque rogaveris, quæ nusquam extiterint.

An

An huic te malo occurrurum putes, si universæ Ecclesiæ Concilia à peculiaribus distinguere noveris? Nequicquam sanè operam perdas, si quæ conciliorum credis, privati alicujus effata, & interdum efficta commenta reperiuntur. Quare dissidentes inter sese juris Pontificii partes, ac decreta conspicias, ignorabisque viam, quâ ex his anfractibus juris, & legum salebris emergas, ut verum evolvas. Inde sanè fluunt innumeræ, sed planè ridendæ contrariorum Canonum enodationes, quas conciliatricis, nescio cujus, artis ope plurimi venditant, quæ profectò sunt illorum ambiguitati enucleandæ sic perperam accommodatæ, ut seria gravissimorum virorum deliramenta videantur. Quorum latorum si tempora, causâsque cognoscerent, quemcumque nodum facilius atque felicius expedirent. Ergo frustra in his explicandis aliunde quæras auxilium, nisi pacta, foedera, similitates, & odia quoque virorum Principum, quæ fuere ingentium sæpè controversiarum causæ, memoriâ repetas. Quid enim probabile dixeris, ubi Gregorium, Bonifacium, Johannem (quorum sunt postremi Pontificii Juris quo utimur codices) Clementi, Petroque ipsi contrarios esse videris? quid, ubi Anacleri, Evaristi, Alexandri, aliorumque Gregorio, Bonifacio, Johanni potestate parium, at partâ sudore, & sanguine sanctimo-

nix gloriâ longè majorum scripta protulerim
 novis adversa legibus? Quid ubi Apostolos
 devocarim ex Hierosolymis, & coram velut
 adduxerim Constitutiones, Canonesque sci-
 scentes? Quid ubi Christum, inclytamque
 Matrem scriptitantem ostenderim, & mis-
 sitantem literas? Proferes tu [nisi ex penitissi-
 mis adytis Criticæ illas deduxeris] responsio-
 nes & ridiculas, & arbitrato confictas tuo?
 Quotusquisque erit, qui tenebras hasce discu-
 tiat, nisi historiæ præsidium, & lumen acce-
 dat? Quo ergo labore, quâ diligentia est opus,
 ut ea quæras, invenias; quo studio, erudi-
 tione, judicio, ubi repereris? Scripta scrip-
 tis erunt, moribus mores, tempora temporibus
 conferenda; quod, obsecro, quâ ratione,
 qua via, quibus auxilijs præstare studiosi
 possunt, nisi Chronologicam, Historicam
 artem, Juris præsidia Pontificij adiutrices
 arcessant? Quo pudore suffusi erunt, quum
 plures Canones citavisse rati, qui eandem
 definiant quæstionem, unum eundemque
 Canonem diversis præscriptum verbis se at-
 tulisse viderint, & ex his nullum exemplari
 respondere suo, vel esse penitus eumentum
 exemplar? (a) An hæc evitaverint, si præscos
 codices non inspexerint, judicandi artem non
 intellexerint, mores, ritusque veteres non
 cognorint? Ac mihi quidem, Auditores,

Jus

[a] *Vid. Antonium Augustinum in dialog. de
 emendat. Grat. passim.*

Jus Pontificium contemplanti videre locum è longinquo videor amoenum, & fertilem, non solum viarum directa planitie, plantarum, signorum; & fontium leniter cadentium, ac mutmurantium numero per intervalla distinctum, & nobilem; sed fructuum etiam affluentiam redundantem; & lætissimarum segetum multam copiam felicem, atque prædixit; in quem tamen præsentem ubi perveniam, limpidissimis licet ex scatebris, rivulos fluere videam lutulentos, floribus sentes, arboribus vepres intermixtos aspiciam, uberimasque fruges lolio, lappisque conspersas. Sic autem in isto (si usus daretur ejus) versareris, ut tuum ad compendium pertinere non crederes, repurgare rivos, plantas reponere fructuosas, radicitus spinas evellere, carduos, rubos, tribulos subruere, excindere, funditus extirpare; vel hæc adeo negligenter curanda censeris, ut nullam impensam, atque laborem colere latifundium, & vitia remove sperares, & simul conferre messem in horrea maturam, & uberem?

Quod, si in his probè noscendis, ac segregandis Juris interdum falluntur Conditores, dum vetustiora recitant, quibus notissima prisca documenta, præsto sunt doctissimi viri; quantum ab istis desidibus, indoctisque peccabitur, à quorum non solum oculis, verum etiam cognitione sunt hæc omnia remotissima? Potuit Innocentius tertius loco

Generalis secundi Concilij citare Photianum Conciliabulum ; (a) potuit Synodi loco , quam sextam dicimus , Trullanorum Episcoporum adducere testimonium (b) , quod semper Romani reprobarunt Antistites : (c) & ut ad notiora veniamus , potuit Zosimus , Bonifacius , Cælestinus , Nicanarum loco Sardicenses proferre]regulas (d : potuit profictis epistolis priorum Pontificum tanto studio decertare Nicolaus (e), ut præteream Gregorium nonum , cujus operis alioquin eximij menda corrigunt eruditi (f) ; ut Gratianum omittam , cujus sunt errores innu-
meri

- [a] *Cap. post translationem xi. de renuntiation. jung. cap. hoc nequaquam 45. caus. 7. quæst. 1. & ad hoc Roman. Corrector. vid. Anton. August. de emend. Gratian. lib. 2. dialog. 6. , & addition. 2. [b] Cap. à multis de ætat. & qualit. & ordin. jung. cap. si quis eorum dist. 32. vid. Anton. Augustin. lib. 1. de emend. dialog. 18. , & in addit. §. 3. [c] Vid. cit. Anton. August. lib. 1. de emendat. Grat. dialog. 7. , & sequent. Roman. Corrector. ad cap. 6. habeo librum dist. 16. (d) Vid. epist. Conc. Afric. ad Bonifacium tom. 1. concilior. Harduin. pag. 939. codicem canon. Eccles. Afric. à can. 134. ad 138. , & apud Dionys. Exiguum apud Justell. Biblioth. tom. 1. [e] Cap. 1. dist. 19. vid. eam integram tom. 5. conc. Hard. pag. 590. [f] Vid. Ant. Aug. lib. 1. dial. 2. 4. 6. 14. lib. 2. & dial. 2. Baluz. ad Grat. p. 474.*

meri (g), nec hodie cogniti omnes; possunt isti sine ullo judicij adiumento, sine studio, sine labore Juris divini consultissimi fieri, quo in statuendo, declarando, tradendo tot tantique doctrinâ præditi, rebus ipsis edocti, codicibus instructi, veterum rerum notitiâ clari sæpissimè defecerunt? Si in uno castigando Gratiano tres maximi Pontifices, undique arcessitis viris antiquitatum sacrarum peritissimis, elaborarunt (h); nec tamen rem ita confecerunt, ut non magna pars hujus laudis Antonij Augustini, Stephani Baluzij, & aliorum eruditorum doctrinæ, curæ, sudoribus sit relicta (i); quid facturi sunt illi, quum nunquam selectiores scriptores inspexerint, vetustos codices viderint, nec de veritate alicujus ex innumeris ementitis Canonibus dubitarint? Melius faciliusque mihi credite luminibus captus colores distinguet, vocesque surdus exaudiet, quàm qui non diu, non multum, non ut oportet, sacrorum versaverit disciplinam, ista cognoscat, cognita seligat, selecta in succum, sanguinemque convertat.

Quapropter si nemo unus sit, qui doctrinam, artemve, cui nunquam se addixit, non

* K 3

modò

[g] *Vid. cit. Augustin. lib. 1. dialog. 1.*

(h) *Pius iv. Pius v., & Gregorius decimus tertius. Vid. Ant. Aug. lib. 1. in fin. dialog. ult.*

(i) *Vid. eundem Baluzium in præfation. ad dialog. Anton. August.*

modò profiteatur, sed nec suam se scire dicat, ante quam illam integram arripuerit: si Jus sacrum, atque civile non solum diversis ab auctoribus processit, sed utrumque longissimè inter se discreta contineat, si difficillimum illud sit, quod de magnis, de publicis, de divinis rebus agit, quod in tam varia, tam rara, tamque magna volumina sit dispersitum, quod omnium Christianarum gentium jura complectitur, quod subtile semper, & dubium ut plurimum sic videatur, ut doctissimorum quoque virorum curam, & diligentiam nonnunquam eludat; nihil remanet amplius, quàm ut falsis eradicatis opinionibus de illius facilitate, quæ contemptum parere solent, summam, præstantem, Regno, summisque potestatibus necessariam, Civibus utilissimam disciplinam continuis laboribus, omni studio, totisque viribus prosequamini. Ad nos enim quod attinet, Auditores, optimè nobiscum actum esse credamus, si quod sapientium virorum est, à vulgaribus erroribus diligentissimè declinemus. Non sunt, fatemur, hæ, quas ineundas proponimus, cunctis hactenus tritæ viæ; at vobis nihil humile, ac indecorum, nihil non indole vestrà, vestrisque majoribus dignum: nihil non felicissimis his temporibus accommodatum, quibus disciplinas omnes refluere videtis, aut tentandum, aut cogitandum est. Nec tamen

in.

industria, studiumque vestrum, nec labores, vel mercede (si prævídere quid animo valeo) vel gloriâ carebunt, cum munificentissimum Regem, qui vos omnes peculiari patrocínio complectitur, hi nunquam fugere queant, adeo ut Magistratus, Sacerdotia, Præfecturæ neutiquam deesse possint illi, qui eum, in quem ingredimur, studiorum cursum feliciter absolvat: ubi nempe constiterit Civem ipsum esse Reipublicæ non inutilem. Macti igitur animo cum sapientissimis viris hoc anno optimi Juvenes, alacres, & latè rem capeffite publicam. Quod equidem ut rectè præstare queatis, institutionibus in primis universi Juris acceptis, ut his utamini præsidij hortor, & moneo, quæ ex historiæ, criticæ, & veterum codicum notitiâ doctiores, & eruditiores Interpretes, scriptoresque ferunt; licet enim complures hæc inusitata, parumque lucro convenientia dicant, non tamen sine fructu, & sine laude, sit quantumvis bonis infesta fortuna, pertractata vobisque tradita videbuntur.



IN JOSEPHI FRANCISCI M O R O T I I

Marchionis Bianzeti

COOPTATIONE

ORATIO QUARTA.

Habita IV. Calendas Julias M. DCC. XXII.



Ajorne hodie P.C. in hoc vestro confesso admiratio fuerit, an lætitia, vix liquidò discerni potuisse censeo; quum in Josephi Francisci Marchionis Morotii disputatione non solum omnes ab unius ore pendentes aspexerim, sed ubi primum magnum, & honorificum collegii decretum de laurea clarissimi Prolytæ voce Præconis est declaratum, velut in communi triumpho cunctos præ gaudio in effusas gratulationes, & plausus erupisse cognoverim. At quamquam ea sit universorum opinio de tanto adolescentis inclyti profectu gratulantium, minimè potuisse cum eo agi præclarius, quam si cooptaretur in illorum numerum, quorum Lycei nostri publica documenta nomen illustrent, quibusque gloriam tribuent in futura posterorum memoria sempiternam: foret tamen, quod huic sollemni celebritati deesset, si quum & merita Candidati plurima sint, & vestra, quæ ad laudem ipsius

ipsius pertinent, immortalia decreta videātur, sola de ore dicentis flueret incondita, nec tam illustri conventu digna, nec gravis Oratio. Non tamen id mihi tribuo P. C. ut Prolytæ doctissimi laudibus me parem esse, vel quod aures vestras implere queat optimarum rerum semper avidas, & capaces afferre posse dicam; sed tam excelsas, tamque multas Adolescentis clarissimi dotes esse contendo, ut sine multo labore collectæ nec verbis inanibus, nec exquisitis longa meditatione sententiis, neque numeris aptè cadentibus egeant. Sive namque genus respicitis, sive mores, sive quæ foris, sive quæ in Academia gessit, inter patritios nobilissimum, inter cives honestum, musis, honori, Reipublicæ deditum, optimisque instructissimum disciplinis invenietis. Sic igitur inclytum Prolytam summo Numinis beneficio formatum intuemur, & contemplamur, ut si ex illustribus gentis initiis auspicati ad huius laudes delabimur, studiosorum decus eum jure meritoque dicamus: si contra ab ipso proficiscentes in familiam, unde progenitus est, revocamur, nobilis Juventutis absolutum exemplar eum esse fateamur. Quod si quis vitæ lectissimi Adolescentis ignarus hæc nova atque adeo miranda, & incredibilia putet, tantisper sustineat P. C. quoad Candidati clarissimi sic gesta breviter commemorem, ut non ejus eximias virtutes præconiis de more prosequi, sed tantum obiter
per-

percurrere videar; ita namque futurum existimo, ut non solum in unam de virtutibus hujus adolescentis omnes adducantur opinio- nem; sed me, ut tempori, & modestiæ servi- rem, de illis admodum parcè, ac timidè verba fecisse cognoscant.

Haud tamen putandum vobis est P. C. me penitissimis ex latebris antiquitatis Morotii generis originem repetiturum; eccui nam- que ignorata mortalium Morotii sanguinis claritudo? Hanc Hispaniæ, Galliæ, Germania, & à nostra continenti divisa Britannia non ignorant legationum, & munerum publico- rum causâ sapissimè peragrata: nec est a no- bis de gente inter Italiæ familias celeberrima, sed de moribus, sed de virtute Josephi Mo- rotii differendum: in quo si, tamquam in spe- culo conjuncta simul & magis rutilantia lu- mina, omnes maiorum virtutes contempla- mur, quæ linguis, & calamo celebrantur, quid veriùs P. C. quàm hunc eundem stu- diosorum omnium esse decus, & ornamen- tum? Quid enim hoc Prolytâ, & Parenti suo, & Avo similis? Te primum, Gaspar Ludovice Moroti, honoris causâ nominabo, quem felicem, beatumque non magni Can- cellarii munus, quo in Equestri censu Divi Mauricii fulges, non Hispaniensis illa legatio, qua summa cū laude perfunctus ingentē tibi famam apud Hispanum Regem peperisti, ac Victori Regum optimo in primis acceptus præ

priscæ familiæ claritati novam lucem attulisse visus es (quamvis hæc non sint in infimis vitæ tuæ præconiis reponenda) sed fortunatissimum trium liberorum efflorescens, ac lætissima soboles efficit; ex quibus tibi conspiciere datur Josephum Franciscum filium natu majorem, virtute maximum, tuas non æmulantem, sed penitus exprimentem dotes. En tuam illam in rebus ancipitibus prudentiam in Nato renascentem tuo! en dexteritatem iterum exorientem in filio! en gravitatem in florenti illius ætate maturam! Qui plantæ surculus, qui fonti rivulus, quod lumen lumini simile magis? Tu Patris tui in munere successor, & velut meritorum hæres, hic tibi, & Avo simillimus. De Carolo nempe Morotio præstantissimo viro Prolytæq; nostri Avo loquor, P. C. cujus Legatum agentis Mediolanum, Janua, Parma, Londinum, Vienna sapientiam sunt admiratæ; quem Leopoldus ille religione piissimus Imperator, & de victis barbaris triumphator benevolentia complexus, honoribus summis affecit. Quem, ò prope divinam viri clarissimi laudem! Victor Amedeus Rex (nostis P. C. Principis ingenium!) non solum Regni Administrum, non solum Torquatum Equitem creavit, sed adolescentiæ comitem habuit, & educatorem. Nam sive nascentes Principis virtutes optimis fovebat institutis, sive ad gentilium Heroum exemplum juvenilem

nilem Regis animum componebat, hoc maximis ejus virtutibus gloriam addet oblivione nunquam inobscurandam, & obruendam. Si namque præclarum, & eximia quadam, immortalique gloria dignum est consilio juvare Rempublicam, ubi maximè Civium salus periclitatur, quam laudem cum promeritum esse dicemus, cui contigit saluberrimis monitis, atque præceptis Patriæ Parentem imbucere, qui non modo exardescencia bella restinxerit, sed hostilem omnem impetum ita retuderit, ut flammam, ac pestem à Regno, à mœnibus, ab aris, à focus, à fortunis nostris, à civibus, à liberis, à vita depulerit, & florentissimæ pacis artes armorum furore, & communi calamitate dilapsas æterno subiectorum bono erexerit, restituerit, amplificavit? Quid ergo felicius, quam tanto sub Principe natum esse? Quid fortunatius, quam ejus imitari virtutes, quo cultore simul, & admiratore, tanta in Optimo Rege cunctarum virtutum moles creverit, & ad cælum usque pertigerit? Ægre P. C. à memoria Clarissimi viri dimoveor, cujus mortem quamvis necessariam, immaturam tamen, deplendam omnibus civibus arbitrarer, nisi vivam mihi in Josepho Francisco Marchione Morotio summi, & sapientis Avi imaginem intueri viderer; non illam corporis mortalem, & fluxam: sed animi, sed mentis incorruptam, & immortalem, quam sapientia format, justitia distinguit,

guit, fortitudo confirmat, erigit abſtinentia, fides honeſtat, caſtimonia, religio, pietas, ornat, & perficit.

At me plura pollicitum tandem intelligo, quàm poſſim verbis exſolvere. Id autem mihi ſuſpicioꝝ contigiſſe, quod illis, quos Oceanum primum navigare auſos tum ejus immenſitate perterritos eſſe puto, quum rapido vento non magis delati, quàm rapti litus terramque diffuſiſſe viderint, oculiſque perſpexerint longè latèque diffuſum maris ambitum ætheris tantum finibus, cœloque finiꝝ. Eis equidem in eas inſulas forte fortuna deportatis, quæ contra extremam Mauritaniam ſunt ad occidentem ſolem, non tantum ob aëris ſaluberrimi temperiem, florum varietatem, fruſtum ſuavitatem, avicularum concentum, omnium bonorum copiam, quibus affluere, & redundare perhibentur arbitror illas habitas fuiſſe fortunatas, creditaſque non ſolum felicium animorum domicilium, ſed otia quoq; Deorum: ſed ob metum maris illius, quod & procelloſum timebant, & exhorreſcebant interminatum. Quid nobis enī de viribus noſtris non pollicebamur, antequā ad Morotianā familiam, velut in vaſtum pelagus, aggrederemur? At vix altum ſtemma conſpicientibus licet eſſe felicibus, ſi dumtaxat in aliorum duorum mentionem non feramur, ſed incidamus: quorum virtutes in inclytum Prolytam non deſcendiſſe, ſed penitus

nitus immigrasse videbuntur. Vosque Carole Philippe, & Ludovice Morotii, quamvis magna subalpinarum gentium lumina reticerem, si longius ab optimo Prolyta disceres offenderem, nec in alterum Proavum, in alterum Abavum celerrimè percurrrens, & quodam velut æstu lata non incurrisset Oratio. Quid enim vobis, felices animi, mihiq; fuisset commune? Quid vestræ gloriæ, nostræque novitati, doctrinæ vestræ, nostræque imperitiæ? Quid adderem famæ virorum, quæ latissimè volitat per omnium ora mortalium? Quid? Illam augerem ego doctrinam, quæ in tribunalibus, tanquam in Regno, dominatur? Adderem facilius flammæ lumina, soli lucem. At sine vestra dicam injuria: immo, si faustis hominum rebus Superi delectantur, summa cum vestra lætitia dicam, Morotii generis sapientiam, vobis intereuntibus, minimè periiisse: vivit adhuc in posteris, virens in Nepote florescit, & germinat. Et quidem P. C. si virorum illustrium, atque magnorum doctrinam, vobis præsentibus, commendare vellem, actum, ut ajunt, agere viderer; si munera, quæ gesserunt, & longum id esset, & ab orationis præscripto alienum. Quanti Ludovici responsa, quanti Caroli tractationes, opuscula, orationes, quanti scriptum ab hoc postremo doctrinâ refertissimum apologeticum, quo Antonium Fabrum doctissimum quidem, & eruditissimum virum, at veteribus Interpre-

tibus

tibus semper iniquum mordaci sale perfricuit, apud cunctos æstimetur: quanti in foro, in Judicū subscelliis, in tribunalibus fiant, exteri, civesq; fateantur. An putem Ludovici dignitatem, quum Catharinæ Austriacæ Regiæ Principis egerit Administrum, quum Ærarii, quum Senatus amplissimi Præsidentem, quum Romæ Legatum, vestris dumtaxat e mentibus excidisse? aut Caroli summos honores oblivione deletos, qui paternis dignitatibus, quas & ipse gessit, magni hujus regni Cancellarii potestatem adjecit: & oblitteratam a vobis virorum summorum memoriam, Civitatis, Senatus, Regni monimentis, scriptisque immortalibus consecratam? Quod si tam clavis, excelsisque virtutibus tenebras nulla vetustas offusura est, considerate P. C. an Abavi doctrinam, Proavi sapientiā in Josepho Marchione Morotio desideremus? attendite Juvenis in hac ætate mores, & sapientiam; mihi namque vel semel comparasse satis erit & senum, & majorum cum adolescente, & Nepote virtutem. Si verò inter eos, qui subalpinam hanc regionem rebus gestis, literisque nobilitarunt, tales Josephi Majores fuere, qui nationis rectè decora dici possint, nimiumne mihi sumxisse videor, si dicam studiosorum illum decus esse, qui Majorum suorum virtutem non contemplari, sed imitari; non verbis extollere, sed factis expromere; non in aliis mirari, sed in se derivare omnibus studiis, tempore,

viri-

viribus pugnat, enititur, elaborat?

Me vero sublatum in eas partes intueor P. C unde lectissimi Prolytæ doctrinam velut ex alto loco contemplor; quem si studiosorum decus rectè vocavimus, nemo negabit nobilis Juventutis dici posse numeris omnibus absolutum exemplar. Et sanè, si studia Candidati clarissimi propius attendamus, nihil in illis commune, vel tritum reperiemus; imò quod generis magnitudini non usquequaque respondeat. Fidem profecto, justitiam, honestatem, moderationem, ac fortitudinem, quas violasse nunquam, coluisse semper visus est inclytus adolescens, nobilium animorum proprias dotes esse debere, nullus dubitat. At quis rectè ibit inficias, ornamenta nobilitatis domi, & foris in civilibus otijs, & remotis ab armorum farore temporibus ex liberalibus institutis, Philosophia, Eloquentia repetenda, & civilis vitæ moderatrice Jurisprudencia, & omnis humanitatis? Ut enim sine lumine in hac rerum universitate nihil esset, quod oculos reficeret, ac recrearet, corporisque motus dirigeret: omniaque horribili quadam commixtione confusa conspicerentur, terræ, coeloque pulchritudo, voluptas deesset hominibus, vita mundo sublata videretur; sic illustrium ingeniorum, atque sublimium, si sapientiæ, si bonarum artium, si virtutis luminibus obstruas, unde generum
cla-

claritudo, unde nobilitas oriatur, ubi sacra familiarum, & priscorum gestorum insignia reperiantur: quæ erunt Majorum imagines si nullo claræ facinore? Omnia nimirum obscura, & humilia fuerint, tenebrisque offusa densissimis; generosæ namque nobilitatis hæc natura videtur, ut à virtute, doctrina, sapientia tanquam ex radice nascatur, cum virtute, cum doctrina, cum sapientia crescat, illisque deficientibus, non generis nobilitas, sed extinctæ nobilitatis inane simulacrum, bustumque permaneat. At inclytus Prolyta non solum adeò liberalibus institit disciplinis, ut vetustissima familiæ decora servaret, augeret: verum & illa jecit fundamenta virtutis, ut novæ claritatis esse posset & parens, & auctor. Percurrite P. C. si vacat, bonas artes omnes, Doctores Academicæ consulite, disciplinas enumerate. Humanioribus literis instructissimum requiritis adolescentem? Josephum considerate. Dicendi in arte peritum? in eum oculos, mentemque conjicite. Ratiocinandi disciplinâ præstantem? Prolytam lectissimum intuemini. Qui subtiliter naturæ perscrutetur arcana? Qui divinas & humanas leges studiose sit consecutus? eum vos summis laudibus affecistis. Sed quid vos moror P. C.? In omnibus artibus versatum quæritis, quæ dignissimæ videantur ingenuis, ac verè nobilibus? Plurimi sunt, quos huic uni me-

rito postponamus : rarissimi , quos compa-
remus : nemo , quem non injuriâ præfere-
mus .

Leviter autem Josephi Morotij studia per-
stringeret , & animo lustraret extrinsecus , qui
doctrinarum numerum dumtaxat attenderet ;
non enim his operam dedisse contentus , qua
in re comites paucos enumerare potuisset ,
enitendum sibi constituit , ut studia à popu-
lari discendi modo , ad altiorem , ac verè no-
bilem revocaret . Quid verò non est conatus
in hoc consilio , & sententia defixus ? Elo-
quentiæ sociam Poësim adjunxit , non illi
profectò , quam corruptam , & fucatis qui-
busdam dicendi coloribus ornatam vendi-
tant in Rethorum officinis ; at sanæ , castæ-
que , Tullianisque fulgoribus emicanti . Quot
carmina suavi , modulatoque sono cadentia
avidis auribus excepiimus , quot ad amicum
sibi simillimum scriptas epistolas , quot con-
ciones , quot ornatas orationes , & grandi
quodam stylo conscriptas , & optimis ver-
bis , & expolitis ? Nemo vestrum P. C. fuit ,
qui plures adolescentis dissertationes de ve-
tustis rebus , & criticis , qui justa de rebus
gravissimis commentaria legere non potue-
rit . Quid referam naturæ demonstrata spe-
cimina , non inani fulta mentis acumine ,
vel vocibus omni significatione carentibus ,
sed ex intima rerum notitia deducta , neque
fallacibus periculis comprobata ? Quid ex
mo-

morum scientia expressa præcepta, cujus Socraticis ex fontibus derivatæ quidquid est magis purum, ac liquidum in Jura Romana defluxit? Quid eruditionem variam ex chronologicis, & historicis scriptoribus arcessitam? An de Juris sacri noticia loquar, quam ex Patribus, Conciliis, & priscis Ecclesiæ monumentis arripuit? Sed hæc vel vobis admirantibus edita, vel in hac publica luce tentata. At Morotii studium non ita in Athenæo nostro refulsit, ut peculiari laude careret; exemplo namque summorum virorum, qui domesticos quosdam instituerant conventus disciplinis augendis, & acueendis ingenijs destinatos, privatam quandam Academiam excitavit, in qua, nostro duce, quidquid vel publice auditum, vel solitaria lectione perceptum esset, iterum incudi reddebatur, donec castigatum, ac nitidum permansuris litteris consignaretur. Hinc sæpius æmulatorum retusa tela sunt: hîc veluti aliud propugnaculum constitutum literariæ securitatis. Nullus etenim erat, qui nobiles Juvenes, ac generosos publicè diligenter edoctos, privatim operosis laboribus continenter exercitos non solum cominus adorîri, sed nec eminus quidem lacescere auderet; quæ res nostris animum addebat, æmulos numero viribusque minutos ad metum, & silentium adigebat. Quid enim probabile dixissent, quod cognita Juvenum virtute,

non illicò confutatum, explosum, & derisum fuisset? An neglectos adolescentiæ mores, & licentiâ solutos exprobrassent, in tam perspicua Juvenum modestia, castitate, religione? Tempus in gerris, eruditisque nugis insutum, in tam aperta utilissimarum rerum scientia, & professione? Barbarum vocum sonitum, & linguam auditam in Latinis regionibus peregrinam, in tanta Romani sermonis castimonia, & ubertate? Vim obtusam ingenij, in tam subtilium rerum perinvestigatione? Remotos desidia, & vanitate Juvenes à cura Reipublicæ: si artibus illis jam assueverant, sine quibus Respublica stare non potest? Artium denique nobilissimarum curam ab hoc uno dumtaxat abiectam in tam evulgatis, latèque patentibus Morotii laboribus, profectuque, cujus non solum pervagata per nobilium conventus fama erat, verum etiam à pravis opinionibus plerosque dimoverat, & multos in hanc societatem advocarat, adduxerat, eosque in omne consilium, studium, virtutemque consociarat?

Vix itaque P. C. posthac aliquos futuros opinor, qui quum in Josepho Morotio tam clara doctrinæ lumina videant, & ipsi inesse tam multa virtutis ornamenta cognoscant, non tamen in eo cuncta reperiri libentissimè fateantur, quibus & studiosorum decus Jure vocetur, & nobilis Juventutis perfectum exem-

exemplar. Quorum alterum si propterea præstitit inclytus Prolyta, quod semper optimis disciplinis operam dederit, perfectioraque studia fuerit prosequutus: alterum quod Majorum virtutes æmulatus sit, illud mihi videor rectè posse ominari cunctos paternos, & à nobilissimæ stirpis viris quondam gestos honores huic uni non defuturos, cui nulla desunt ornamenta Majorum. Quæ quidem uti feliciter eveniant, Adolescentis eximij merita facient, quibus, ut ab Academia summa nunc præmia tribuuntur, ita hæc sint summarum Reipublicæ dignitatum initia, quæ divino Numinis munere ex hac optimarum doctrinarum altrice principium habuisse, & quasi cunabula videantur.



IN COOPTATIONE
 LUDOVICI HIERONYMI
 MALABAYLÆ
 Canaliū Comitīs

ORATIO QUINTA

Habita XI. Calendas Augustas M. DCC. XXVII.



Prerenni summi Numinis beneficio factum opinor, P. C. ut sive paucos, sive plures de more laudare præterito tempore consueverim, lectissimos ut plurimum à superis immortalibus mihi creditos, datosque cognoscam, & ex tanta Candidatorum omnis ætatis, generisque multitudine summos, optimosque non solum nihil tale promerito, sed neque speranti penè fuisse delectos. Sive namque Collegium hoc vestrum intueor, sive cunctos in exteris oras delatos intelligo, sive Patriam colentes, & hanc regionem, menti vel oculis obversantur, mirari non desino divinam Cælitum providentiam, & lætari tanti muneris dignitate, quod non solum studiosis eisdem, verbis amplissimis magnos honores collatos aspexerim, sed quod etiam cuncta, quæ de illorum studiis fueram auguratus, ex voto fausta, rei publicæ secunda contigerint. Quod si priorum annorum gaudia reputans ad præsentem diem

diem animum adijcio, non geminatâ, sed propemodum infinitâ lætitiâ mens perfundetur, ac inundabitur; quum hodię conspiciamus Adolescentem & factis de re literaria benemerentem, & propriâ famâ nobilitatum, & cui supra morem, ætatem, & pene dixerim mortalitatem a Deo omnia concessa fuerint. In Ludovico namque Hieronymo Comite Malabayla, non modò, quo lætemur, habemus, sed quo gaudio triumphemus, si cæterorum numero licet ultimus, par animo summis, nullique gentis præstantia secundus appareat, & qui decētissime doctissimorū, qui præteriere, nobiliū Juvenum agmen & honestet, & claudat. Et utinam P. C. tantarum virtutum multos in posterum successores intueamur, ac injuriâ dixisse revincamur, hunc præstantibus laboribus nostris coronidem addidisse; quod quum evenerit, gratulabimur. Nunc autem, futuri tantisper neglectâ curâ, magis exultemus, quòd in hoc singula, quæ sparsim in aliis agnovisse potuimus ornamenta, conjuncta simul, & aucta reperiantur, ut hæc plenius manibus a Superis non data, sed profusa videantur. Et quidem decebat hoc maxime sempiterni Numinis beneficentiam, ut quum præsentia suâ doctis piisque Academiæ cæptis semper adstiterit, quod singulis annis indulget, hoc prolixius tempore, tantoque Prolytæ largiretur; quem sic formatum compositumque voluit, ut aptus ad omnia cunetis

abundaret fortunæ, naturæ, mentisque præstidiis. Non igitur aliundè juvat nunc exordiri, quam ab eo summo rerum omnium Effectore, ac Molitore, qui quum omnia donarit, præstiterit omnia, pulcherrima nobis miranda hac tempestate proposuit: nec denique præstabit exorsis finem imponere, nisi ejus suprema cum laude, qui tibi, Clarissime Prolyta, tam multa a nobis celebranda decora tribuit; quæ tum rectè fient, & ordine, quum divinitus data referentur accepta Cælitibus: & si laudationem haud esse nostram tum censeamus, quum laudandis dotibus, aut animi viribus corporisque, vel præire nos aliis, vel aliquid posse dicamur.

Nullus profecto P.C. ab Academia restituta tantæ in hac vestra corona nobilitatis enituit splendor, & decus, qui hodie, si Ludovici genus attendimus, ejus claritati præluceat; nullum tam magnum vidimus eruditionis, doctrinæ, virtutis experimentum, quod vestram admirationem excitare non possit, si quum omnium lectissima quæque teneat, exprimatque cæterorum optimus adolescens unus, vix alius unius ornamenta nonnulla complectatur. Fuere, qui priscam nobilitatem deductam ab heroicis usque temporibus ostentavere: fuit, qui divitias, fortunæque larga mûnera jactare potuerit, vel gestas a majoribus dignitates. Alius bella recensuit, & patriam manu, vel consilio sustentatam, paren-

parentumve cicatrices commemoravit, vuln-
rum adverso pectore susceptorum gloriosa
vestigia. Qui sacras potestates, qui magistra-
tus, qui præfecturas recensuerint, fuere quam-
plurimi. Alii demum ab se se totam nobilita-
tem quæsierunt, ut quod aliis fuere majores,
ipsi posteris essent, & omnium titulorum,
imagingumque loco suam prudentiam, sapien-
tiam, doctrinam, non aliunde arcessita lumi-
na demonstrarunt. Tu quod novi proferres,
nihil, Ludovice, haberes, si cuncta dicendi stu-
dium atque sedulitas occupavit: nihilque lau-
datione tua difficilius, quod serius natus esses,
si alius ante te par omnium omni laudi fuisset.
At nihil trepidam turbare mentem in hac ea-
dem virtutum, & ornamentorum copia po-
test: tolle ab omnibus, quod singulorum est,
tibi que optimo jure convenit, nullumque te
dignius laudavimus alium. Ab hoc sume ma-
jorum in toga gesta facinora: tolle ab aliis
sacros honores, & insulas; ab isto fortitudi-
nem militarem, bellica decora, Ducum pru-
dentiam & reportatas palmas: ab illo pacis
consilia, & artes regnorum, Scriptorumve
immortalem gloriam; tum adde propriam do-
ctrinam, propriam modestiam: ne præter-
mitte morum honestatem, atque candorem:
legum ne præteri reverentiam, cunctas de-
mum adjuuge virtutes, & non modo te di-
gnam laudationem exprefferis, sed quam,
præter te, nemini aptare possis. Sic P.C. naturâ
pro-

proditum videtis exemplar, quod nulla mortalium opera unquam effinxerit, fortuna, virtute, Cælitibus velut in unum conspirantibus opus. Sic mirabili prorsus arte nonnunquam efficitur, ut quum in tabula conspiciere detur, hic sudum cælum, & candentia nocturno lumine sidera, istic ex irriguo fonte in marmoreum labrum fluentes aquas, illic mari passis velis incubantia navigia, alibi præruptam opaco nemori conterminam rupem; ubi suæ luci reddita cernas hæc moderatè distantia, pulcherrimam hominis speciem cuncta referre, & exprimere videas, & quod monti, mari, fonti, cælo, sideribus speciosum inerat; unius imaginis dignitati, veneribus; cocinnitudini serviat. Quis pauca deinceps me dixisse putet, ubi hæc omnia viderit Adolescenti lectissimo tam benè, tam aptè congruere? Singula si illa possunt hominem, familiam, gentem decorare, quid universa facient? Si miraris eos, quos vel una dumtaxat honestet ex tot tantisque generis & animi dotibus, quid huic uni non tribues corporis, & stirpis, & fortunæ & mentis ornatu præstanti? Paucis magnam laudationem absolvimus P. C. si benè laudare non sit plurimis verbis, sed plurima & maxima dicere, & si quæ solitaria & divisa complures exornare potuerint, collecta simul uni sufficiant.

Sed ad hæc prope P. C. summa tantum carpens, ac delibans reviviscat oratio. Si quid in hæc rerum

rerum universitate castè, sanctèque colendu m
est, in id profecto omnes mortales incumbere
decet, ut religioni studeant, quæ cætera-
rum virtutum prima est, suprema est. Hujus
autem tantam in hac familia, & ab hoc opti-
mo Prolyta curam habitam certo scimus, ut
nullum magis clarum exemplum ex illa di-
manarit in posteros, & nihil magis acce-
ptum ab hoc Adolescente parentibus, mayo-
ribusque referri potuerit. Adeo namque cul-
tus illius in animo Malabaylæ gentis insedit,
ut quot generis propagationes ediderit, tot
religionis columnina propagarit. Quid ergo
mirum si tanta Ludovico contigit virtus tan-
quam parentum cum hereditate transfusa?
Accipere debuit quotquot virtutis exempla
Johannes Malabayla, Baldracus, Vasinus,
Astensis Ecclesiæ Pontifices, quotquot Vasi-
nus alter Placentinæ urbis Antistes, [ut cete-
ros præteream, Stephanum videlicet, Octa-
vianum, Bernadinum diversarum sodalita-
tum, & ordinum viros, incertum an clariora
nobilitate, an pietate lumina] Nepotibus
imitanda patrarint, atque ostenderint, quo-
rum facta recenti parentum exemplo renova-
ta a puero conspiciebat. Quam bene Ludo-
vicus huic majorum conatui simul, & voto
respondit? Quid per ætatem sibi licuit, quod
non tentarit, effecerit? Quæ non calcavit a
suis impressa vestigia? quæ senum facta Juve-
nis non est consecutus? An humanitas,
man-

mansuetudo, liberalitas majoris illius virtutis vel administræ vel comites, vitæ quotidianæ Clarissimi Prolytæ sociæ, pene dixerim, non extitere, ut cum hoc peregrinari, rusticari, versari semper, & ubique viderentur? Harum nonne complebat numerum in parentes, in leges, in natu majores obsequium, quod nemo coluit nisi pius? Qui in amicos respectus, & caritas, quæ in cæteros homines fides, in omnes integritas? Nihil defuit Ludovico de his, quæ ad animi cultum pertinent, si nulli virtutum defuit Ludovicus: vel si quid defuisse dicam, sacrorum dumtaxat insignia: solum infulæ defuere nec familiæ unicæ spei, nec ætati convenientes. Castus animus, pura mens, pietatis ac religionis amor nunquam non adfuere. O quam decorum majoribus talem habuisse Nepotem, cui fluxi tantum honores, virtutisque signa, non virtus ipsa defuerit!

Ne vero fusius de virtutum principe differam, cæteræ tuæ, Ludovice, dotes & ornamenta præpediunt. Merita meritis, virtutes virtutibus advocantur. Non totum pietati, religioni non totum te devinxisti, quin doctrinam, quin litteras amplectereris; immò totum pietas, totum tenent & litteræ. Cur etenim eam dissolvisses conjunctionem, & nexum virtutum, quarum postremæ dum altera carent, nescias maline pius, an boni præstiterint? At ubi consociantur, si doctrinæ

Strinx illustrant, pietas illuminat, & licet ab eodem profectæ parente, & opifice Deo, tamen vel illæ juvant afflatu Numinis, vel nocent mortalium pravitate. Sic unius virtutē Solis corpora nonnulla tolluntur, sic luce perfunduntur, ut modo in similia sideribus lumina evadant, & in imbres excrescant plantis, & animantibus præsidia: modo in procellas, & fulmina erumpant non tantum malis, pravisque terrori, sed bonorum sæpe periculo. Frequentasti studia religione tua digna, tuisque digna majoribus. Pietatis equidem cujusdam est studiis subvenire Reipublicæ, religionis studia Numini consecrare; debiti, familiæ reposcenti, suum exsolvere; quid autem Malabaylæ genti magis proprium, quam sapientiæ studium, & litterarum? Istis amorem, generosam quum tibi dederint indolem, Superi conciliarunt, genus eundem aluit, ac propagavit, & à primis gentis conditoribus ad te usque transfudit. Nonne Numini, nonne familiæ defuisse videreris, si sapientiæ, si literis defuisses? Cur te potius in stirpem hanc, quam in aliam Numen allegit, cur aluit familia, nisi majorum ut moribus viveres? Id omnibus tuis promiscuum fuit sacri, vel alterius ordinis viris: his fundamentis hætenus nomen gentile stetit. Scripsit Guido Antonius Malabayla Canaliū Comes historiam: Scripsit annales Astenses Jacobus; scrip-

scriptioni operam dederat Bernardinus, Octavianus, & alij; sed hi nihil novi moliti fuerunt, quod non jam diu Malabaylæ genti coeptum, perfectumque foret: id nempe fecerunt ne in tanto splendore familiæ suæ nomina delitescerent. Alij namque Philippum Malabaylam multæ lectionis virum, alij Baldracum, alij Vasinum sunt imitari sui nempe nominis decus, & lumen. Parcite felices animi, si vos propria beatitate contentos prætermittens, ad hunc postremum se se convertat Oratio, cui non tantum Subalpinam nationem, sed hanc etiam Academiam obstrictam, atque obligatam putarim. Quem vero Antecessoris gloriæ laudis testimonium reddere convenit, quam Antecessorem eodem in Athenæo eidem docendi muneri destinatum? Sed ne hoc quidem mihi permittam P. C. At si quis gentis amor, & Academiæ recordatio beatum animum adhuc stimulat tenetque, huc parumper respicere velit, obtestor, & in Ludovicum Neptum suorum optimum mentis aciem paulisper intendere. Videre, Vasine, te Professores clarissimi viri Juri Romano, & sacro studentem, mox eorundem munera subiturum: videmus & nos Ludovicum Comitum Malabaylam ex posteris tuis in eadem edoctum Academia non dispari ingenio præditum, doctrinâ non dispari. At hunc fortassis aliò Reipublicæ curæ vocabunt; Malabaylæ

labaylæ tamen gentis animum, & genium feret. Scripta tua sunt immortalitate donata: & hujus erunt immortalis nomini dedicanda; nec eventu omen caruerit: initia vidimus, & incrementa speramus. Non est enim defuturus par initio finis, si quid certi Ludovici labores assidui, nullo cogente suscepti, constantia, curæ, vigiliæ, sapientia religiosè custodita, nullaque non virtus piè, sanctèque servata promittit. Ita videt in Ludovico quod miretur præsens ætas, & videbit futura, si, quod raro deficit fortunato principio, faustus exitus cœptis eveniat. Præclara sapientiæ suæ documenta septem annorum spatio suspexit Academia; quo namque tempore philosophicis rebus operam navare cœpit, emicuit mentis acumen, & ingenium refulsit in omnia pronum, in omnia flexile. Raro namque miraculo possis ambigere, artiumne cunctarum arcana majori facilitate detexerit, an majori celeritate didicerit. Referam ne P. C. singula Ludovici gesta, testes adducam minimè necessarios? Fatigatos antea, quam omnes enumeraverim, vos dimittam, illorum numero, scientiâ, gravitate; produxerim enim ex omni genere, censu, ordine plurimos. Idcirco, me tacente, doctrinarum omnium extrinsecus doctores, cives obscuro, & nobiles dicant, quid nempe de Ludovico Comite Malabayla cuncti censuerint. An in alium conjecta magis lumina
fin.

singulorum sunt? An major inter Juvenes apparuit spes literarum? Dicerent, cunctis vel silentibus, si loqui possent, isti parietes, se se vidisse nunquam, vel hoc uno inter patritios meliorem, vel si amicum æqualem sibi dumtaxat adjungas (a), par Juvenum conjunctius, similiusque, ut studio sic voluntate; ut virtute, sic animo; ut profectu, sic gloria.

Plura de Comitis inclyti laudibus quum hactenus dixerim, quis putaret P. C. me reticuisse præcipua? Quam latum dicendo spatium illa præberent, quod nobilissimus, quod omnibus floribus ætatis ornatus, sermonis mirifica suavitate, corporis venustate, vultus hilaritate conspicuus, suæque tutelæ relictus, omnibus carus, optimis obsequens, à blanditijs tamen, ac sæculi voluptatibus, delicijsque temperans, à vitijs, levitate, cupiditatibus intactus evaserit! Quid in Juvene nobili commoda queant, quid civitatis, æqualium, juventutis incitamenta, quid summa libertas efficere, facilius mente percipias, quam verbis expresseris. Ast in tanta corporis elegantia, tam perspicua mentis integritas: in tam eximio flore juventæ, tantæ prudentia: tanta modestia tantis in copijs: talis abstinencia in tam multis illecebris: tam acutis

[a] De Josepho Francisco Morotio Marchione Bianzeti intelligit, qui superiori oratione laudatus est.

acutis in salibus, jocisque tam admiranda vitæ severitas, cuinam æternis efferenda præconijs non videatur? Quod erit in senili prudentia complementum, si hoc non sit in juvenili virtute fastigium? Magnum equidem P. C. in tam aperta temporum corruptione castam, piamque servasse mentem; majus id Juvenem præstitisse patritium in ea bonorum copia, & ubertate; maximum in solita paternis imperijs libertate: sed propè divinum, & immortale in hac nostra studiorum diuturnitate, gravitate, periculo! Verum quid amplius adjiciemus, si hæc dimidiatæ sunt Ludovici curæ, non adhuc integra studia? Non sanè patrimonium lautum, & copiosum licentiâ nullâ minutum, socordiâ nullâ neglectum, sollerter eâ administratum ætate, qua nulla sit vel digna majori venia, vel cura majori: non severissima studia literarum totum Ludovicum occupant: sed neque capacem occupant animum artes, quas exercendis mentis, corporisque viribus vel Athenæ, vel Roma quæsit. Est animo nobili congruens notitia Regionum? hanc ex purgatissimis tabulis arreptâ Ludovicus ostendet. Licet quandoque patritio ad numeros movere pedes? nec enim quod rudiores Romanorum mores (ut Nepoti Cornelio animadversum, proditumque memoriæ) [a] Græcia ridente, spernebant, nunc dedecet

* M

in-

[a] In præfat. ad Vit. Excell. Imperator.

ingenuos, & eruditos; elegantes ex arte non in comita choreas ducturus est Ludovicus. Exercendum in palestra corpus? fortique brachio stringendus ensis, ut pugnae periculis assuescat? Ludovicus dimicabit egregiè, & modo gradus inferens, modo referens adorietur instantem, & instanti resistet: inque vices corpus ostendet, ac retrahet. Regendus equus indomitus, veredusque pernix vel ad cursum incitandus, vel refrenandus, & acclinatus, & rectus jubentis præscripta servare compellendus? non invidabit priscorum fortissimis hæc civilis vitæ solatia, militaris experimenta. Executiendæ feræ cubilibus? volantesque certis ictibus feriendæ? ut has bellorum sequatur imagines lustrabit saltus, ac nemora. Quid demum celeritate, cunctando, stratagematis Duces effecerint, qui locus sit opportunus castris, qui modus eorum, & facies, ubi locanda præsidia, qua parte hostium propugnacula subvertenda, quando cuniculis, aggere, vineis utendum, quo dirigenda tormenta demonstrabit, ut aliquando peragraturus sibi Italiam, Galliam, Germaniam, Belgium, Angliam, causas sæpè, spectatricesque bellorum regiones, hæc usui sint, & in patriam reduci profutura. Hoc modo Romanis Attica, jocosa serijs, militaria civilibus, forensia castrensibus, sine studiorum jactura, sine jurisprudentiæ detrimento conjunxit. Plane
mi-

miranda Latinarum artium, atque Græcarum, & rarò tanta conjunctio ! O felicem adolescentem, in quo sic Græca, & Romana virtus elucet ! ò dignum, qui Græcis celebretur litteris, atque Romanis !

Nunc vos ego adolescentes appello, qui castra sectantes studiosam Juventutem, cujus nequitis imitari virtutes, nescio quo sale conspergitis. Quid ? severæ litteræ, studium jurisprudentiæ, & totius humanitatis imbellem promittunt animum ? Quæ dextera calamum stringere consuevit, hastam, gladiumque refugiet ? Vobisque solis fortitudinem inesse dicam, firmumque robur ad omnia subeunda pericula, quòd litterarium, quòd laboriosum curriculum declinastis ? En fortia pectora ! en generosa ! en qui patriam ope juvare poterunt, & prudentiâ ! Liceat vobis esse militibus ; militibus tamen. Ducem aliunde capite litteris, armisque formatum. Tu cum similibus Ludovice vel pugna, vel impera : vel consilio, vel armis capeffe Rempublicam. Cæteri vel in campo faciant imperata, vel in otio, potestatum, quas gerere tibi dabitur, fascibus colla submittant. Alunt desidia litteræ ? socordiam jurisprudentia ? Emollit Academia viros ? & in lasciviam dissolutam impellit ? Mores Ludovici suspicite. An hic in pacis artibus versatissimus, bellicis ineptus fuerit ? An Xenophon, & Alexander, an Scipio, Catones, & Cæsares ; an Aurelius,

& Romanus Alexander bellicæ laudis nescij vitam transegerunt ingloriam? Tanta nomina suntne in castris obscura & à militaribus aliena rumoribus? At quis in Philosophicis rebus Aurelio instructior, & Alexandris? quis in Poëticis Scipione? quis in historicis Xenophonte, & Cæsare? in jurisprudentia Catonibus? Conjunget has artes, si voluerit eruditus, & domi, & militiæ pro tribunali iura præscribet. Et si nec vestustis exemplis delectaris, nec ea, quæ dixi futura credis, accipe præterita non longissimo intervallo repetita quidem, sed de una tamen Ludovici familia. Bernardinum Malabaylam paulisper considera, qui se præbuit Gallorum Regi Francisco in pace Consiliarium, in bello Ministrum; in prosperis moderatum, in adversis intrepidum: ubique doctum, ubique magnanimum; fuitque bellicoso principi, sed infelici, in Regno, campo, custodia Magistratus, miles, & socius. Roboaldum contemplare fortissimâ peditum manu pro Romana pugnantem Ecclesia; Ducem habes, nescias prudentiorem, an fortiorem; sed procul dubio militum, quos proprijs opibus sustentabat patrem pene dicas, & Principem. En Petrum Malabaylam Astensium imperatorem; Civilem scientiam in illo contemne, dummodo scias, Galeatium Mediolanensium Ducem fustum, fugatumque suis Armis cessisse victricibus. Clementem denique respice in Eque-

stri

fr̃i Melitensium ordine Magistratum, [ipsi
Commendatorem appellant] qui propemo-
dum infinitis Turcarum copiis in Melitam
insulam irrumpentibus strenuus, ac modicis
auxilijs stipatus occurrit. Quam dignum forti
spectaculum, intueri virum inopinatam cla-
dem barbaris inferentem ! & quum passim
corpora prostrnat, ac proterat, interceptum
ab hostibus ferro sibi parare viam ! At quò
fortitudinis prodigio factum dixeris, ut tanto
hostium numero circumjectus super promif-
cuae stragis confusos acervos modo lentos,
modo citatos gradus agitans, remotis, oculis
pavorem incutiens, proximos quosque ferro
petens, profligans, obtruncans, sanguine madēs
invictus evaserit, clarus scythica lauro ? Sunt
equidem hæc mirabilia, facta tamen, & Ma-
labaylæ gentis in pace, belloque miracula :
cui illud contigit felicissimum, ut scribere
miranda posset, & agere fortia, & rarissimo vir-
tutis exemplo tranquillis, turbidisque Reipu-
blicæ rebus consulere ; ut nempe cæteri à stir-
pe discerent una, quæ contrarijs omnino tem-
poribus utilia civibus forent ; tibi que Comes
inclyte, velut in medio constituto faculas
daretur, quæ velles oprandi ; sequendi, quæ
velles. Elige, licet : sive namque ad hæc po-
tius, quam ad illa convertas animum, delege-
ris semper illustria, & digna memoriâ. Dede-
re tibi Superi mentem omnibus aptam : cle-
gisse, perfecisse fuerit. En forum, en castra :

en prætextas, en chlamydes : en civiles apices, en militares coronas, & phaleras : en lauream forti, doctoque promiscuam ; omnia juveni proponantur, qui videtur natus ad omnia.

Sed tandem te profecturum aspicimus, inclyte Prolyta ; cunctis hujus Athenæi præmiis, & omnium laudibus cumulatam. Ibis faustis, lætisque votis, ac vocibus comitatus ; sed tecum nostri proficiscentur affectus. Ipsa disciplinarum Parens, & cultrix Academia, quæ te, summis ut semper incumberes, hortata est, magno cum sensu lætitiæ dimittit adolescentem Superis, mortalibusque gratissimum, rata non cum ab se se Candidatum amitti, quem Reipublicæ commodis, ac salutis dimittat. Et hercle, si quid rectè conjicio, tui apud illam, illius apud te viva semper, ac florens est permansura memoria, si quum hæc tibi similes, dissimilesve cognoverit, tuæ virtutis exempla protulerit ; si quum populos imperio tu reges, memineris, unde regendi artes acceperis. Et ut prodigio simile foret, si ullo tempore tua, Comes lectissime, gesta nostris è mentibus elaberentur, (siquidem ubi quædam in aliis ornamenta conspiciemus, tua in animum revocabimus, quæ juncta cæteris te eximium dotibus præclaris & doctrinâ in patritiorum censu mirabilem faciunt,) sic portentum videri deberet, si adolescentis

vir.



virtute maximi gratus animus , ardor , &
caritas in studiosos , & in eam Academiam,
cui debet ingenuas disciplinas acceptas , au-
ctam pietatem , vel unquam minuta tepef-
ceret , vel penitus extincta deficeret.

F I N I S.

Imprimatur ,

Vic. Gen. S. Offic.

V. de AGUIRRE Reg. Adv. & St. Censor.

V. Comes de CASELETTIS pro Dom. Co.

& Pr. Pr. RICCARDI. Mag. Cancell. Cust.

